




НОРБЕЙ
ХУДОЙБЕРГАНОВ

Утарбоз
дайын
жетагы



НОРБОЙ
ХУДОЙБЕРГАНОВ

ПАРВОЗ
ДАВОМ
ЭТАДИ

(Одил Ёқубов
ижоди саҳифалари)

Фафур Үулом номидаги
Адабиёт ва санъат нашриёти
Тошкент — 1980

Худойберганов Норбой.

Парвоз давом этади: (Одил Ёқубов ижоди саҳифалари).— Т.: Адабиёт ва санъат нашриёти, 1980 — 168 б.

Талабчан мунаққид, филология фанлари доктори Н. Худойбергановнинг бу китобида таникли ёзувчи, Ҳамза номидаги республика Давлат мукофоти лауреати Одил Ёқубов ижоди «Муқаддас», «Қанот жуфт бўлади», «Улугбек хазинаси», «Диёнат» каби энг етук ва характерли асарлари таҳлили асосида, ўзига хос йўсинда ёртилади.

Худойберганов Н. Полёт продолжается.

ББК 83.3Уз
8Уз

X $\frac{70202-45}{M \ 352 \ (04)-80}$ 185—80 4603010202

© Faafur Fулом номидаги Адабиёт ва санъат нашриёти,
Тошкент — 1980

МУҚАДДИМА

Жамиятда катта тарихий бурилишлар, оламшумул ўзгаришлар рўй берган кунлар авлодлар хотирасида умрбод сақланиб қолади, ҳатто ҳар бир шахс тақдирида ўз «изи»ни қолдиради, осойишта ўтган турмуш тараққиётга таъсир кўрсатса-да одатдаги оддий воқеалардай ўтиб кетаверади.

Истеъоддли ижодкорларнинг фаолияти нималари биландир шунга ўхшайди: агар баҳоли қудрат қалам тебратиб, анча-мунча тузук асарлар ёзиб юрса, бадиият оламининг оддий заҳматкаши сифатида танилади, борди-ю, узоқ йиллар мобайнида жонини жабборга бериб, кунни тунга улаб фидойилик қилиб, бутун кучини сўз санъатининг равнақига сафарбар этса, ўзига хос бадиий тафаккур оламини яратса, тўлақонли образлар, етук характерларга жоён ато қилса, кўпчиликнинг эътиборини қозонади, меҳру муҳаббатига сазовор бўлади.

Одил Ёқубов мана шундай адаб даржасига кўтарилди. Лекин бирданига эмас, жуда машиқатли изланишлар, залварли қадамлар, кучли ҳаракатлар, интилишлар билан кўтарилиди. Ҳа, у мураккаб ижодий йўлни босиб ўтди. Бу йўлда ёзувчига қанча-қанча қувончлар, улкан зафарлар, баъзан муваффақиятсизликлар,

ғам-аламлар ҳамдам бўлган. Бу йўлнинг сеҳру жозибаси, сир-асрори, жумбоқлари ҳам кўпки, ҳаммаси мужассамлашиб ўзига хос оламни ташкил этади. У шундай оламки, кенг миқёсда икир-чикирларигача ўзлигини осонгина намоён қилиши амримаҳол. Бу оламнинг муҳим нуқталари, қумматли хусусиятлари, умумий жиҳатларини аниқлаб олиш ҳам ибратлиdir. Истеъдод соҳибининг адабиёт майдонига кириб келиши ҳам, ҳар гал бадиий кашфиёт яратиши ҳам, баъзан муваффақиятсизлик кўчасига кириб чиқиши, яна кучга тўлиб кўпчиликка севинчу қувончлар баҳш этиши ҳам аслида сирли-сеҳрлиdir ва бу сир-сеҳр баъзан очилмай қолиши ҳеч гап эмас. Чунки ижодий жараён ҳаётнинг ўзидаи мураккабликларга, зиддиятларга, чигалликларга тўла бўлади, биз эса унинг айрим конкрет кўринишларини таҳлил қилиб, асосий қонуниятларини аниқлашимиз, ўзлаштиришимиз, идрок этишимиз лозим.

Агар битта ижодкорнинг қиёфасини аниқловчи хусусиятларни кашф этсак, бир жиҳатдан ҳозирги адабий-бадиий жараённинг ривожланиш қонуниятларидан баъзиларини аниқлаган, айримларини ёритишга имконият яратиб берган бўламиз. Бинобарин, гап Одил Ёқубов ҳақида кетар экан, пировард натижада ўзбек адабиёти, қолаверса, кўпмиллатли совет адабиёти равнақи масалаларига келиб тақалади. Зотан, бу истеъдод соҳиби ўзининг чорак асрдан ошиб кетган ижодий изланишлари давомида Абдулла Қодирий, Ойбек, Фафур Фулом, Абдулла Қаҳҳор каби атоқли сўз усталирининг анъаналарини давом эттириб, янгиликлар билан бойитиб, юксак поғонага кўтариш йўлида тинмай қалам тебратаетир. Шу

билан бирга рус классик адабиёти, совет адабиёти, жаҳон адабиёти буюк намояндлари-нинг, айни чоқда, Чингиз Айтматов, Владимир Тендряков, Валентин Распутин, Василий Шукшин, Миколас Слуцкис, Василий Белов сингари 60—70-йиллар адабиётида ўз истеъодиди намойиш қилган, намойиш қилаётган машҳур адабларнинг ижодий тажрибалари у учун бебаҳо сабоқ вазифасини бажарди. Натижада, Одил Ёқубов ҳозирги замоннинг пешқадам адаблари сафидан ўрин олди.

Бунга ишонч ҳосил қилиш учун унинг ижодий такомилини кўрсатувчи воқеаларни, асарларни таҳлил қилиши зарур, аммо бу ўринда биз Чингиз Айтматов ва Мустай Каримдан ёзувчи номига келган икки мактубга диққатнингизни жалб этмоқчимиз.

Буюк қирғиз прозаиги ва машҳур бошқирд шоири, Одил Ёқубовнинг «Улуғбек хазинаси»ни зўр қизиқиш билан ўқиб чиққанлигини алоҳида таъкидлайдилар.

«Бадиий қуввати билан юксак, асл, ғоятда қумматли бўлган бу асар мени тўлқинлантириб юборди, бу эса қизиқарли китобнинг биринчи аломати. Бундан ҳам муҳими шундаки, романни ўқирканман, менда турк сулоласига оид фахр ва ғурур туйғуси уйғонди. Улуғбек шундай даҳоки, у бизнинг бутун дунё воқеалари тўғрисида мулоҳаза юритишимизга, дардлашишимизга ҳақ-ҳуқуқ беради, у бизнинг виждонимиз, ақл-идрокимиз, у айни чоқда ер юзининг, жаҳоннинг бизга инсониятнинг буюк тажрибасига мувофиқ баҳо беришини тақозо қиласди».

Чингиз Айтматов фикрини давом эттириб, роман Улуғбек даҳосининг фожиасини, мард-

лигу матонатини гавдалантиргани туфайли ёқимли таассурот туғдирғанлыгини алоҳида уқдириб кўрсатади.

Мустай Каримнинг қўйидаги мuloҳазалари ҳам Чингиз Айтматов фикрларига яқин, улар бир-бирларини тўлдиради, бир-бирларини ойдинлаштиради.

«Романинг гоявий қудрати, эмоционал таъсир кучи жуда зўр. Айниқса, унинг замон билан ҳамоҳанг бўлганлиги, чин маънодаги замонавий асар даражасига кўтарилигани мухимдир... Зотан, тарихий асар одамларни ҳозирги кунда муносаб турмуш кечиришга, яхши яшашга даъват этиши керак. Сизнинг романнингиз шундай асарлар сирасига киради».

Ҳукм-хуносалардаги бундай муштараклик «Улугбек хазинаси»нинг баркамол асан эканлигидан гувоҳлик беради.

Чингиз Айтматов ёки Мустай Карим сингари ижодкорлар олқишига сазовор бўлиш ҳар қандай адигба мушарраф бўлавермайди. Одил Ёқубов мушарраф бўлган экан, бу унинг ижодий парвозлари салмоқли самаралар келтирганингизни кўрсатади.

Ижодий парвозлар серунум бўлса, ёзувчи юксакликлар сари илгарилайверади. Лекин парвозлар ҳар доим баланд бўлади, деб ҳеч ким айтолмайди. Одил Ёқубов илк ижодий парвозларга ўн йилдан ортиқ вақтини, жуда кўп куч-қувватини, изланиш-интилишлари, уйқусиз, беҳаловат тунлари, ташвишли кунларини бағишлади, сўнgra парвозларга парвозлар уланиб кетди, ҳозирда ҳам бу парвоз зўр шиддат билан давом этмоқда. Ёзувчи ижодиёти саҳифаларини варақларканмиз бунга ишонч ҳосил қиласиз.

ТУФИЛИШ, ЎСИШ-ЎЗГАРИШ СЕҲРИ

Ниҳол ўтқазилди. Кунлар ўтиб илдиз отиб, барг чиқара бошлади. Сўнgra новдалари пишиб, мева тугади, бунгача бир неча хил ўзгариш рўй беради, куртак ёзди, ғунчалайди, гуллайди. Ниҳол илдиз отиб, куртак чиқаргандага ҳам, гуллаганда ҳам, мева туттаган чоғда ҳам алоҳида гўзал бўлиб, сеҳрли бўлиб туюлади ва бу гўзаллик, сеҳр кишини мафтун этади, шодлигу қувончларга кўмиб ташлайди. Лекин унданда қайта туғилиш, ўсиш-ўзгариш ҳолатларини ипидан игнасигача ақл билан тўла идрок этиб, юрак билан сезиб олишингиз анча мушкул. Ниҳолнинг камолатгача бўлган ўсиш-ўзгариш жараёнини бутунлиги, яхлитлиги билан тасаввур қилиш мумкин, холос. Борди-ю, кечакундуз ёнида бўлиб, уни муттасил кузатгандага ҳам ўша жараённи кўришингиз мумкин эмас. Тўғрироғи, ҳар кўрганингизда ҳар хил рангга, ҳар хил либосга бурканганлигига ишонч ҳосил қиласиз, бироқ бу рангу либослар қайси соат, қайси дақиқада рўй берганлигини аниқлаш қийин. Бугун куртак ёзганди, бешолти кундан кейин гуллади, сўнgra ҳосилга кирди, деб қўяқласиз.

Инсон ҳамиша мана шу ўсиш-ўзгариш, туғилиш сеҳри-ю, сирларини очишга интилаверади.

Ҳар бир етук, баркамол асарнинг туғилиш, ўсиш ва пишиб ниҳоясига ётиш, қоғозга туширилиш жараёни нималари биландир ўша ниҳолнинг туғилиш, ўсиш-ўзгариш ҳолатларини эслатади.

Албатта, ниҳолнинг «таржимаи ҳоли»ни табиат ва инсон яратади, ижодда бу вазифани истеъдод ўз зиммасига олади. Истеъдоднинг тўқсан тўққиз фойизи меҳнатdir, деган ҳикматли гап ўз кучини йўқотганича йўқ. Лекин истеъдод меҳнати, машаққатлари билан сирли, сеҳрли, жозибали бўлиб, камёб, нодир ва ноёб мўъжизадирки, унинг мевалари ҳам мана шундай маъно, салмоқ касб этади.

Истеъдод муҳри босилмаган, ўқиш-ўрганиш натижаси сифатида пайдо бўлган асарларнинг «таржимаи ҳоли» ўта жўн бўлиб, сиру сеҳрга, жозибага мутлақо ётдир.

Одил Ёқубовнинг 50-йилларда ёзилган прозаик ва драматик асарлари, чунончи, «Тенгдошлар», «Ота изидан» қиссалари, «Икки муҳаббат», «Дастлабки қадам» ҳикоялар тўпламлари, «Чин муҳаббат», «Айтсам тилим куяди, айтмасам-дилим», «Олма гуллаганд» пъесалари талантсиз ёзилган, уларда истеъдод муҳри йўқ, деб бўлмайди. Аммо шунга қарамасдан уларнинг ёзилиш тарихи уччалик мурракаб эмас. Ёзувчи бошидан кечирганларини, кўрган-билганларини қоғозга тушириб қўя қолган, дейсиз. Аммо истеъдод билан, илҳом билан битилган асарда ёзувчи ўзи кўрган-билганларини соқит қилиб, бошқа нарсани ифодалайдими? Йўқ, бундай вазиятда ҳам қаламкаш ҳаётий билимини ишга солади, лекин унга янада салмоқлироқ, янада қимматлироқ бирон нарса қўшилиб, биз сезмаган, англама-

ган кашфиёт, янгилик яратади. Истеъдод шундай сирли, сеҳрли мўъжизаки, у ёзувчини ҳатто ўзи сезмаган ҳолда ҳеч кимга аён бўлмаган бой, гўзал, ҳаммага завқ-шавқ, муҳим ижтимоий сабоқ баҳш этадиган олам яратишга мажбур қиласди, даъват этади, илҳомлантиради.

«Тенгдошлар»нинг қаҳрамонлари, ундаги воқеалар ҳам, «Муқаддас»даги сюжет, конфликт ҳам ҳаётдан олинган, тўқиб-бичилган уйдирма эмас. Ҳатто айтиш мумкин: биринчи қиссадаги фикрлар, мулоҳазалар, кузатишлар ҳозирги мактаб ёшидаги болалар ҳаётига мос келади, аммо санъат асарида фақат мос келишининг ўзи етарли эмас. Ҳолбуки, айрим адабиётшунослар ижодий жараённи ёзувчи ва унинг асарлари таржимаи ҳолини ўрганишда асардаги қаҳрамонларнинг прототипларини излаб топиш, воқеаларнинг муайян муҳитда бўлиб ўтгани ёки бўлиб ўтмагани тўғрисидагина мулоҳаза юритиш билан чекланиб қолмоқдалар, бадиият мезонини белгилашда фақат шу нуқтаи назардан келиб чиқиб иш кўрмоқдалар.

Борди-ю, биз шунга риоя қилиб, шуни ҳақиқат деб Одил Ёқубов асарларига баҳо берсак, уларнинг барчасини ижодий муваффақият деб эътироф этмогимиз зарур. Чунончи, «Ота изидан» қиссасида тарихчи Шукур Султоновнинг гражданлар урушида фаол қатнашгани, совет ҳокимиятини ҳимоя қилиш йўлида ҳалок бўлган отаси Собиржон Султоновни хоин деб тұхмат тошларини ёғдириб юрган Қосимов деган жирканч шахсни ҳеч ким рад этолмайдиган далиллар билан фош этгани ҳақида гап боради. Асардаги воқеалар ҳаёт ҳақиқатига зид

эмас. Уларнинг аксариси турмушда рўй берган. Изласангиз, битта эмас, бир неча прототипларни учратишингиз мумкин. Чунки асарда тасвирлангандай ҳолатлар фақат гражданлар уруши давридагина эмас, балки бошқача шакл, бошқача кўринишда ҳозир ҳам бўлиб туради. Бинобарин, «Ота изидан» баркамол асар деб хулоса чиқариш мумкин, бироқ бу хуносани тўғри деб бўлмайди. Зоро, ниҳоятда заиф асардан ҳам ҳаётий ҳодисаларнинг бир парчасини, жуда бўлмаганда, бир заррачасини топиш мумкин. Бироқ бу унинг бақувватлигини таъминламайди.

Асарнинг ҳаётий асосини, қаҳрамонларнинг прототипларини, реал турмушдаги «ака-ука»лари, «опа-сингил»ларини аниқлаш ижод жарайёнига бевосита тааллукли, аммо биз бунга баъзан шу даражада берилиб кетамизки, ўнгимида ҳам, тушимизда ҳам у ёки бу образнинг қайси бир шахсдан «кўчириб» олингани тўғрисида бош қотирамиз. Оқибатда ёзувчи яратган, «жон» баҳш этган бадий олам, образлар дунёси бир ёқда қолиб, қаҳрамонларнинг прототипларини излашга тушиб кетамиз. Шунинг учунми, айрим ўқувчилар сўз санъатининг ижтимоий ҳаётни тадқиқ этиб, кишилар онгини, пировардида, жамиятнинг маънавий-гоявий йўналишини такомиллаштиришга, юксак идеаллар асосида ўзгартиришга, қайта қуришга хизмат қилишини эсдан чиқариб қўяди-да, ёзувчиларга «қаҳрамонларнинг қайси қишлоқ ёки шаҳарда истиқомат қилишади, нималар билан шуғулланишади, севишганлари билан қовушадими, тўйлари қачон бўлади», тарзида мактублар ёзишади.

Баъзи қаламкашлар: «Хўш, нима бўпти, ахир, бу китобларимизнинг ҳаётийлигини кўрсатади, акс ҳолда қаҳрамонларнинг прототиплари таржимаи ҳолига, оиласиб турмушига, юриш-туришларига шунчалик қизиқиши тудирмасди», дейишади-да, шундай мазмунда мақолалар ёзиб, танқидчиларга дашном бериш пайига тушадилар.

Одил Еқубов ўзининг юзлаб муҳлисларидан келган хатларга бошқачароқ муносабатда бўлади. У шу мавзудан сўз очганингизда: «Ҳа, одатдаги гапларни ёзибди, қаҳрамонларимнинг адресларини сўрашибди, лекин дид билан сўз санъатини моҳиятини тушуниб мулоҳаза юритганлари ҳам бор. Мен мана шуларнинг танқидига ҳам, мақтовига ҳам эътибор билан қарайман»,— дейди. Айни ҷоқда баъзи дидсиз китобхонлар савиясини кўтариш учун бадий ижод, адабий танқидни ҳар томонлама тараққий эттириш лозимлигини эътибордан соқит қилмайди. Баркамол асарлар сонини орттириш билан бирга бадий тафаккур, сўз санъати сирларини ошкор этишга қаратилган қатор мақолалар билан тез-тез чиқиб туради, ўзи яратган китобларнинг, қиссаларнинг яратилиш тарихини ёритишга оид мулоҳазалари билан тез-тез ўртоқлашиб туради.

Аммо ёзувчининг шахсан ўзига хос ҳаракат-ҳолатлар йирик адаб деган тушунчага монандмасдай, ёпишиб тушмагандай бўлиб туюлади. Чунки юриш-туришларида, муомала-муносабатларида қандайдир сoddадиллик, жиндак дағалликни эслатувчи аломатлар бор. Бир қарашда унда катта ёзувчиларга хос салобат қани, деб ҳайратланишингиз мумкин. Яширишнинг ҳожати йўқ: ёзувчига шу нуқтаи на-

зардан қараб, уни назарга илмовчилар ҳам топилади. Аммо «Улуғбек хазинаси» ва «Диёнат» билан ижодий камолотга эришган Одил Ёқубов бундайларни ҳам лол қилиб қўйди.

Қизиқ вазият пайдо бўлди: «Навоий» романидан кейин тарихий мавзуда жиддий ўзгариш ясаган бу йирик полотнони ўқиганлар дастлаб, наҳотки уни биз билган ўша Одил Ёқубов ёзган бўлса, деб ажабланиши, бироқ бора-бора ҳақиқатни эътироф этмасдан бошқа илож ўқлигини англаши.

Бир неча йиллардан бўён радио ҳам, телевидение ҳам, газета-журналлар ҳам Одил Ёқубовнинг ноёб истеъоди, унинг ижодий жасорати тўғрисида барадла сўзламоқда, тўлиб-тошиб қувонч билан сўзламоқда. Мухлислар иккич-уч баравар ортди. Шунга мувофиқ ижодига қизиқиш янада кучайди.

Энди ҳозирги ўзбек насрчилигини Одил Ёқубовсиз тасаввур қилолмаслигимиз ҳаммага аниқ-равshan бўлиб қолди.

Бу даражага кўтарилиши учун аввал ҳам мустаҳкам асослар, салмоқли заминлар мавжуд эди. Улар ёзувчининг изланишларида, илк бор «Муқаддас»да ошкора кўринди, кўзга «ярқ» этиб ташланди. Сўнгра йилдан-йилга кўпчиликнинг эътиборини қозониб, ниҳоят «Улуғбек хазинаси» ва «Диёнат»да маҳоратнинг юксак чўққиларидан бирини забт этди.

Одил Ёқубовнинг машхур асарларини қўятуринг, адабиётимизда катта воқеа бўлмаган «Ота изидан» ёки «Олма гуллаганд» каби қисса ёки пьесаси ҳам нималари биландир ҳаётнинг мураккаб, муҳим муаммолари устида бош қотиришга даъват этди, нималари билан-

дир китобхонни завқлантиради, ташвишлантиради.

Буларнинг бош сабабчиси — ёзувчининг баркамол истеъоди. Мана шу истеъод Одил Ёқубовни Одил Ёқубов қилган, мана шу истеъод уни халқимиз, партиямиз олдидаги ижодкорлик масъулиятини бир лаҳза унутмай доимо олий, муқаддас мақсад йўлидан — меҳнаткашлар оммасини маънавий-руҳий, фалсафий-эстетик жиҳатдан тарбиялаш йўлидан бошлаб юради, уларга ҳамдарду ҳамкор қилади, битмас-туганмас илҳом бағишлидай.

Ҳамма гап мана шу истеъоддадир. Унда ижодкорнинг ёзиш-яратиш, яшаш-курашиш сирларию сеҳри мужассамлашган.

Истеъод ўзи нодир, ноёб ва камёб бўлгани учун у кимга насиб қилса, ўшани муайян йўналишда муайян соҳада янгилик яратишга, оригиналлик кашф этишга сафарбар этади.

Одил Ёқубовнинг қайси бир асарини ўқиманг, унинг яратиш, кашф этиш туйғусига йўғрилганлиги сезилиб туради. Аслида мана шу туйғу ёзувчини тинч қўймайди, излаб интилишга даъват этади, ҳар бир асар туб негизини мустаҳкамлашга мажбур қилади. Энг муҳими, истеъод қалбидан отилиб чиқадиган ўша туйғулар дарёнинг кучли, қудратли, тўлқинлари дай ижодкорнинг бутун вужудини қамраб олган чоғда салмоқли самаралар келтиради.

«Муқаддас», «Ларза», «Қанот жуфт бўлади», айниқса «Улуғбек хазинаси», «Диёнат» бу фикрнинг аниқ, ёрқин далилидир.

Мазкур йирик насрий асарлар Одил Ёқубов истеъоддининг тобора очилиб келаётганлигини кўрсатади, қадам-бақадам бадний маҳо-

рати ошибб, ёзувчидаги яратиш, кашф этиш туйғасининг тинмай мавж уриб турганлигидан далолат беради.

50-йилларнинг иккинчи ярмидаги Одил Ёқубов билан 70-йиллардаги «Улуғбек хазинаси» ва «Диёнат» муаллифи бир-биридан осмон билан ерчалик фарқ қиласди, бироқ нимадир сақланиб қолган, ўзгармаган, кўп нарса — дунё-қараш, ижод тажрибаси, ёзувчилик фаолияти мутлақо янги мазмун, янги шакл касб этган, бироқ шу янги мазмун, шаклда дастлабки Одил Ёқубовдан нимадир бор, йўқолиб кетмаган. Бу ўринда, табиийки, бизни Одил Ёқубовнинг ўзи учун, адабиётимиз равнақи учун, кенг китобхонлар оммасининг маънавий-руҳий камолоти учун сабоқ бўладиган ҳолатлар, хусусиятлар қизиқтиради.

Айтиш мумкинки, Одил Ёқубов доимо дарёдай тошиб юради, оловдай ловиллаб, ёниб туради, лекин бўлар-бўлмасга қизишмайди, нимаики халқ дилига ташвиш солса, ўшанинг дарди билан нафас олади, ўшанга куйинади, ўшани ҳал қилиш туйғусига фарқ бўлади. Айниқса, меҳнат аҳли тўғрисида гап кетса, сўз санъатининг тақдиди ҳақида гап очиса, у «портлаб» кетади, ўзини унугиб, кўпчиликнинг дардига шерик бўлади. Афтидан, шунинг учун ўз асарларига ҳам, ўзгаларнинг ижод маҳсулотига ҳам танқидий назар билан қарайди, ашаддий бадиий «жанг»ларга шўнғиб кетади, мавриди келгандা ўзини ҳам, ўзгаларни ҳам аямасдан «дўппослайди». Тўғри, «дўппослаётиб» ҳимояни унутмайди, бироқ «хужум» асосли, кучли бўлса, «таслим» бўлишдан қўркмайди.

Бутун вужуди, интилиш-изланишлари, хат-

ти-ҳаракатлари, курашлари ҳақиқат ва адолат тантанасига қаратилади.

Баъзи ижодкорлар ҳақиқат ва адолатнинг юзига тик боқолмайди. Одил Ёқубов шунинг уддасидан чиқади, лекин осонликча эмас, қийналиб, эзилиб удалайди. «Сиз менинг бу гапларимдан «Ёзувчи акам танқидга тоқати йўқ, ўта инжиқ одам экан-ку», деган хулоса чиқармассиз, деган умиддаман. Мен «Биллур қандиллар»ни ҳар жиҳатдан мукаммал асар демоқчи эмасман», — дейди у ўзига очиқ хат билан мурожаат қилган ёш танқидчига. Сўнг уқтиради: «Танқидчилар масаласига келганда шуни айтмоқчиман: сиз, афтидан, ёзувчини мисоли бир қўй, танқидчини қўйчивон деб тушунсангиз керакки, танқидчи қаёққа қараб «ҳайт» деса, ёзувчи ўша ёққа қараб кетавериши керак, деб ўйлайсиз».

Ўзларини қўйчивон деб тасаввур қилган танқидчилар билан Одил Ёқубов ҳисоблашмайди, буни ошкора билдирмаса ҳам ўта ўжар ва инжиқ бўлиб олади, гапидан қайтмайди. Лекин одилона, адолатли танқидга тান беради, аммо табиийки, тезда эмас, бир оз қайшиб-майишиб тан беради. Тилида эмас, дилида тан берганини амалда, ижодда исботлайди.

Бир гуруҳ ёзувчилар, танқидчилар билан бирга «Қанот жуфт бўлади», «Улуғбек хазинаси», «Биллур қандиллар»нинг илк вариантиларини ўқиганмиз, анча-мунча мулоҳазалар айтганмиз, очиқасига «жанг» қилишганмиз, тортишганмиз, айрим нуқсонларини кўрсатганмиз. Натижада, бу асарлар ўқувчиларга бориб етгунча қанча-қанча «операция»ларни бошидан кечирган, неча бор ўзгартирилиб, А. Қаҳҳор айтгандек, «қайта бичиб, қайта ти-

килган». Жумладан, «Қанот жуфт бўлади»-нинг дастлабки номи «Давр табассуми» бўлиб, қиссанинг қатор образларида, хусусан, Акрам ва Сайёра характерларидаги қандайдир хиравлик, саёзлик учарди, фикр-мулоҳазаларнинг ифодаланишида қандайдир парокандаликка йўл қўйилганди, Одил Ёқубов қайта ишлагандан кейин асарнинг номигина эмас, балки бутун руҳи, шакли-ю, мазмунидаги етуклик ҳосил бўлди. «Улуғбек хазинаси»нинг биринчи варианти маҳсус сўз боши билан бошланиб, муаллиф унда нима учун улуғ ўзбек олими, астрономи, йирик давлат арбоби тўғрисида роман ёзишга жазм этгани, «Правда Востока» газетасида буюк алломанинг дунёда тенгсиз, ғоятда бой кутубхонаси бўлганлиги, нима сабабдан-дир шу пайтгача топилмагани тўғрисидаги мақола билан танишиб, асарни ёзишга дастлабки туртқини олгани, Самарқандга борганида кўпчилик сайёҳларнинг ўрта асрда еру кўкни шону шуҳрати, илми, давлатни бошқаришдаги ишлари билан оламни ларзага келтирган даҳо тўғрисида яхши таассуротга эга эмаслиги ташвишга солганини маълум қиласи ва шу тариқа эпик полотнога қўл ургани изоҳланади. Охирги вариантида изоҳли сўз бошини ёзувчи ҳамкарабалари, танқидчилар истагига мувофиқ олиб ташлади. Улуғбек ва Абдулатиф, шунингдек, Али Қушчи, Мавлоно Муҳиддин характеридаги баъзи нуқталар чуқурлаштирилди, ойдинлаштирилди. «Биллур қандиллар» дастлаб «Сўнгги бир кун» деб аталиб, кўп жиҳатдан хом эди. Одил Ёқубов енг шимарниб, илҳом билан ишга қайтатдан киришди ва қиссанинг бўш, мустаҳкамланмай қолган жойларини «шиббалаб», обдан пишигандан кейин

охирги нуқтани қўйди. «Биллур қандиллар»ни янги боблар билан бойитди, ортиқча тафсилотлардан воз кечди, ҳатто ҳар бир жумлани яна «чертеб-чертеб» кўриб, лозим бўлганда уни бутунлай янгилади, кам деганда у ер-буерини «қиртишлаб» сайқал берди.

«Уруш ва тинчлик»ни Лев Толстой олти карра тақрор-тақрор ишлаб, еттинчисини эълон қилганлиги тўғрисидаги гаплар айтилавериб-айтилавериб афсонага айланиб кетгану, бироқ ҳозирги кунда айрим адилларимиз бир ўтиришда бир нафас билан роман ёки қиссани дўндириб ташлайдилар. Асар тили устида ишлаб, заҳматини чекишга сабр-чидам, матонат камдан-кам топилади. Ваҳоланки, тил устида китобнинг ҳар бир жумласи, образлари, барча ҳаётий асослари, бадиий тўқималари устида тинмай тер тўкиш чинакам истеъоддага хосдир.

Одил Ёқубов мана шу муқаддас ақидага оғишмай амал қиласи, унга хиёнат қилиш халқ ишончини йўқотиш билан баробар эканлигини яхши билади. Номигагина асар ёзиш, нашр этиришни ўзига эп кўрмайди, ижодининг илк босқичидагидек китобни нашрдан чиқариб, ўқувчига ҳавола қилиш билан муроду мақсадимга эришаман, деб ўйламайди. Чунки у ижод шайдоси, ижод фидойиси, барча куч-қудрати, имкониятларини бадииятга бағишишлаган, меҳнаткаш омманинг дардига малҳам бўламан, деган буюк эътиқод билан яшайди, қалам тебратади.

Ижод шайдолари кўп, ёзувчиликка ҳавас қўйғанларнинг ҳисобига етиш қийин, бироқ ижод фидойилари, афсуски, кам учрайди. Чунки ижодда фидойилик дегани меҳнат, меҳнат

ва яна меҳнат, уйқусиз тунлар, беҳаловат кечалар ва яна уйқусиз тунлар демакдирки, бунга ҳаёти, умрини тикканлар бармоқ билан санаарли.

Мана шу бармоқ билан саналадиганлар сағида Одил Ёқубов дадил қадам ташламоқда, у болалик давридан то ҳозирги пайтларгача қайноқ ҳаётда қайнаб яшайди, ҳеч қачон оддий кузатувчи бўлиб қолмаган, турмушнинг ичидаги бўлади, ижтимоий салмоқ касб этган воқеаларга ҳамма вақт тийрак кўз, зийрак ақл билан қарайди.

Қайси бир асарини олманг, унинг юзага келишида аниқ, ёрқин реал омиллар катта роль ўйнаганлигини сезиб оласиз. Чунончи, «Литературная газета»га мухбир бўлиб юрганда бир пайтлари машҳур қаҳрамон бўлиб донг таратган, ҳаммани оғзига қаратгану, бироқ нима учундир керосин сотувчи бўлиб ишлаётган заҳматкаш аёлни учратади, у билан танишади, бошидан кечиргандарини билиб олади, натижада, «Бир фельетон қиссаси» деган қиссасини ёzáди.

«Биллур қандиллар»ни ёзишида ёзувчининг ўз ҳовлисига газ ўтказиш юзасидан олиб борган ишлари, кузатишлари, « зангори олов»ни хонадонларга етказиб беришдаги номаъкулчиликлар туртки бўлган.

Диққат қилинг-а, туртки бўлган.

Одил Ёқубовнинг деярли барча ҳикоялари, қиссалари, романлари ҳақида шундай дейиш мумкин. Чунки уларнинг барчаси адаб ҳаётининг бир парчаси, ҳалқ ҳаётининг бир қисми, тўқиб бичилган ёлғон-яшиқ йўқ. Аммо ёзувчи қачонки ҳаётий материални маҳорат «қозони» да обдан пишириб, янги довон ошиб, янги олам

яратмаса, оригинал образлар кашф этмаса, ижодий ғолиблик гаштини суролмайди.

«Излайман» қиссасининг сюжетини ташкил этган муҳим воқеаларни адабнинг ўзи Мўғуллистонда армия сафида хизмат қилаётган чоғларда кузатган, бошидан кечирган. Унда бир қанча ибратли манзаралар, қизиқарли эпизодлар гавдалантирилган. Асар бош қаҳрамони Даврон Фозиев характерини ёритишга қаратилган ҳаётий лавҳалар чизилган. Бироқ, умуман олганда «Излайман» Одил Ёқубов ижодида «Муқаддас» ёки «Улуғбек хазинаси»дек етук асар даражасига кўтарилмаган. Бунинг сабабларидан бири шундаки, ёзувчи ҳаётий материални ўз ҳолича ифодалаб, унинг моҳијатини чуқур тадқиқ этмаган, салмоқли бадий умумлашма даражасига кўтаролмаган, қаҳрамонлар характерларининг баъзи қирралари ёритилгану, бироқ баркамол типларга «жон» берилмаган, юксак бадий пафос ҳосил қилинмаган.

Ҳаёт ҳақиқати бадий ҳақиқатга айланмаса, ғоявийлик образлилик билан омихталашиб, уйғунлашиб кетмаса, ҳар қандай қимматли фикрлар, асл ғоялар, реал фактлар, воқеалар эстетик салмоқ касб этмайди.

Одил Ёқубовнинг ижод боғида ниҳол бўлиб илдиз отганига чорак асрдан ортиқ вақт ўтди. Оловли, шовқин-суронли ёшлик йилларини жиддий изланишларга сафарбар этди, ўомирлик завқини сурисиб, заҳматини чекди, ниҳоят, ижодий камолотга эришди, истеъодидан сермазмун, сермаъно мевалар ундириди, кўпчиликнинг бадий эстетик эҳтиёжларини қондиришга муносиб ҳиссасини қўшди. Агар интилиши-изланишлари янада зўр қатъият би-

лан кенг миқесда муваффақият билан давом этса, истеъдоди узлуксиз «чархланиб», сайқалланиб борса, маҳорати тинмай ўсса, мустаҳкамланса, кашфиётлар яратиш йўлидан олға, мардонавор илгарилайверса, адабиётимизда катта воқеа бўладиган асарлар яратишга эришади.

ҚАМОЛОТ ЗАМИНЛАРИ

Агар ёзувчининг обрўси ортиб, у шон-шуҳрат шоҳсупасига чиқса, мақтовлар, илиқ сўзларнинг кети узилмай қолади. Лекин мақтовнинг ўз меъёри, ўз мезони борки, бунга риоя қилинmasa, юқибати яхшилик билан тугамайди. Шунинг учун барча даҳолару донолар, истеъдодли ижод соҳиблари мақтовларга, шон-шуҳратга қўул бўлмаганлар.

Одил Ёқубов буни тушуниб етгунча анчамунча мураккаб ҳолатларни бошидан кечирди. Ёзувчи шундай эслайди: «Бир кун кўчада кетаётсам, мендан бир-икки кўйлакни олдин тўздирган бир адид учраб қолиб, четга тортиди:— Табриклайман, ука! Ҳамза театрида иккита пьеса қўйдириш ўзи бўлавермайди. Академик театр-а? Манман деганлар битта пьесасини ўтказолмай юритти-ю, иккитасини дўндириб қўйибсан. Қойил! Лекин ҳайронман. Бошларига кўтарса арзийсану, индашмайди. Билиб билмаганликка олишади. Қимсан академик театр-а? Хўп, хайр. Аммо қойил, ука!

Бу гаплардан мен ҳовлиқмай ким ҳовлиқсин!
...Ҳамза театрининг қулоч-қулоч афишаларида каминанинг номи тўрт жойда зикр этилиди! Фақирнинг тўртта пьесаси қаторасига қўйиляпти экан! Ӯшанда ҳалиям пуфакдай шишиб, ёрилиб кетмабман!»

«Икки муҳаббат» деган ҳикояси сал-пал тилга тушиб, оғиздан оғизга ўтганда ҳам Одил Ёқубов ўзини йўқотиб қўяёзганини сўзлайди: «Биз адабиётга кириб келган пайтларда — эллигинчи йилларнинг бошида, машъум конфликтсизлик назарияси айни авжиди эди. Бу назариянинг меваси бўлмиш уйдирма асарлар кўкларга кўтарилиб мақталаётган пайтлар эди. Ёшлиқда хато қилиш осон. Яхши эканки, мақталаяпти, демак, шуларга қараб асар ёзиш керак, деган фикр туғилиши табиий. Бу фикрнинг тамом хотурги эканини, ҳаёт қанчалик мураккаб бўлмасин, ёзувчи шу ҳаётга суюниши кераклигини, ҳаётда ўзи кузатган одамлар, уларнинг тақдири ҳақида ёсагина жонли бир нарса чиқиши мумкинлигини тушунгунча ўн йиллар ўтди».

Ўн йиллар! Ташвишу надоматлар, изланишлар билан тўлиб тошган ўн йиллар! Улар ёзувчини ўз-ўзини тафтиш қилишга, ўз-ўзига танқидий кўз билан қарашга, ижодга, ҳаётга кўр-кўрона ёндашмасликка ўргатди. Бинобарин, вақт мутлақо самарасиз, натижасиз ўтиб кетди, деб нола чекиши керакмас, лекин ўн йиллар эмас, балки ёзувчи ўзлигини англаб, истеъодини намойиш қилгунча беш-олти йил сарфланса бўлмасмиди, деб ўйлаб қоласан киши ва фифони чиқиб мулоҳаза юритаётган Одил Ёқубов ҳолати, кайфиятнини тушунасан, унга ҳамдарду ҳамкор бўлгинг келади.

Англашиляптики, ёзувчи истеъодининг шаклланиши, етукликка эришиши осонлик билан қўчмаган.

Гап шундаки муҳитни инсон яратади, сўнгра муҳит мустақиллик касб этиб ҳаёт тараққиётига таъсир кўрсата бошлайди. Адабий

шарт-шароитнинг юзага келишида учта муҳим омил иштирок этади: ёзувчи, китобхон ва танқидчи. Демак, ижод тақдиди учун ёзувчи ҳам, китобхон ҳам, танқидчи ҳам жавобгар, улардан бирини оқлаб, иккинчисини қоралаш, учинчисини эътибордан соқит қилиш ёки менсимаслик асло ярамайди.

Сўз санъатининг равнақи ёзувчининг ўз ўқувчиси ва танқидчиси билан қандай муомала-муносабатда бўлишига кўп жиҳатдан боғлиқдирки, биз бунинг моҳиятини етарли дараҷада англаб етмаймиз. Борди-ю, китобхонлар оммасининг талаб-эҳтиёжлари юксак даражада бўлмаса, ижод авжи шубҳасиз, пасаяди. Шунингдек, танқидчи мавқеи ҳам мустаҳкам заминга эга. Зотан у ижодкорнинг талабчан дўсти, дидли китобхони, «тафтишчиси», меҳрибон устози вазифасини ўтайди. Гап, албатта, чинакам танқидчи тўғрисида кетяпти. Бадиият қонуниятларини чуқур ўзлаштириб, ижод сирларини тўғри тушуниб олган истеъоддли мунаққид назарда тутиляпти. Негаки, ўзларини қўйчивон, қаламкашларни қўй деб тасаввур қилган танқидчилар учраб туради. Кўйчивонлик бадиий ижодга ётдир.

Айтмоқчимизки, Одил Ёқубовнинг адаб сифатида шаклланиши таомилдан ортиқроқ чўзилиб кетиши, камолот маррасини кечикироқ эгаллашига унинг ўзи ҳам, ўша муҳит ҳам, адабий танқидчилик ҳам сабабчи бўлган.

Энди шу ўринда дўппини бошдан олиб, бир ўйлаб кўрайлик: Одил Ёқубов қаламига мансуб бўлган илк асарлардан бирортаси на «Тенгдошлар», на «Ота изидан», на «Чин муҳаббат»— чуқур, адолатли, ишонарли танқид қилиниб, ёш ёзувчига сабоқ берилганини бил-

маймиз. Йўқ, Одил Ёқубов кўкларга кўтарилиб, танқидчиликнинг байроғига айланмади, лекин у нимаики ёса, эълон қилдирса, деярли барчаси ижобий баҳоланди, қўллаб-қувватланди, жиддий нуқсонлари конкрет, ёрқин, ҳаққоний таҳлил орқали ибрат қилиб кўрсатилмади.

Дўстона туйгулар билан йўғрилиб, асарнинг асл қадр-қимматини кўрсатишга қаратилган танқид 50-йиллардагина эмас, балки 70-йилларда, ҳозирги кунда ҳам оммавий тус олган, деб айтолмаймиз, бироқ ижод ҳақида ҳаққоний, лекин аччиқ сўзни зикр этишга интилиш тобора кучайиб бормоқда.

Одил Ёқубов Абдулла Қодирий,Faфур Fuлом, Ойбек, Абдулла Қаҳҳорлардан баъзан бевосита, баъзан бавосита сабоқ олганлигини, аммо Мухтор Аvezовдай устози бўлмаганлигини айтиб ўкинади, бироқ танқидчиликдан ўпкаламайди. Ваҳоланки, ўпкалаш у ёқда турсин, ёзувчи туғилиб, бадиият майдонига қадам ташлаб, оёққа дадил туриб кетгунча, катта ютуқларга эришгунча, ундан кейин ҳам — ҳамма вақт илмий жиҳатдан баркамол, адолатли, ҳаққоний танқидга муҳтож эканлигини, беўрин, асоссиз мақтov ижодкорни йўлдан уришини барала айтиши мумкин ва зарур эди.

Айтмаганлигининг боиси шунда бўлса керакки, у нуқсонларини бирорнинг елкасига афдариб юришга одатланмаган. Чунки ҳар қандай шароитда ёзувчи камчиликлари биринчи галда ўз гарданига юкланади, уларга ўзи жавобгар бўлади, сўнгра иккинчи, учинчи навбатда танқидчиликка, муайян шарт-шароитга айдининг бир қисми юкланади.

Кўпинча Одил Ёқубов бошқаларнинг зим-

масига тушадиган оғирликни ўз елкасида олиб юришдан ҳайиқмайди, тортиңмайди. Бу ўрининг характерига, шахсиятига хос бўлган бир муҳим фазилатни қайд этамиш: қилингандан, бажарилган ишдан қониқмаслик, забт этилган довонда қотиб қолмаслик туйғуси, ҳар бир асарни юксак маҳоратга эришиш йўлидаги навбатдаги қадам деб яна олдинга юриш, тинмай баланд чўққиларга интилиш туйғуси уни тарк этмайди, унга тинчлик бермайди, унинг қониқонига сингиб кетган. Шунинг учунми, мақтатётганингизда кинояли жилмайиб қўяди, ошириб юборганингизни сезгач, бу нега даркор, дегандай қўлини силтаб ташлайди, шон-шуҳрат кетидан қувмайди, меҳнатсиз ортириладиган обрўдан қочади.

Чинакам истеъодд соҳиби мақтовга учмайди, шон-шуҳратни, ном чиқаришни, обрў ортиришини ўлгудек ёмон кўради, шарафлашларни ўзига душман деб билади, деймизу, бироқ амалда бунинг тескариси бўлиши мумкин.

Бизда ҳамма нарсага йўл очиқ, фақат ёмон ёзишга ҳуқуқ берилмаган, аммо истеъоддисиз, қобилиятсиз қаламкаш учун муқадлас қонун йўқ, у ўз манфаати учун баъзан соғлом муҳитни булғаб, мухолифини оёқ ости қилишдан тоймайди.

Адабий жараёнда бундан юз карра, минг карра мураккаб курашлар, «жанглар» бўлиб турдиқи, уларнинг қизғин иштирокчиси ўз кучи, ўз меҳнати, ўз ижоди билан ғолиб чиқишга ҳамма вақт эришавермайди.

60-йилларнинг ўрталарида Абдулла Қахҳор билан бўлган сұхбатда атоқли адібимиз 20—30-йилларда 200 дан ортиқ шоир, ёзувчи қалам тебратганини, аммо улардан бармоқ билан санаарли киши адабиёт тарихида из қолдирганини айтиб берганди. Ҳозирда, 70-йилларда уларнинг сони камида 400 га етса кепроқ, бироқ улардан қайси бирининг катта ижод соҳиби даражасига кўтарилишини башорат қилиб айтиш амримаҳол.

Одил Ёқубовнинг 50-йилларда қатор ҳикоялар, қиссалар, драмалари билан танилиб қолгани аниқ, бироқ унинг ўзигина ўз келажаги, истиқболига ишонган ҳолда тиним билмай изланишларини давом эттириш, асардан асарга ўсиш, камолот маррасини эгаллаш зарурлигини англаган бўлиши керак.

Бошқалар-чи? Улар «Тенгдошлар»ни ўқиганда, «Чин муҳаббат», «Айтсан тилим куяди, айтмасам — дилим», «Юрак ёнмоғи керак» пьесаларини Ҳамза номли академик театри мизда томоша қилганларида ҳам Одил Ёқубов 70-йилларга келиб, пешқадам адиллар даражасига кўтарилади, деб ишонмагандир. Жуда кўп деганда баъзилари бўлажак ёзувчига умид билан қарагандир. Негаки, талантлиман деб юрган қаламкашлар баъзан тутаб-тутаб ёнолмай қолади, юзага чиқмай кўздан ғойиб бўладилар. Гоҳида бир карра ёниб, сўнгра дарҳол сўнади. Гоҳида чинакам истеъодд эгаси ҳам инқирозга юз тутади...

Ҳаёт ҳамда ижоднинг жуда кўп синовлари га дош берган истеъодд ўзлигини сақлаб қолади, куч тўплайди, завқ-шавқ, маънавий-руҳий сабоқ берадиган манбага айланади.

«Фарзандлар бурчи»нинг қаҳрамонларидан бири Аҳмаджон Одилов шундай дейди: «Шахсан мен ёзувчи халқидан гина қиласидан жойим йўқ. Бизни кўп ёзишди. Мақтоловлар ҳам жойида. Бундан ортиғи ортиқ. Аммо бит-

та нарсага қойил эмасман-да! Күллар.. худди ҳамма нарса ўзи бўлгандай ёзишади. Шу сабданми, билмадим, ўқигиси келмайди. Нега десангиз, ўзи бўлмаган-да, бу ишлар, акалар! Ҳа, ўзи бўлмаган!»

Шу мулоҳазаларни ёзувчининг меҳнатига, изланиш-интилишларига тадбиқ этиш мумкин: чинакам адаб, чинакам бадиий асар ўзи бўлмайди, юмондан тушгандай осонгина пайдо бўлмайди.

Одил Ёкубов илк изланишлари, дастлабки асарларига қаттиққўллик билан талабчанлини сусайтирган ҳолда баҳо беради: «Мен бу пъесаларни (гап «Чин муҳаббат», «Айтсам тилим кўяди, айтмасам — дилим», «Юрак ёнмоғи керак», «Олма гуллаганда» ва бошқалар ҳақида 'кетяпти — Н. Х.) жудаям ерга уриб юбормоқчи эмасман. Улар ўша пайтларда ёзилган ва ҳозир танқидчилар рўйхатида юрган пъесалардан фарқ қиласа салгинаёқ фарқ қиласар. Лекин бундан менга нима фойда? Мен энди бу асарларнинг савиасини ҳам, қимматини ҳам яхши биламан-ку? Адаб ёши бир жойга борганда орқасига ўгирилиб қарashi, босиб ўтган йўлига бир назар ташлаши, ўз ижодига совуққонлик билан баҳо бера билиши керак, йиллар синовидан ўта оладиган бир иш қила олдими, бирорта ҳақиқий асар яратса олдими, йўқми — лоақал ўзига ўзи ҳисоб бериши керак!»

Ёзувчининг «йиллар синовидан ўта оладиган бир иш қилиши», «лоақал ўзига ўзи ҳисоб бериши»ни англаши учун жуда кўп меҳнат сарфланади.

Одил Ёкубовнинг «Икки муҳаббат» деб номланган ҳикоялар тўпламини қайта ўқиб

чиққанимизда бунга яна бир карра ишонч ҳосил қилдик.

Тўпламга киритилган барча асарлар ҳаёт масалаларини ҳал қилиш нуқтаи назаридан, мавзу жиҳатидан, ҳаётий материалнинг йўналиши, мазмуни жиҳатидан адабиётга бугунги кунда, 70-йилларда кириб келаётган ёш қаламкашларнинг айрим изланишларига ўхшаб кетади: Одил Ёкубов ҳам асосан муҳаббат, оилавий можаролар, интим дунёга мурожаат қилган, қаҳрамонлари кўпинча ёшлардан бўлиб, мустақил яшаш, жамиятда ўзининг ўрнини топиш учун курашади.

«Икки муҳаббат» ҳикоя. Ёзувчининг нима демоқчи эканлиги номидан англашилиб турибди. Дарҳақиқат, Собиржон, ҳикоя қаҳрамони институтда ўқиб юрганида Насиба исмли қизни севиб қолади, лекин қиз йигитнинг қишлоққа кетишини эмас, шаҳарда қолиб олим бўлишини хоҳлайди, нияти амалга ошишига кўзи етмагач, севгисидан воз кечади. Йигит эса колхозга агроном бўлиб ишга жўнайди, тажриба орттиради, обрў қозонади, айни чоқда Маҳбуба исмли муаллимани севиб қолади, иккинчи муҳаббати унга баҳт-саодат, қувонч бағишлиайди.

Иккинчи ҳикояси «Баҳор кунларидан бирда» деб аталиб, унда Раъно ва Раҳимжонларнинг тракторчи бўлиб бирга ишлагани, ўша аснода бир-бирларини ёқтириб қолгани, тўғрироғи, дастлаб йигитнинг қизга совчи қўйгани, қиз эса дабдурустдан рад жавобини бергани, аммо пировардида йигитга ишқи тушиб қолгани сўзланади.

«Тоғ қизи»да — учинчи ҳикояда воқеа тоғдаги чорвадорлар даврасига кўчирилади ва у

ерда биз практикага борган Воҳиджоннинг зоотехник қиз Саодатга ошиқу беқарор бўлиб қолгани, аммо қизнинг бошқа йигит билан аҳду паймон қилиб қўйгани, шунга қарамасдан Воҳиджонга инсоний муомалада бўлганлиги қаламга олинган.

«Янги йил кечаси» деган ҳикоянинг марказида ҳам севги муаммоси туради...

Наарий ташбеҳларида гина эмас, балки саҳна асарларида, жумладан, «Чин муҳаббат», «Олма гуллаганд», «Юрак ёнмоғи керак»да ҳам Одил Ёқубов интим дунёга нигоҳ ташлаб ўтади. Зотан севги ижодда ҳам, ҳаётда ҳам ёзувчи-ю, китобхонни, ҳатто фақат ёшларнигина эмас, баъзан кексаларни ҳам ўз комига тортади, ҳамманинг ҳузур-ҳаловатини олади. Ишқи йўқ кесак деганлари бежиз эмас.

Муҳаббат ҳаёт сингари ранг-баранг, бой, гўзал, мураккаб туйғуки, у ўтмишда ҳам, ҳозирда ҳам, келажакда ҳам сўз санъатининг ўлмас мавзуларидан бири бўлиб қолаверади. Ҳамма гап бу мавзуни ёритишда, бадиий идрок этиш, ўзлаштиришдадир. Борди-ю, ҳар бир қаламкаш уни ўзича, мустақил равишда таҳлилу тадқиқдан ўтказиб, фақат ўзига хос севги оламини кашф этса, ижодий муваффиятга эришади.

Бир қарашда «Икки муҳаббат» тўпламига киритилган ҳикояларда ва илк драматик асарларида Одил Ёқубов кўпроқ бошқа қаламкашларнинг муҳаббат мавзунин ёритишдаги омиллари, воситаларидан фойдалангану, бироқ ўзи мустақил равишда ҳали бирор муҳим нарсани яратишга ултуролмаган, деган таассурот туғилади.

Маълумки, севги гоятда гўзал инсоний,

пинҳоний, ақл билан тушуниб бўлмайдиган мураккаб туйғу бўлиб, уни иқтисодий манфатга бўйсундирилса, фожиали оқибатга олиб келади.

«Икки муҳаббат»даги Насиба шундай фожиани келтириб чиқарувчи шарт-шароитда тарбиялангани учун Собиржоннинг соғ, пок туйғусини қадрлай олмайди, илиқ, самимий муносабат муомаланинг манбаи чинакам инсонийликда эканлигини англаб етмайди, натижада баҳтини поймол қиласди. Қишлоқда туғилиб ўсан, таҳсил кўрган, институтни тамомлаб, яна ўз она қишлоғига ўқитувчи бўлиб келган Маҳбуба Собиржоннинг севгисини, инсонийлигини чин қалбдан ардоқлайди ва мурод-мақсадига эришади.

Қаранг-а, бири оқу, иккинчси қора, бири яхши-ю, иккинчси ёмон, бири тушунади, бири тушунмайди, бири хатога йўл қўяди, иккинчи янгилишмайди, адашмайди..

Ҳаёт мазмунини шу тарзда талқин этиш «Чин муҳаббат», «Айтсам тилим куяди, айтмасам — дилим» пьесаларида учрайди. Фақат ижтимоий воқеалар, меҳнат жараёнигина эмас, балки мантиққа мос тушавермайдиган севги ҳам нуқул «оқу қора», «яхши-ю, ёмон» принципига мувофиқлаштирилади. «Чин муҳаббат»нинг асосий қаҳрамони агроном қиз Муқаддас Олимжонга доимо чигитни квадрат уялаб экиб, пахтанинг янги навини яратишга киришгани учунгина кўнгил қўйган деб таъкидланади. «Олма гуллаганд» пьесасида эса бу борада юксак «чўққи» забт этилади: асар қаҳрамони Машраб: «Дунёда олмага нима етсин? Олмадай гўзал, олмадай фусункор нарса борми? Сиз кулманг, бир кун келадики, бутун жа-

ҳонни ажойиб бир олмазорга айлантирамиз! Ҳатто күчалардаги толтераклар ўрнига ҳам олма экамиз. Иўловчилар шундоқ қўлларини чўзадилару олиб еб кетаверадилар», деб орзу қилади ва орзусини амалга ошириш йўлида ҳамма нарсадан, ҳатто баҳтидан, севгисидан, севгилисидан воз кечади, соф ва пок туйғусини қурбон қилади.

Ҳаётда нималар бўлмайди, кимлар нималардан юз ўгирмайди, нималарнинг илдизига болта урилмайди, дейсиз! Баъзилар гоҳида ўзига ҳам, ўзгаларга ҳам чоҳ қазийди-да, ўзини ҳам, ўзгаларни ҳам ҳалок қилади. Шунга кўра Машрабнинг олма деб севгилисидан воз кечиши ёки меҳнат, ишлаб чиқариш жараёнини муҳаббат, оила турмушидан юксак қўйиши ёки бир-бирини қарама-қарши қутбга йўналтириши мумкин ва шундай ҳодиса учраб туради, лекин бунинг қандай рўй берганини, нима сабабдан бўлганини кўрсатиб, адолат юзасидан баҳолаш зарурки, биз масаланинг шу жиҳатига эътиборингизни жалб этмоқчимиз.

Шунингдек, ҳаётда оқу қора, яхши-ю, ёмон тезда кўзга тушади, дарров нигоҳга илинади, аммо баъзан оқ қорага, яхши ёмонга аралашиб кетишини ҳар ким уқиб олавермайди.

Драматург Машрабни фанга ҳаётини бағишлиган, мақсадига эришиш учун иодир, ноёнб, муқаддас туйғуларини қурбон қилади, ўз ҳузур-ҳаловати, ўз манфаатини ўйламайди, улуғвор вазифаларни амалга оширади деб мақтайди-ю, унинг севгилиси Маъсудага таъна тошларини ёғдиради. Чунки қиз йигитнинг ҳаётдан узоқлашиб, фақат орзу билан яшаётгани, тақдири, севгиси, баҳти учун курашолма-

гани, ниҳоят баҳти, муҳаббатидан ажраб қолгани туфайли азият чекади, изтиробга тушади.

Биз эса Маъсудага ачина бошлаймиз, унинг кечинмаларига шерик бўлишни хоҳлаб қоламиз, унга ҳамкору ҳамдард бўлгимиз келиб кетади. Бунинг боиси шуки, унинг образи анча ҳаётий чиққан. Машраб нуқул олмани ўйлаб, қизга бефарқ бўлиб қолгандан кейин унинг бошқа бирорвга турмушга чиққани, шу билан катта хатога йўл қўйиб, ғам-ғуссаларга «асир» тушгани бизда нафрат қўзғамайди, аксинча, унга хайриҳоҳлигимиз ортади, янгишганига олмапарвар олим сабабчи эканлигини сезиб, муаллиф улуғлаётган қаҳрамонга аталган хурмат ва муҳаббатимизга дарз кетади, қандайдир, ғазаб туйғусига чулғанамиз.

Бундай номутаносиблик муаллиф истагига зид равишда онгиз тарзда келиб чиққан, деб фикр юритишига етарли асос йўқ. Аксинча, Одил Ёқубов қаҳрамон ички дунёсидаги зиддиятли кечинмалар, фикрлар курашини ҳаёт мураккаблиги билан бевосита боғлиқ ҳолда тадқиқ этишга жиддий эътибор бера бошлайди ва бунинг аломатлари «Икки муҳаббат»да ҳам, «Олма гуллаганда» драмасида ҳам кўзга яққолроқ ташланади-ю, бироқ характерлар, образларнинг ғоявий-бадиий асосини белгиламайди, асарга ҳал қилувчи юҳанг, етакчи руҳ бағишиламайди. Аммо аксари асарларида Одил Ёқубов қаҳрамонларнинг у ёки бу хусусиятлари, фазилатлари-ю, қусурларига оид белгиларни моҳирлик билан жонлантиради, инсон, ҳалқ, она юрт тақдирига бевосита алоқадор мулоҳазалари, кузатишларига қалб қўрини, юрак тўлқинларини «пайвандлайди». Натижага

да қиёмига етмаган, ҳали обдан «шиббалаб» сайқал берилмаган ҳикоялари, қиссалари, пъесалари қизиқиши билан ўқиласи, ўқувчига нималарни дидир аинглатади, уни нималардан дидир огоҳлантиради.

«Икки муҳаббат»да инсон самими, соғ туғуси билан меҳнат қилиб донг таратса, севгида ҳам баҳтиёр бўлади, одамни иқтисодий аҳволига қараб эмас, балки қалби, дилига қараб қадрлаш керак, ҳатти-ҳаракатлари, фаолиятига биноан баҳолаш, қадрлаш керак, деган фикр ҳимоя қилинади.

Бу фикр баъзи ўзгартиришлар билан «Чин муҳаббат», «Айтсам тилим куяди, айтмасам — дилим», «Олма гуллаганд» пъесаларида бир оз чуқурлаштирилади, янги кузатишлар билан бойитилади.

«Айтсам тилим куяди, айтмасам — дилим» яна бир жиҳати билан ажралиб туради: бу пъесада оилавий можаролар эмас, балки қишлоқ хўжалигини бошқариш масаласи сюжет асосини ташкил этади. Бундан чиқдики, нознеъматни яратувчи меҳнаткаш инсон эмас, балки ишлаб чиқариш жараёни, аниқроғи, раҳбарлик муаммоси диққат марказига чиқибди, бинобарин, қаҳрамон характери сояда қолибди-ку, дейишингиз мумкин ва шундай деб ўйлаган китобхон бир томондан ҳақ бўлиб чиқади; иқтисоднинг илмий негизини тушунмайдиган, бироқ анча-мунча тажрибага эга бўлган Юсуп колхоз раислигига сайданади, дастлабки пайтларда ёш раис отасининг анъаналарини (ота вафотидан кейин унинг ўрнига ўғил раҳбарликни эгаллаган) давом эттиради, баҳтга қарши, тараққий эттиришга, мустаҳкамлашга эришолмайди, хўжалик аста-секин ну-

рай бошлайди, ниҳоят, ҳалокат ёқасига келиб қолганда коллектив кучи билан лавозимидан олиб ташланади.

Бор-йўқ воқеа шундан иборат. Одил Ёқубов уни бадиий образлар ёрдамида тадқиқ этишга интилади, интилиш натижаси ўлароқ айrim персонажларнинг жонли қиёфаси гавдалантирилади. Бу биринчি галда асар бош қаҳрамони Комилга тааллуқли. У колхоз иқтисодига доир мавзу бўйича кандидатлик диссертацияси устида иш олиб боради, шунинг учун акаси Юсупнинг фаолияти билан танишади, танишиш жараёнида анча нуқсонларни очиб ташлайди. Муаллиф унинг ҳалқ мулки учун жон куйдирганини, меҳнаткашларга ғамхўр бўлганини умуман тўғри кўрсатади.

Одил Ёқубовнинг уч жилдлик танланган асарларининг биринчি жилдига Озод Шарафиддинов «Ижод довонлари оша...» деб номланган сўз боши ёзиб, унда ёзувчининг мустақил адаб сифатида шаклланиши, камолот боссқичини забт этиши, кенг китобхонлар орасида шуҳрат қозониш тўғрисида ибратли мулоҳазаларни ўртага ташлайди. Таниқли танқидчимиз адабнинг илк ижодий изланишлари маҳсулни бўлган бир неча ҳикоялар, қиссалар, пъесаларини назарда тутиб, шундай дейди: «...бу асарлар.. ҳали кўпгина нуқсонларга эга, энг муҳими эса — бадиий асарга жон ато қиласиган чинакам ҳаётийликдан узоқроқ асарлар эди».

Бу фикрга умуман қўшилганимиз ҳолда шунни алоҳида таъқидлашимиз лозим: деярли ҳар бир ҳикоясида, қисса-ю, пъесасида чинакам ҳаётийлик белгилари, аломатлари мавжуд эдики, улар Одил Ёқубовнинг келгусидаги

ижодий камолоти учун мустаҳкам замин вазифасини ўтади.

Ижодкор қанчалик зўр истеъдодга эга бўлмасин, у муайян адабий-ижтимоий муҳит, шарт-шароит тақозосига мувофиқ иш кўради. Агар истеъдод ўз қудратини намойиш қилиб, замон талабларйни тўла адо этиб, давр тараққиётни даражасидан ўзиб кетса, катта бадиий кашфийтлар яратади. Борди-ю, юксак натижаларга эришмаса, тарихий заруратдан келиб чиқсан барча чигалликлар, қийинчиликларни бартараф этолмаса, у ўз бурчини муваффақиятли бажаролмайди.

Бундан кўриниб турибдикি, Одил Ёқубов бошқа қаламкашлар сингари ўз даври, ўз замонасинг яхши-ю, ёмон, ижобий ва салбий воқеаларининг ичиди бўлади, якка ўзи муҳитни ёриб чиқиб кетолмайди, муҳит эса 50-йилларда асосан ўша машъум «конфликтсизлик назарияси»нинг таъсирида эди.

60-йилларнинг бошигача Одил Ёқубов истеъоди «ярқ» этиб кўринган етук, баркамол асарларни яратмади ҳисоб, бироқ нимаини ёзса, барчаси мутлақо изсиз йўқолиб кетмади, ижодий парвозларни ҳозирлашга хизмат қилди, бадиий тафаккурини бойитишга йўналтирилди.

ПАРВОЗ ДАВОМ ЭТАДИ

Айрим истеъодод соҳиблари ҳақида: у бирданига ёзувчи, санъаткор бўлиб туғилди, ёшлик изланишлари, тажрібасизлик, улгайиш даври дегани нима эканлигини билмади, дастлабки асарлари биланоқ талантини намойиш

қилди, деган гаплар юради ва улар буюк истеъдодларга нисбатан тўғри қўлланилади. Чунончи, Лев Толстой ёки Михаил Шолохов ижод майдонига баркамол адиллардай дадил кириб келган. Абдулла Қодирий ҳажвий ҳикоялар билан бир қаторда «Ўтган кунлар» дай йирик асарини ёзиб, Ойбек дастлаб назмага, кейин насрга қўл ўриб, «Қутлуғ қон»ни қойиллатиб, Абдулла Қаҳҳор «Анор», «Ўғри», «Бемор» ҳикоялари билан янги олам кашф этиб, камолотга эришган.

Бадиий ижод оламига отилиб кириб, ҳар тарафга машъалдай нур сочиш ҳаммага ҳам насиб қиласвермайди. Бир хил қаламкашлар бир неча йиллар давомида қийналиб-қийналиб кўп тўсиқларни бартараф этгандан кейин ловиллаб «ёнади», истеъодод меваларини тақдим этади. Бошқа бир тоифадаги ҳаваскорлар эса тутаб-тутаб ўз-ўзидан ғойиб бўлади, лекин муҳитни булғаб, бузиб кетади ва бу эса бошқа истеъодод эгаларининг ўсиб-унишига салбий таъсири кўрсатади.

Одил Ёқубов мана шуларнинг ҳам жабрини тортиб, шуларнинг таъсирини йўқотишига қанча-қанча куч ҳамда имкониятларини сарфлади. Зотан адабий жараёнда асл истеъдодлар ижодий мусобақага киришади, бир-бирларининг юзага чиқиши учун ёрдам қўлини чўзади, айни чоқда қобилиятсиз, талантсиз қаламкашлар билан тинмай кураш олиб боради, курашда ғолиб чиқиш эса ўз-ўзидан бўлмайди.

Бу курашнинг истеъдодлар фойдасига ҳал бўлиши кўп жиҳатдан ижтимоий-сиёсий вазиятга ҳам боғлиқки, бундан кўз юмиш мумкин эмас. Зотан ижтимоий-сиёсий вазият ўз нав-

батида, маданият ва адабиёт тараққиётига бориб боғланган бўлади.

Партия XX съездининг тарихий қарорларида 40-йилларнинг охирида ва 50-йилларда, ундан олдинги пайтларда ҳам давлатни бошқаришининг ленинча принциплари гоҳо-гоҳо бузилиб турганилиги, эндиликда доҳий таълимомтига асосланган қонунчилигимиз ҳаётнинг барча жабҳаларида ҳукмронлик қилишига монеълик кўрсатадиган тўсиқлар илдизи билан қирқиб ташланганлиги алоҳида таъкидланди.

50-йилларнинг иккинчи ярмидан 60-йилларнинг бошигача бўлган даврда маънавий-маданий турмушнинг барча соҳаларида жиддий ўзгаришлар, катта кўтарилишлар руҳи кезиб юрди ва бу руҳ бадиий ижоднинг юксалишига самарали таъсир кўрсатди. Биргина ўзбек насрчилигида «Синчалак», «Бўрондан кучли», «Уч илдиз» сингари асарлар пайдо бўлдики, улардаги ҳаётнийлик, ҳаққонийлик шабадаси «Муқаддас» қиссасининг ёзилишига ҳам туртки берди, деб айтиш мумкин.

Бу «Муқаддас» қиссасининг ёзилишини изоҳловчи объектив шарт-шароитdir. Лекин масаланинг субъектив жиҳати борки, буни эътибордан соқит қилиш ярамайди. Гап ҳар бир истеъодод соҳибининг ўз куч-қудратидан ижод жараёнда оқилона фойдаланиши тўғрисида кетаётir.

Халқнинг бадиий-эстетик маҳсулотга, ижод меваларига талаби, эҳтиёжи ҳеч қачон сусайган эмас, сусаймайди. Аксинча, бу талаб ва эҳтиёж доимо ўсиб боради, лекин шунга ярши баркамол асарлар яратадиган чинакам истеъодлар ҳамма вақт ўз бурчи, ўз вазифасини қойиллатиб, бадиий қашфиётлар ҳада

этавермайди, ҳада этишга тайёр бўлавермайди. Чунки биринчидан, қалам соҳибларининг барчаси ҳам истеъододли бўлавермайди, иккинчидан, истеъоддилари ҳам доимо талантiga содиқ қолган ҳолда ижод қилавермайди.

Энди тасаввур қилингки, Одил Ёқубов ўн йиллар мобайнida гоҳо хато қилмай, гоҳ янгилишиб ижод довонларида изланиб юрди-ю, бир неча бор «қоқилиб» кетди, диққатни жалб этган асарлар битса-да, қашфиётлар яратолмади. Бундан кейин у янги куч, янги шижаат билан қалам тебратишга ожизлик қилиб қолмасмикинман, деб иккиланиб, чор-ночор ҳолда қанчалар эзилмаган, қийналмаган дейсиз!

Мана шундай вазиятда «Муқаддас»дай асарнинг дунёга келиши Одил Ёқубов ижодида, қолаверса адабиётимизда муҳим воқеа бўлди.

Бу қиссанинг таъсир қути қанчалик зўрлигини тасаввур қилишингиз учун кичкина бир фактга эътиборингизни жалб қилмоқчиман. Камина дарс берадиган ТошДУнинг филология факультетида имтиҳон олаётганимизда бўлғуси талабаларимиздан бири «Муқаддас»ни ёд олганини айтиб қолди ва кўз олдимизда қиссани ёдаки ўқий бошлади...

Шеърни ёддан ўқиганда ҳеч ким ажабланмайди. Лекин насрни ёддан ўқиши... Яна ҳикоя ёки новеллани эмас, қиссани, яхлит қиссани хотирада сақлаш... Буни удалаш анча қийин ва мураккаб, аммо ёд ўқишига истеъодди зўр бўлган одам бу мураккабликни, қийинчиликни бартараф этади, дейишингиз мумкин. Ҳа, бартараф этади, бироқ ёддан ўқиши кўп жиҳатдан асарнинг сифатига ҳам боғлиқ.

«Муқаддас»да шундай сеҳр, жозиба бор

Эканки, у китобхон қалбини тўлқинлантирибди, юрагини жизиллатибди, пировардида хотирасига маҳкам ўрнашиб қолибди, асар таъсирчанлигининг сири ёзувчи истеъодидига, шижоатига боғликдирки, буни «Икки муҳаббат», «Олма гуллаганд», «Чин муҳаббат»ларда кўрганимиз, бироқ у «Муқаддас»да ўзини тўла намойиш қилди. Натижада қалб қалбга, юрак юракка туташгандай кучли тебранишлар, тўлқинланишлар ҳосил бўлди.

Туйгулар, кечинмалар оқимини қофозга тушириш, уларга жон ато қилиш ўзига хос мўъжизадир, бироқ бу туйгулар, кечинмаларнинг ҳаётдаги манбаи, салмофи, қадр-қимматига кўра ўша мўъжизанинг аҳамияти белгиланади.

Агар «Муқаддас»нинг ижтимоий салмофи юксак бўлмаса, кўплаб юракларни тўлқинлантирганига қарамасдан, тезда хотирадан кўтарилиб, изсиз йўқолиб кетиши мумкин эди. Одил Ёқубов шунга эришганки, шахсий кечинмалар, шахсий манфаатлар замирида яшириниб ётган жамият миёсида катта аҳамият касб этган фоя ҳаққоний образларда гавдаланади.

Қисса қаҳрамони Шариф ўнинчини битириб ўқишга киролмайди, конкурсдан ийқилади. Заводда бир йил ишлагандан кейин, «институтга имтиҳон топшириб кўр, кира олсанг, яхши, кира олмасаңг, сендан нима кетади», деган маслаҳатга биноан ҳаракат қиласди. Тўғрироғи, ҳаракат қилишга бир муҳим нарса мажбурлайди: ҳужжатларни топширмасданоқ «разведка» учун институтга борганда бир қизни учратади-ю, унга мубтало бўлиб қолади.

Қиссада шунга урғу бериб бориладики, Шариф ҳали шахс сифатида мустақил дунё-қарашга эга эмас, бинобарин, унинг оиладаги, ижтимоий муҳитдати хатти-ҳаракатлари, бутун фаолияти катта мақсадга, улуғвор эътиқодга бўйсундирилмаган, у шахс сифатида тўла шаклланиб етмаган, турмуш оқимида беихтиёр «сузиб» юради, кемани ўзи бошқаришга қодир эмас. Шунинг учун йигит илк бор институтга киролмай қолганига ҳам, жамиятда ўзига мустақил ўрин тополмаганига ҳам куйинмайди, қандайдир лоқайдлик билан яшайди, заводга ишга киргандан кейингина келажак тўғрисида ўйлай бошлияди.

Ёзувчининг махсус изоҳларисиз шу нарса англашилиб турадики, Шариф жамиятимизда яқкаланиб қолган шахс эмас, балки у кўпчилик ёшларнинг хусусиятларини ўзида музассамлаштиради. Олтмишинчи йиллардагина эмас, балки ҳозирги кунларда, 70-йилларнинг иккинчи ярмида ҳам Шариф сингари ёшлар оз эмас.

Ёзувчи Шариф тимсолида бир гуруҳ ёшларнинг тили-ю, дилида қайнаб ётган туйгулар, кечинмаларни моҳирлик билан илғаб олиб, жонли манзараларда жилолантиради.

Шунга диққатимиз жалб этилди: Шариф кўпинча воқеалар ичидаги оқиб кетаверади-ю, ўзлигини, асл қиёфасини ошкора намойиш қиласвермайди. Фикрлар оқимининг тасвиридан англашиладики, йигит Муқаддасга талпинади, унга эргашиб институтга қадам қўяди, ҳужжат топширади, имтиҳонларга тайёр гарлик кўради. Демак, у севги туфайлигина олий маълумот олишга рози бўлади, яъни

шахсий манфаатини кўзлайди. Ахир, бу худбиналиқ эмасми?

Қисса босилиб чиқиши билан Шариф худбиналиги ҳақидаги фикрлар баён этилди:

«Асаддаги бош масала,— деб ёзган эди ўша пайтда Матёқуб Қўшжонов,— худбиналиқ йўлига туша бошлаган бир йигитнинг тўғри йўлга қайтиши масаласидир. Жамиятимиз ўз табиати, социал моҳияти билан руҳан соғлом кишилар жамиятидир. Повестнинг бош қаҳрамони Шарифжон ўз табиати билан худбиналиқ эмас. Аммо Шариф шундай бир шароитга тушиб қоладики, у ўзида худбиналиқ пайдо бўлганини онгли равишда ўзи сезмай қолади. Бошқача қилиб айтганда. Шарифдаги бу хусусият маълум бир ҳаёт шароитнинг маҳсулӣ бўлади».

Бу мулоҳазалар шу маънода тўғрики, Шариф ўзи истамаган ҳолда бошқа бирорнинг, сўнгра маълум бўлишича, ўз севгилиснинг институтдаги ўринини эгаллайди, билими, куч-қудрати билан эмас, балки адолатсизлик орқали эгаллайди (иншони хуфиёна кўчириб, баҳосини таниш-билиш орқали оширади) оқибатда қабиҳлик кўчасига кирганлигини сезиб қолади.

Ўз манфаати йўлида курашмаган, меҳнат қилмаган одам маънавий-моддий жиҳатдан баркамол бўлолмайди. Зотан коммунизм қуриш учун биз биринчи навбатда ҳар жиҳатдан камолотга эришган етук қаҳрамонни тарбиялаб етиштирмоғимиз лозим. Борди-ю, ўзи униб-ўсиши учун ўзгаларнинг манфаатини поймол қилса, ўзгаларнинг бахтсизлигидан ўз иқболи учун фойдаланса, ўзим бўлай, бошқалар қуриб кетсин. деб ўйласа, ҳаракат қил-

са, хиёнатга олиб борадиган худбиналиқ келиб чиқади.

Шариф дастлабки пайтларда ҳам, ҳатто воқеалар ривожининг охирги нуқталарида ҳам мана шундай худбиналиқка юз тутганлигини билмайди, билиб қолгандан кейин эса фойибдан келган баҳтдан воз кечади, институтни тарк этади.

Бу ўзига хос жасорат бўлиб, кўпчиликнинг олқишига сазовордир. Ҳудди шу жасорати учун Шарифнинг ўзи хоҳламаган ҳолда онгсиз равища йўл қўйган нуқсонлари кечирилади, чин инсон сифатида ардоқланади. Ўқувчи қаҳрамонни қораламайди, унга ачинади, мәрдлик кўрсатиб, адолат тантанаси учун курашчига айланганда эса йигитга ҳурматимиз ошади.

«Биз бутун қисса давомида,— деб уқдиради Озод Шарафиддинов,— қалбимизда Шарифга нисбатан илиқ бир меҳр, хайриҳоҳлик ҳислари жўш ураётганини сезиб турамиз. Шунинг учун Шарифнинг адашишларини кўргандада қаттиқ афсусланамиз, изтиробга тушамиз».

Ўз ҳатти-ҳаракатлари, қилмичлари тўғрисида Шарифнинг ўзи шундай хуносага кела-ди: «Менинг ҳеч кимни айблашга ҳақим йўқ эди! Ҳаммасига ёлғиз ўзим айбордor эдим. Бу нарсага ўз инсофисизлигим, сабрсизлигим, иродасизлигим сабаб бўлди! Бўлмаса, бир йил ишлаб шунча ҳурмат орттирган, ҳунар ўргангандан заводни шундай ташлаб кетармидим? У ерда орттирган шунча дўстларимдан шундай осонгина юз ўгиармидим? Мен тенги йигитлар ҳам ишлаб, ҳам ўқиб, қийинчиликлар билан олишиб, улар устидан ғалаба қозониб юрган бир пайтда мен севгилимнинг жойини тор-

тиб олиб, бундай шарманда бўлиб қолармидим?»

Диққат қилинса, қаҳрамон ўз гуноҳини ошириб-тошириб кўрсатаётганлиги, ўзини ўзи ҳаддан ортиқ даражада жазолаётганлиги, айбни фақат ўзининг елкасига олиб, бошқа гуноҳкорларни сояда қолдираётгани сезилади. Муаллиф ҳам, айrim мұнаққидлар ҳам бунга мойиллик билдираётгандай бўлади. Аслида эса бу қисман тўғри бўлиб, айбнинг бир қисми Шарифнинг теварак-атрофидагиларга, музайян шарт-шароитга, муҳитга тааллуқли.

«Муқаддас»да мана шу муҳит ҳаёт ҳақиқатига асосланган ҳолда ишонарли тасвирлаган, деб бўлмайди. Бундай қусур Одил Ёқубовнинг бошқа асарларига, хусусан «Ларза», «Бир фельетон қиссаси», «Тилла узук», «Матлуба» қиссаларига ҳам у ёки бу даражада тегишлидир.

«Муқаддас» қиссасига жозиба бахш этган, уни ўша йиллардаги адабий ҳаётда салмоқли воқеа даражасига кўтарган, китобхонлар оммасининг меҳрини қозонишига сабаб бўлган нарса шуки, адаб эҳтиорсиз, лоқайд баёнчилик ролидан воз кечиб, тасвирланаётган воқеаларнинг моҳиятини тадқиқ қилиш йўлидан боради ва бунинг натижаси ўлароқ муҳим ҳаётий проблемаларни ўртага ташлайди».

Озод Шарафиддиновнинг бу фикри умуман тўғри бўлиб, кўп жиҳатдан фақат қаҳрамонлар тақдирига нисбатан қўлланилса, ўзини оқлади. Муҳитнинг, қаҳрамон яшайдиган, ҳаракат қиласиган шарт-шароитнинг ифодасида эса ёзувчи тадқиқ-таҳлилни баёнчилик билан алмаштиради, тасвирланиши лозим бўлган воқеаларни изоҳлаб, шарҳлаб беришдан

нарига ўтмайди. Бундай изоҳлар, шарҳлар «Излайман» қиссасидан кўпроқ ўрин эгалаган.

«Бу повестда,— деб ёзган эди ИброҳимFaфуров,— ақлни шоширадиган фавқулодда сюжет ҳаракатлари йўқ. У ўтган урушда янграган сўнгги тўп садолари, сўнгги тиккайган қабрлар, ўтилган сўнгги машаққатли йўллар. Бу йўлларда ўлғайган, матонат орттирган кишилар ҳақида ҳикоя қилинади». «Излайман»да,— деб давом эттиради фикрини танқидчи,— ўн бешга қадар (ўртача повесть учун сон жиҳатдан кўпроқ) қаҳрамоннинг бўлишига қарамасдан уларнинг деярли барчаси ўзининг характерли белгилари, жонли чизиқлари билан ажralиб туради».

Борди-ю, мана шу «ўзининг характерли белгилари, жонли чизиқлари билан ажralиб турадиган» қаҳрамонларга Одил Ёқубов искеъоддли адаб сифатида қандай янгилик, қандай оригиналлик бахш этди, деган савол тушса унга «Излайман»дан ижобий жавобни тошиб бериш амримаҳол.

Қиссанинг бош қаҳрамони Даврон Фозиев тадбиркор, моҳир, чин инсоний хусусиятлари билан ҳамманинг ҳурмату муҳаббатига сазовор бўлган лашкарбоши — командир, комбат сифатида ҳадеб таърифланаверади, таърифланаверади, бироқ бу таърифнинг ички моҳияти қисман ёритилади, холос.

«Бир фельетон қиссаси»даги Салтанат тўғрисида ҳам шундай дейишга тўғри келади. Чунки бу асаддаги услугуб «Излайман»даги услугуга жуда ўҳшаб кетади; ҳар иккала ўринда ёзувчи қаҳрамонларни ташки жиҳатдан характерлайди, улар тўғрисида бошқа персо-

на жларнинг — воқеаларни ҳикоя қилувчиларнинг мулоҳазаларини баён қиласди. Шунга қарамасдан «Бир фельетон қиссаси» «Излайман»га нисбатан ёрқинроқ, салмоқлироқ, мазмунлироқ бўлиб чиққан. Бунинг боиси шундаки, унда воқеаларни ҳикоя қилувчи вазифасини бажарадиган журналист Учқун мустақил ҳаёти, мустақил дунёқараши, мустақил характери билан диққатимизни жалб этади. «Излайман»даги Мансуржон эса ўз характерининг айрим қирраларини, айрим белгиларинигина ошкор этади, яхлит образ, яхлит тип даражасига кўтарила олмаган.

Қизиги шуки, «Излайман» «Бир фельетон қиссаси» ва «Ларза»дан кейин ёзилди. Тағин бир-икки йил эмас, балки етти-саккиз йил вақт ўтгандан кейин ёзилди.

Мантиққа кўра дастлабки асарлар эмас, балки сўнгра ёзилганлари баркамолроқ, ҳаёттироқ бўлиб чиқиши зарур, деб ўйлаймиз ва бальзан шундай бўлиб туради. Бироқ ижод билан ҳаёт орасида гоҳида номутаносиблик рўй беради. Бунга ажабланмаслик керак. «Қутлуг қон» ва «Навоий» сингари адабиётимизнинг хазинасига бебаҳо бойлик бўлиб кирган романлардан кейин Ойбек бир қанча фазилатлардан холи бўлмаган, бироқ адабиётда катта воқеа даражасига кўтарила олмаган «Олтин водийдан шабадалар» ёки «Улуғ йўл» асарларини ҳадя этди, сўнгра «Болалик»дай ажойиб қиссасини яратди. Абдулла Қаҳҳор эса «Сароб» романи, «Анор», «Ўғри», «Бемор» ҳикоялари каби ноёб дурдоналардан кейин анча мазмунли бўлган, аммо бадиий кашфиёт даражасига кўтарила олмаган «Қўшчинор чироқ»ларини берди...

Баъзан шундай ҳам бўлиши мумкинки, ёзувчи асардан асарга муттасил ўсиб боради, маҳорат чўққиларини эгаллайверади, орқага эмас, доимо олға илгарилайверади.

Ижодий йўлининг қандай бўлиши ҳар бир ижодкорнинг изланиш-интилишлари, муайян адабий муҳит, шарт-шароитга боғлиқ. Чунончи, жаҳон миқёсида шуҳрат қозонган Чингиз Айтматов ижод довонларини узлуксиз равишда забт этиб, кетма-кет мисли кўрилмаган ютуқларга эришаверди. «Оқ кема»га қадар у нимаики ёзган бўлса, барчаси шундай таассурот туғдиради. Бироқ «Оқ кема»дан кейин китобхонларга ҳавола қилинган «Эрта учган турналар» («Ранние журавли») қиссаси ҳаммамизга манзур бўлса-да, буюк адаб истеъодини ҳамойиш қилиб турса-да, Чингиз Айтматовнинг олдинги асарларидай жуда катта воқеа бўлиб эл оғзига тушмаганлигини кўп танидчилар эътироф этди.

Хуллас, ижод йўли бир текис эмас, у ҳамма вақт равон бўлавермайди, гоҳида зафарлар зафарларга уланиб кетади, бальзан мувваффақиятсизликларга юз тутилади...

«Муқаддас»дан кейин Одил Еқубов жуда кўп қиссалар, ҳикоялар ёзди, уларнинг деярли барчаси кенг китобхонлар оммасининг диққатини жалб этди. Муҳаббат, интим дунё сирларини тадқиқ этишга бағишлиланган «Тилла узук», «Матлуба» шулар жумласидандир. Гарчи улар «шов-шув»ларга сабаб бўлмасада, ёшларни қизиқтирадиган маънавий-ахлоқий муаммоларни ҳал қилишга кўмак берди. Севгидаги софлик, самимийлик, покликни улуфлади, оила қуришда етти ўйлаб бир кесиш керак, деган қоидага асосланиб иш кўриш лоларини берди...

зимлигини уқдири, ҳар ким ёз бахти, муҳаббатининг тантанаси учун кураш олиб бориши лозимлигини уқтири.

Тўғри, бу асарларда интим дунё чигалликлари, гўзаллиги-ю, завқ-шавқлари ишонарли тасвирланса-да, инсон оиласа бахтиёр бўлиши учун ижтимоий ҳаёт, жамият тараққиётига қандайдир «ип»лар билан боғланган ҳолда иш олиб боришга мажбур эканлиги кенг миқёсда чуқур ёритилмади. Бошқача қилиб айтганда, севги, оила, интим дунё муаммолари ижтимоий тараққиёт чигалликлари, мураккабликлари, зиддиятлари билан боғлиқ ҳолда тадқиқ этилса, бу мавзуда янгилик яратиш, шуҳрат қозонадиган салмоқли асарлар ёзиш мумкини, буни Одил Ёқубов «Қанот жуфт бўлади» қиссасида исботлади.

ЕТУКЛИК МЕВАЛАРИ

Қуёш ҳаммага баб-баравар нур сочади, аммо нимаики унинг шарофати, саҳоватидан фойдаланса, шунинг барчаси ноёб ва нодир бўлавермайди. Инсон-чи? Гарчи туғилганида қанчалик беғубор, мўътабар бўлмасин, ҳаёт оқимиға тушгач, у мураккаблашиб қолади. Лекин шуниси ҳаққи, одамзод ҳар қандай шароитда ҳам инсонийлигини сақлаб қолади: инсонийлик «миқдори» бирида озоқ, бирида кўпроқ бўлиши мумкин, холос. Шундай экан, эл-юртига, халқига хиёнат қиласиган айрим шахслар қандай пайдо бўлади? Жамиятнинг барча аъзолари офтобдай ҳароратли ва ёғдули ҳаёт учун тер тўкмайдими, курашмайдими?

Одил Ёқубов асарларини ўқиганда беихтиёр шу хил муаммолар устида бош қотира

бошлайсиз. Наҳотки шундай бўлса? Ахир, ваҳшийлашиб кетган кимсалар ҳаётини тадқиқ этишини ёзувчи бирорта асарида ўзининг асосий мақсади қилиб қўймаган-ку?! Айтайлик, «Муқаддас»даги Шариф ёки «Бир фельетон қиссаси»даги Учқун, ёхуд «Ларза»даги Мутални ўшалар қаторига киритиш мумкинми?

Йўқ, Одил Ёқубов муайян сабабларга кўра янглишган, хатоларга йўл қўйган, характеристида ҳар хил иллатлар, маразлар пайдо бўла бошлаган, аммо инсонийликни бутунлай йўқотмаган шахслар ҳаёти билан қизиқади.

Шу жиҳатдан, айниқса, «Қанот жуфт бўлади» қиссаси алоҳида ажралиб туради. Лекин нималари билан? Аввало шуки, унда ёзувчининг олдинги асарларидаги ғоявий-бадиий йўналиш изчиллик билан давом эттирилади, айни чоқда янги кузатишлар, янги фикрлар билан бойитилади. Чиндан ҳам шундаймикин? Ахир бир қарашда «Қанот жуфт бўлади» жўн асарга ўхшайди-ку? Ҳа, юзаки қараганда муҳаббат, оиласа доир можаролар, меъморчилик, қишлоқ қурилиши, қишлоқ хўжалиги ҳақидаги тортишувлар қаламга олинган асарлардан фарқланмайдигандай бўлиб туюлади. Аслида-чи? Аслида Одил Ёқубов анъанавий бўлиб кўринган муаммоларга мустақил ёндашади, уларнинг ижтимоий моҳиятини ёритишга алоҳида эътибор беради. Энг муҳими, чуқур ҳаётий асосга суюнади. Асар қаҳрамонларидан бирининг қўйидаги сўзлари фикримизни тасдиқлаётгандай жаранглайди: «Гапнинг қисқаси конфликтни кучайтириш керак демоқчилиз. Шунақами?.. Буни биз ҳам биламиз. Лекин... кино — китоб эмас. У экранга чиққунча ўнта чиғириқдан ўтади. Воқеани сал кескинлаш

тирсангиз, ҳаёт ҳақида заррача тасаввuri бўлмаган баъзи танқидчилар турмушда бундай бўлиши мумкин эмас деб сизга ақл ўргатишади!»

Бу мулоҳазалар фақат қаҳрамоннинг ўзига тегишли эмас. Уларни ёзувчи бутун вужуди билан қўллаб-қувватлайди. Аммо у қаҳрамоннинг ҳамма фикрига хайриҳоҳми? Чунончи, «кино — китоб эмас», у кўп чиғириқлардан ўтади, томошабинга бориб етгунча ҳар хил синовларга дош бериши керак, деган фикр фильм билан бадиий асарни бир-бирига қарама-қарши қўймайдими? Шундай бўлса, буни маъқуллаш мумкинми? Бундан ташқари, конфликтни кучайтириш, ҳаётнинг барча чигалликларини ёритиш, ҳақиқатни ҳимоя қилиш борасида кино ҳам муштарак вазифаларни бажаради-ку? Бинобарин, уларнинг иккаласи ҳам «ҳаёт ҳақида заррача тасаввuri бўлмаган баъзи танқидчилар» талабини рад этади ва ўзига хос воситалар, ўзига хос тасвир-тавсиф орқали турмуш воқеаларининг моҳиятини очиб ташлайди, маразлар устидан аёвсиз ҳукм чиқарди, юксак мақсадлар учун хизмат қиласди. Буни «Қанот жуфт бўлади»нинг ўзи тўла тасдиқлайди. Негаки, у қаҳрамонлар кураши, фикрлар «жанг»ни силлиқлаштириб кўрсатишга тарафдор бўлган айrim танқидчиларга қақшатқич зарба бўлади. Лекин аصار кимлар биландир баҳслашиб, кимлар ингдир янгилиш қарашини рад этиш учунгина ёзилмаган. Тўгрироги, ёзувчи диди паст ўқувчилар ёхуд айrim танқидчилар билан гойибона баҳсга киришар экан, қаҳрамонларнинг маънавий-иқтисодий камолот учун қурашини кўрсатишга бел боғлади. Қиссанинг кучли эҳтирос, дард, ҳис-

ҳаяжонга йўғрилгани бежиз эмас. Энг муҳими, ёзувчи айтмоқчи бўлган гап қаҳрамонлар фаолиятига, хатти-ҳаракатларига «едириб» юборилади.

Асар тугунини оилавий можаро ташкил этади: ноўрин «шўхлик» қилган хотинини эри икки тарсаки билан «мукофотлайди!» Мана шу воқеа қаҳрамонлар тақдиридаги муҳим ўзгаришларга туртки қилиб кўрсатиладики, бунга ҳеч ким эътиroz билдиримаса керак. Аммо ҳаётими? Бизни сўзсиз ишонтирадими?

Тасаввур қилингки, аломат хотинингиз бор, уни еру кўкка ишонмайсиз, чунки бутун вужудингиз билан севасиз, лекин у ўзича мустақил ҳаракат қилиб, зиёфатга сизсиз ташриф буюради, у ерда ҳар хил қилиқлар қиласди, меъёридан ошириб ҳазиллашади, рақс тушади, буларнинг барчасини ўз кўзингиз билан кўрасиз (бу зиёфатга сиз ҳам тасодифан бориб қолгансиз), унинг бежо ҳаракатларига чек қўймоқчи бўлиб, уйга олиб кетмоқчи бўлганингизда «намойиш» қилиб ўша жойда қолиб кетади. Сиз эса тарвузингиз қўлтингиздан тушгандай уйга қайтасиз. Аввалига бу унчалик таъсири кўрсатмаслиги мумкин, лекин бора-бора кимдир бутун аъзойи-баданингизни ўтмас арпа билан арралаётгандай бўлади, кўз олдингиз қоронғилашиб кетади, ўзингизни икки ўт ўртасида тургандай ҳис қиласиз. Ахир, кўзингизга тўтиё қилиб юрган энг қадрдон кишининг томонидан таҳқирландингиз-ку!

«Қанот жуфт бўлади»даги Акрамда тахминан шундай ҳолат рўй беради ва ўзининг

оёғости қилингани учун хотинига икки тарсаки туширадиқи, буни бир жиҳатдан түғри деб ҳисоблагинг келиб кетади. Бироқ хотин кишига құл күтариш яхшими?

Ха, яхши әмас. Ёзувчи буни инкор қилмайди. Лекин асосий айб әрнинг гарданига юкланди. Нима учун? Чунки Акрам дағал, қўпол, у қўрслик қилди, дейди адиб. Бунга умуман раддия бериш қийин. Аммо фақат қўрс, қўпол одам хотинига қўл кўтарадими? Жаҳл келиб, ақл қочганда баъзан босиқ, юмшоқ табиатли мўмин одам ҳам дағаллик қилиши мумкин-ку!

Қиссада масаланинг бу томонига етарли эътибор берилмайди. Бироқ шуниси яхшики, ёзувчи қўрслик, дағалликнинг илдизлари, сабабларини ахтаради.

Маълум бўлишича, ҳамма гап Акрамнинг қишлоқлигига экан: «Акрам рашк қилишга асос йўқлигига, умуман бунинг ҳаммаси шунчаки бир ҳазил эканига ақли етиб турса-да, минг қилса ҳам қишлоқдан чиққан одам әмасми, унга бу чинакам музика, танца, айниқса, хотини билан Шавкатжоннинг бир-бирига муқом қилиб қийшанглашлари шунчалик хуңук ва бачканга туюлдиди, столни бир тепиб туриб кетгиси келди».

Наҳотки, фақат қишлоқдан чиққан одам рашк қилса? Наҳотки, шаҳарлик эрлар хотининг бегона киши билан муқом қилиб туришидан роҳатланса, бунга мутлақо бефарқ қараса?

Тўғри, қишлоқда хотин-қизлар билан эр-каклар, йигитлар муносабатига жиддийроқ қаралади, улардаги эркинлик шаҳардагиларникига нисбатан бир оз чеклаб қўйилган бўлади, ёзувчи шунга ургу беряпти, аммо

бу уларнинг қўпполлиги билан изоҳланадими? Умуман фақат қишлоқдагиларни қўпол дейиш тўғри бўлармикан?

Қўпполлар фақат қишлоқда әмас, балки шаҳарда ҳам топиладики, буни Одил Ёқубов инкор қилмаса керак. Аммо шунга қарамасдан «Қанот жуфт бўлади» қаҳрамони ўзига ҳадеб дакки бераверганини маъқуллагандай бўлади: «Акрам... ўзидан гижинди: **«Қишлоқи!»** «Унинг бу дағаллиги, аразчилиги қачон қолар экан?» «Илгари Акрамни қизига номуносиб деб ич-ичидан зил кетиб юрган Мавжуда холага Сайёрадаги бу ўзгариш дам хуш ёқар, Акрамни ўйлаб: «Баттар бўлсин бу **қишлоқи!**» деб гижинар, дам ҳозирги ёш қизлар тўгрисидаги миш-мишлар эсига тушиб кетиб, юраги шувиллар эди. Айни замонда гарчанд Сайёра **«Қишлоқининг»** адабини бериб қўйишини истаса ҳам, лекин ундан ажраб, бошқа эр қилишини кўз олдига келтиролмас эди».

Акрам ҳам, унинг қайнанаси ҳам шундай фикрлайди, қишлоқликтин қоралайди деб айтайлик, аммо муаллиф уларнинг ҳар иккаласига бирдай муносабатда бўлиши, уларни бирдай қўллаб-қувватлаши инсофданми?! Ваҳоланки, Одил Ёқубов ўта рашкчилик негадир фақат қишлоқ аҳлига хос бўлади, дегандай мулоҳаза юритади. Бу фақат Акрам билан Сайёра интим ҳаётидаги можаронинг ифодасидагина әмас, балки Содиқвой билан Нортожи хатти-ҳаракатларининг тасвирида ҳам кўзга яққол ташланади.

Содиқвой хотинини шу даражада қизғанадики, чанг йўқ ердан чанг чиқаради, сичқондан фил ясайди. Оқибатда хотинини пичоклаб қўядики, буни на ҳақиқат, на муҳаббат,

на инсонийлик тақозо қиласы. Лекин уңдаги рашк үз мұхаббатини, вафодорликни күз қорачигидай ҳимоя қилишга интилишдан пайдо бўлмаганми? Ахир, у хотинини ихтиёрий равишда сўйиб ташлайдиган каллакесар эмас-ку!

Йўқ, ёзувчи унинг қонхўр эмаслигини эътироф қиласы, лекин шунга қарамасдан Содиқвой хатти-ҳаракатлари қандайдир мараз, қабиҳлик рамзи сифатида талқин этилади. Бироқ чуқурроқ ўйлаб қаралса, вазият бошқачароқ эканлиги уқиласы. Чунончи, Содиқвой нима учун хотинини пичоқлади?

Англашиладики, унинг хотини Ҳамида бир пайтлар Акрамга кўнгил қўйган, уларнинг севги тарихи бутун қишлоққа достон бўлган. Бинобарин, Содиқвой хотинининг Акрам билан муносабатига ниҳоятда сезгирилик билан қарамайдими? Албатта сезгирилик билан қарайди. Зотан хотинининг жонига қасд қилиш худди шу Акрам билан боғлиқ-ку! Ҳўш, нима бўлади денг? Ҳамидаҳои, Содиқвойнинг хотини «собиқ» севгилисini учрашувга таклиф этади ва улар «қоронғи тушганда тегирмон бўйидаги жийдазорда»— хилватда учрашишади. Йўқ, бир-биirlарига эришиш учун эмас, Ҳамидаҳон колхоз раиси устидан шикоят қиласы, Акрамдан дўстининг жиловини тортиб қўйинши, ўзига ёрдам беришни илтимос қиласы. Учрашув пайтида Қандай ҳаяжонли, ширин дамлар кечмайди дейсиз! Бир-бирига аъло даражада тушунадиган юракларнинг бир маромда уриши, тўлқинланиши бошқача маънени англатадими?

Одил Ёқубов қаҳрамонлар ҳолатини умуман ҳаққоний тасвирлайди ва буни мамнуннит билан қайд этишга тайёрман, аммо у шун-

чаки бегона одам билан эмас, балки илк бор севишган Акрам билан хуфия учрашгани учун хотинини ўлдиришга жазм этган Содиқни бутунлай қоралайдики, бунга умуман қўшилиш мумкин. Қисман-чи? Қисман, ўша эр ҳолатини тушуниш, унинг аҳволи осон эмаслигини ҳам эътибордан соқит қилмаслик лозим.

Йўқ, Содиқвойни бутунлай оқлаш керак демоқчимасман, лекин у бекордан бекорга қотиллик йўлига кирмаган-ку! Унинг ўрнида «қишлоқи» тугул шаҳарлик бўлса ҳам ўзини тутиб туролмаган, хотинини пичоқламаса ҳам унга ҳамла қилган бўларди. Ўрмаган тақдирда ҳам нимадир рўй берарди...

Яхшиямки, «Қанот жуфт бўлади»да Содиқнинг жиноятини бир оз юмшатиш, уни қисман кечириш юзасидан мулоҳаза юритилади, лекин унга бир қанча ўринларда инсонийлик қиёфасини бутунлай йўқотган ваҳший деб нафратлар ёғдириладики бунга ҳайриҳоҳ бўлолмаймиз. Шунингдек, Ҳамиданнинг Акрам билан учрашуви ҳам ҳаётин мантиқ, ҳам бадиин мантиқ негизида чуқур асосланган, деб бўлмайди. Чунончи, Ҳамида нима учун Акрам билан гаплашмоқчи? Ахир, раиснинг устидан шикоят қилиш учун бошқа одам, раҳбар ходимлар топилмадими? Ахир, Акрам билан учрашса, бунинг ошкор бўлиб, эрига дастак, баҳона бўлиб хизмат қилишини билмасмиди?! Еки билса ҳам, ҳар қандай таҳдидга рози бўлиб ҳам илк мұхаббати билан бир-икки лаҳза бирга нафас олишни афзал кўрдими?

Хуллас, Ҳамида Акрам билан учрашмаслиги мумкин эмас эди, деган фикр туғилмайди. Лекин бу фикр туғилган чоғда ҳам, айб-

нинг бир қисми Ҳамидага тегишли. Ҳолбуки, Одил Еқубов Ҳамидан мусичадек беозор, қоғоздай оқ, мутлақо бегуноҳ демоқчи бўлгандай туюлади.

Хўш, ёзувчи Содиқвой тарихини қаламга олиш билан нима демоқчи? У «қишлоқи» рашк қўлиб ҳаддидан ошиб кетди, оила, мұхаббатни парчалаб ташлади, демоқчи.

Аммо рашк бобида шаҳарликлар «қишлоқи»лардан қолишмайди. Буни «Қанот жуфт бўлади»нинг ўзи, аниқроғи, ундаги Зафар тасдиқлайди.

Севгилисидан хавотирланганда у шундай мулоҳаза юритади: «...севги, эр-хотин ўртасидаги муносабатлар эркин бўлиши керак, деб юрган ёш зиёлилардан бири мен бўлсан... Нибуфар кинога ўтгандан бери... тинчимни йўқотдим. Хаёлимга минг хил бемаъни фикрлар келади!»

Биз бунга шундай қўшимча қиласиз: баъзан ўша «бемаъни фикрлар» bemaeъни хатти-ҳаракатларни келтириб чиқаради, ҳатто даҳшатли фожиаларга олиб келади. Севги бирорвларга бахт, бирорвларга бахтсизлик, бирорвларга ҳаёт, бирорвларга ўлим олиб келади, деганлари бежиз эмас-ку, ахир! Бироқ инсон бахтга, ҳаётга интилади, курашади ва «Қанот жуфт бўлади»даги қаҳрамонлар ҳам яхшилик, софлик, вафодорлик учун жонини фидо қилишга тайёр эканликларини кўрсатади, бироқ уларнинг изланиш-интилишларини юзага чиқариш учун фақат шароит-муҳит ҳал қилувчи, ягона омил бўлармикин?

Йўқ, шароитнинг шахсга таъсирини камайтириб кўрсатиш ёки бутунлай инкор қилиш мумкин эмас. Чунончи, қишлоқдаги урф-

одатлар, хулқ-атворлар шаҳардагига нисбатан бошқача бўлишини ҳисобга олмасдан иложимиз йўқ. Муҳаббат, рашк, оила масаласидаги меъёр қишлоқ шароитида бир оз қўполлик, дағалликни тақозо этади, шаҳарда эса анча мулойимлик, силлиқлик мавжуд дейишадики, бунда жон бор.

Чунончи, айрим шаҳарликларнинг устомонлиги, улар ўртасидаги «дипломатик» муносабатлар тилёғламалик, иккюзламачиликнинг, принципсизликнинг оқибати эмасми? Қилни қирқ ёргандай моҳирлик билан иш тутиш, ҳамирдан қил суғургандай муомала қилиш инсоннинг асл қиёфасини, унинг қабиҳлигини, ичи қоралигини яширишга қаратилса буни ижобий ҳодиса, деб бўладими? Борди-ю, улардаги мулойимлик силлиқлик, «қишлоқча» самимийликка, табиийликка «пайванд» этилса, нур устига аъло нур бўлур эди.

«Қанот жуфт бўлади»даги Зафар ва Акрам (баъзи истиснолардан ташқари, аниқроғи, тарсакидан ташқари) да мана шундай ўйғунликни кўрамиз. Шундай ўйғунлик Моҳира холада ҳам бор. Моҳира холада? Ахир у «қишлоқи» эмасми? Аммо қишлоқда доно, баъмани, бағри кенг кишилар яшамайди деб ким айтади?! Амаки, Кўса каби ажойиб қариялар-чи?

Моҳира хола, Амаки, Кўса — қиссадаги воқеаларнинг фаол қатнашчилари эмас. Улар бир-икки кўриниш бериб гойиб бўлади, аммо қалбингиизда қандайдир илиқ, нафис, ширин туйғулар ўйғотиб кетади.

Пайти келганда ота-боболаримиз, бувинуваларимизнинг донолигини тадқиқ этишга

етарлы әътибор берилмаётганинг таассуф билан қайд этиш керак. Ваҳолонки, улар халқимизнинг миллий руҳи, миллий анъаналари ни ўзида сақлаб келаётган, фарзандларига, невараларига «юқтираётган» бебаҳо хазинани эслатади, айни чоқда улар бизнинг замондошимиз-ку!

Қардош халқлар адабиётида, айниқса, рус адабиётида масаланинг шу томони етакчи мавзулардан бири сифатида қаралаяптики, биз улардан ўрнак олишимиз зарур. Айниқса, В. Белов, В. Шукшин, В. Лихоносов, В. Распутин, М. Рошчин сингари истеъоддли ёзувчиларнинг рус қарияларини мадҳ этувчи асарлари шұхрат қозонмоқда ва бу табиийдир. Негаки, ота-боболаримиз, буви-буваларимиз ҳаёти, орзұ-интилишларини қанчалик чуқур билсак, бугунги кунимизнинг қадр-қимматини янада яхшироқ англаб оламиз.

Ахир, дарёлар тоғлардаги манбадан маҳрум этилса, бутунлай йўқолиб кетади-ку! Шунинг учун ота-боболаримиз даҳосини, ўтмиш даҳосини кўз қорачиғидай ардоқлаб, улардан ижодий ўрганиш биз учун ҳам фарз, ҳам қарз!

Шубҳасизки, ёрқин келажак, баҳт-саодат йўлида тўғаноқ бўлиб ётган ҳар хил маразлар айрим ота-оналаримиз, буви-буваларимизга тааллуқлики, бундан кўз юмиб бўлмайди.

Шунинг учун Одил Ёқубов баъзи иллатларни «қишлоқилик» деб талқин қиласи ва уларга аёвсиз ўт очишга чорлайди. Лекин «қишлоқилик» хавфини бир оз бўрттириб беради, натижада ўқувчидаги шаҳарликлар рашикдан ташқарида яшайдилар деган тасаввур туғилишига йўл очилгандай бўлади.

Ваҳолонки, рашикиз муҳаббат бир лаҳза ҳам яшай олмайди, рашик муҳаббатнинг жўралмас йўлдошидир, деб таъқидлаган донолар юз карра ҳақ. Йўқ, рашикни эскилик сарқити, маразлардан бири деб қарашиб тўғри эмас.

Одил Ёқубов рашик тарихини, рашиклиарга хос хусусиятларни таҳлил қилишни ўз олдига мақсад қилиб қўймаган. У бу орқали қаҳрамонларнинг чинакам қиёфасини намоён қилишни кўзлаган. Акрам хотини аразлаб кетгандан кейин фақат оила, муҳаббат ҳақидагина эмас, балки ижтимоий фаолияти, ҳаётдаги ўрни тўғрисида бош қотиради ва бу борадаги нуқсонларини излай бошлайди. Зотан қалбida софлик, самимийлик, муҳаббат туйгулари мавж уриб турган одамгина кечмиш-кечирмишларига танқидий кўз билан қарай олади, етишмовчиликлари, қусурларини топади, уларга барҳам беришга муваффақ бўлади. Шунга кўра Акрамда энг яхши хусусиятлар қалқиб чиқади, улар ҳақиқат тазиёки остида ҳар хил иккиланишлар, ланжликлар, ноҳақликларга барҳам беради. Чунончи, меъморчиликда йўл қўйған камчиликларини, англаб олади: «Бу муҳташам бино...» азиз ҳам-қишлоғимиз, талантли архитектор, фан кандидати Акрам Холиқов лойиҳаси асосида қурилди...» Акрам ичига кулимсираб яна сойгайдўппи-дўппи шафтоли ўғирлаб юрган боғларга, Ҳамида билан илк бор учрашган жийдазорга тикилди, лекин кўнглидаги бояги ёрқин туйгуларни уйғотишдан ожиз, оғир ўйга толди. Агар уч-тўрт йил олдин, бош план устида ишлаётганида туппа-тузук кўриниган Санъат саройи лойиҳасининг ёскирганини энди ўзи ҳам сезган бўлса, ўн йилдан кейин одамлар

нима дейди? Юз йилдан кейин-чи? Юз йил у ёқда турсин, йигирма-үттиз йилдан кейин унинг ўзи, ўзи тугул қизи Нодира ҳам бояги ёзувни кўриб отасидан номус қилмасмикин?»

Езувчи қаҳрамон руҳиятидаги ўзгариш осонлик билан кўчмаслигини жуда яхши билади. Шунинг учун Акрамнинг шубҳаланишлари, иккиланишларини синчковлик билан кузатиб боради. Унинг қалбидаги нимаики юз берса, барчасини таъқиб қилиш пайдада бўлади, бироқ асосий мақсад ҳақиқатни ёритиш эканлигини унутмайди. Айни чоқда қаҳрамон кечинмаларини юрак тафти, қалб ҳарорати билан қаламга олади. Ҳатто бир қанча ҳолларда ҳис-ҳаяжон, қалб мавжи меъёрдан ошиб кетади ва гоҳида етарли даражада асосланмай қолган фикрларни, чуқур ёритилмаган айрим воқеаларни «ювиб» кетади. Бироқ бу учун муаллифни айблаш керакми? Қисман айблаш керак, аммо ҳароратсиз, дардсиз ёзилган асарлар оз эмаслигини эътиборга олсан, «Қанот жуфт бўлади»да гоҳида туйғуларнинг гўё дарёдай тошиб, фикрларни босиб кетгани ўзига хос фазилатдай бўлиб кўринади. Борингки, фазилатдай бўлиб кўринмасин, аммо ҳароратли сўзлар, эҳтиросга йўғрилган гаплар ҳеч кимни лоқайд қолдирмайди. Акрамнинг мана бу розига қулоқ солинг: «Демак, Акрам учун биттаю битта йўл қолди, у ҳам бўлса баъзи лойиҳаларини қайта ишлаб чиқиш, энг муҳими, ўз эътиқодларидан воз кечиб Зафарнинг ҳақ эканига икror бўлиш, унинг талантига тан бериш!»

«Уз эътиқодларидан воз кечиш?

Инсон учун бундан ҳам мушкулроқ, даҳшатлироқ иш бўлмаса керак. Бироқ ҳаёт, ҳа-

қиқат талаб қилса, воз кечиш зарур. Акс ҳолда тараққиёт оқими сени ўз йўлидан улоқтириб ташлайди, кўпчилик эътиборидан четда қоласан. Бироқ чинакам ҳақиқат деб ардоқлаган, муқаддас деб ҳимоя қилган фикринг бирданига сароб бўлиб чиқса, бунинг ўзига хос фожия эканлигини ким тушунмайди?!

Қисса қаҳрамони худди шундай вазиятга тушиб қолади: «У меҳнатдан, баъзи лойиҳаларни қайта кўриб чиқишидан қўрқмас, лекин институттада кўтариладиган шов-шувни, майдачуида гап-сўзларни, бурчак-бурчакда шивир-шивир қилишиб, уясига чўп суқилган арилардай югуришиб қоладиган одамларни кўз олдига келтириши билан ўй-хаёллари яна ағдар-тўнтар бўлиб кетар эди».

Ҳамма гап мана шу «ағдар-тўнтарлар»да! Ахир, уларсиз баъзан оқу қоранинг, яхши-ю, ёмоннинг, ҳақлигу ноҳақликининг фарқига бориши мумкини?! Зотан ўсиш-ўзгариш, тараққиёт ҳар хил алғов-далғовларни, ағдар-тўнтарларни тақозо қиласди. Лекин улар икирчикирларнинг, майдачуида иғволарнинг эмас, пириинципial фикрларнинг, кучли эътиқодларнинг тўқнашуви, курашига асос бўлиб, инсон характеристини, ҳаёт ҳақиқатини ёритишга қаратилган чоғда ғоявий-бадиий салмоқ касб этади.

Акрамнинг шахсий ва ижтимоий фаолиятидаги «алғов-далғов»лар, «ағдар-тўнтарлар» худди шундай таассурот қолдиради. Аниқроғи, унинг оиласидаги «ағдар-тўнтар»лар ижтимоий фаолиятидаги ўзгаришларга уланиб кетади, бири иккинчисининг сабабчиси ёки оқибати бўлиб қолади.

Қаҳрамон характеристидаги, ақлу иродасида-

ги ўзгаришларнинг мураккаблиги ва ҳаётийлиги шу билан белгиланади. Диққат қилинг-а, Акрам меъморчиликдаги ташқи ялтироқлик, жимжимадорликни камчилик деб билади, санъатнинг назокат ва нафосат қонуни талабларига риоя қиёши афзал деб билади, аммо ўзининг ноҳақлигини эътироф этишга ҳадеганда бўйни ёр бермайди!

Шу ҳақда ўйлаганда: «Акрамнинг эсига бундан икки йилча олдин ўқиган бир инглиз ёзувчининг мақоласи тушди. Мақолада гап Тургенев билан Толстой ҳақида борарди. Толстой адабиётга эндиғина қадам қўйган пайтларида Тургенев шуҳрати оламга тарағлан машҳур ёзувчи бўлган. Лекин Толстой ўзининг илк асарлари билан оқ шундай обрў орттиради, Тургеневнинг шуҳрати худди офтобда хиракашган ойдай хираклашиб қолади. Бу нарса Тургеневга оғир ботади, кўп изтирооб чекади, ҳатто Толстойнинг баъзи асарларига нотўғри баҳо беради, уларни камситади. Факат бир неча йиллардан кейинги Тургенев қалбидаги ҳасад ва файирликни мардона енгиди, Толстойнинг улуғ талантига тан беради!..

Акрамнинг эсида бор — мақола унга жуда қаттиқ таъсир этган эди. Мана ҳозир ҳам уни эслали билан кўнгли ёришиб;

«Одам эканмиз-да! Тургеневдай улуғ бир зот шунчаликка борган бўлса... биз ҳалиям... — деди хаёлида, деди-ю, яна ўзидан кулди.— Тургенев қаёқда-ю, мен қаёқда! Нима бало жинни бўлиб қолмадимми ишқилиб?»

Қаҳрамоннинг санъаткор, зиёли эканини назарга олсак, унинг Толстой ва Тургенев муносабатларидаги «музлик»нинг «эриш» тарихи билан ўзининг ҳаётини таққослаши та-

биий чиққан. Лекин бу барибир китобий манба эмасми? Худди шундай! Аммо ёзувчи уни Акрам ҳаётига бевосита алоқадор бўлган реал воқеалар, ҳис-туйгулар таҳлилига «пайванд» этишга интилади-ю, бироқ бу интилиш қисман ўзини оқлаган, холос.

Ёзувчи уларни қаҳрамон шахсиятидаги мусбат ва манфий томонлар билангина эмас, балки муйайн шарт-шароитлар, объектив ва субъектив сабаблар билан изоҳлаш зарурлигини уқтиради. Лекин инсон тақдиридаги ўзгаришлар биринчи навбатда шахсиятнинг ўзига бориб тақалади.

Борди-ю, ўша машъум тарсаки баҳонасида бўлган «жанг»да ёнгилиб қолмаганда Акрам меъморчилик соҳасидаги нуқсонларини ҳозиргидек зийраклик билан тез илғаб олармиди? Уларни бартараф қилишга журъат этармиди?

Тўғри, ўз интилиш-изланишларига танқидий кўз билан қарайдиган одамлар, қачон бўлмасин албатта ўзи йўл қўйган хатоларни уқиб олади, уларни тугатишга бутун куч-қудрати билан киришади. Акрам шундайлар тоифасидан бўлгани учун унинг ҳеч қандай ҳарараткисиз, жим ётиши эҳтимолдан узоқ, аммо дарё тошмагунча қирғоқни бузуб кетолмаганидек нималардир ижобий натижага ёки салбий оқибатга олиб келмоғи даркорки, бу ўзига хос қонуниятдир.

Акрамни дарёга, унинг нуқсонлари, қуюшқондан чиқиб кетишларини дарёнинг «рекорд»ига таққослаб бўлмайди, бироқ улар ўртасида қандайдир муштараклик мавжуд.

Бу муштараклик нимадан иборат?

Акрам ҳаёт «дарёси» қирғоғидан чиқиб

кетди, унинг бахти, муҳаббати хафв остида қолди, меъморчиликдаги мавқеига таҳдид солинди. Шунинг учун у доимо безовталанади, осойишталикни билмайди, у ёқдан бу ёқ-қа елиб югурди, куну тун ўйланади, изланади, ҳам оиласидаги, ҳам меҳнатдаги, ижоддаги, яъни меъморчиликдаги ҳақиқат учун курашади.

«Ларза»даги Муъталь, «Бир фельетон қиссаси»даги Учқун, «Муқаддас»даги Шариф ўз мақсади, ўз орзуларини турмушга тадбиқ этилини учун курашмайдими?

Курашади, лекин уларга иисбатан Акрам нинг фикр доираси, курашчанлик, изланувчанлик, ўйланувчанлик даражаси устун туради. Зотан. «Қанот жуфт бўлади»нинг қаҳрамони янги даврнинг янги хислатларини — олтмишинчи йиллар нафасини бутун вужуди, қалбига жо қилиб олган. Шунинг учун унинг қувончига ҳам, ғам-аламига ҳам, қайфу-ғуссасига ҳам шерик бўлсан дейсиз.

Қиссадаги деярли барча воқеалар, персонажлар бавосита ёки бевосита Акрам билан боғланади.

Диққат қилинг-а. қиссадаги Зафар ва Нилюфар, Убайжон ва Шоҳиста, Содиқвой ва Ҳамида, Туробжон ва Малоҳат сингари эру хотин, ошиқ-маъшуқлар ҳаётидаги «ағдартўнтар»лар, Султон, Амаки, Шавкат каби ҳархил характер, қилиқлар билан ажralиб турдиган персонажларнинг интилишлари, хатти-харакатларидаги «алғов-далғов»лар Акрам тақдирига таққосланади. Фақат шуми? Иўқ, шунчаки таққослаб қўйилмайди. Асосий мақсад Акрам характерини чуқурроқ ёритишдан иборат: тасаввур қилингки, фильм томоша

қиляпсиз, экранда Акрамнинг ташвишли, ҳаяжонли, севинчли кунлари гавдаланади. Аммо фақат уларни кўраверсангиз зерикиб қоласиз! Бинобарин, манзара, куй алмашиниб туриши керак. Шунга мувофиқ Одил Ёқубов фақат Акрамни ҳаракат қилдириб қўймайди. Қисса саҳнасига Зафар ва Султонни, колхоз раиси Туробжонни, кинорежиссёр Шавкатни, журналист Убайжонни олиб чиқади. Ахир, Акрамнинг укаси Нортожи, биринчи муҳаббати — Ҳамидахон, унинг эри Содиқвой, Убайнинг севилиси Шоҳиста, унинг дадаси Амаки. Зафарнинг қаллиғи Нилюфар сингари бир қанча шахслар бош қаҳрамон ҳаётига «улаб» қўйилмаганми?

Тилга олинмаган яна беш-олти персонаж бор. Улар билан ҳали номи қайд этилганларнинг барчаси «учрашган» чоғда қисса кўлами торлик қилиб қолмасмикн? Айримлари эса бир-иккни кўриниб кетади-ю, ғойиб бўлади, хотираңгиздан мустаҳкам ўрин олмайди. Баъзиларини эслаб қоласизу, бироқ кишига завқ-шавқ, маънавий сабоқ баҳш этмайди.

«Қанот жуфт бўлади» жўн асар эмас, у баҳт, муҳаббат, ҳақиқат ҳақида фикрлар «жанги»ни келтириб чиқаради, инсонга маънавий завқ-шавқ, руҳий сабоқ баҳш этувчи туганмас маъба — бадиййлик даҳосига меҳр тўйғусини уйғотади, чинакам гўзаллик, нафосат учун курашга чорлайди. Борди-ю, кўп сўзлилиги, юзакилиги, ҳаётдан йироқлиги билан меъдага тегиб кетган сирти ялтироқ, ичи қалтироқ асарлар ҳам анча-мунча эканлигини эсласак, Одил Ёқубов қиссасининг салмоғи янада ортади.

Очиғини айтайлик: «Қанот жуфт бўлади»-

га юксак талаблар нүктаи назаридан ёндаш-япмиз. Үнга буюк бобомиз Алишер Навоий, Толстой, Достоевскийлардан баҳраманд бўлган китобхон сифатида мақтov сўзлари, таъна тошлирини отмоқдамиз. Борди-ю, ўзбек адабиётининг олтмишинчи йиллардаги тарақ-қиёт даражасида туриб мулоҳаза юритсак. «Қанот жуфт бўлади»ни ажойиб янгилик деб бонг уришга тайёрмиз ва қисман шундай қил-япмиз. Бироқ юксак довонларни забт этиш тўғрисида бош қотирмаслик кимга наф келтиради?

Диққат қилинг-а, одам боласи ерда тузук-кина юришга, теварак атрофни яхши ўрганишга улгурмасдан ўзини осмонда кўргиси кела-ди, ою-қуёш, юлдузлар билан ошно бўлишни орзу қилади, измига фазони, чексиз кенглік-ларни бўйсундиришни хоҳлайди. Бироқ ҳар қандай орзу, ҳар қандай хаёл ўсиш-улғайишни тақозо қилавермайди. Борди-ю, улар ҳаёт-тий асосдан холи бўлса, баҳт-саодат эзгулик тантанасига йўналтирилмаса, бу ҳақда оғиз кўпиртириб гапиришга зарурат йўқ. Ҳақиқат орзуга, орзу ҳақиқатга қанот бўлиб парвоз қилса, ҳар қандай довонлар забт этилади. Шунинг учун ҳақиқат билан орзу, ҳаёт билан кураш бир-биридан узилиб қолмаслиги, ак-синча бир-бирига пайванд этилмоғи зарур.

Шу жиҳатдан қараганда «Қанот жуфт бўлади»нинг мазмун, маъно доираси кенг. У ҳаётда эркин парвоз қилиш учун икки қанот — эр-хотин ошиқ-маъшуқнинг тутув яшashi ки-фоя қилади, деган нақлдан иборат эмас. Ёзувчи ижтимоий ўзгаришлар инсоннинг интим дунёсидаги, шахсиятидаги «ағдар-тўнтар»-лардан бошланади, жамият тараққиёти эса

ўз навбатида инсоннинг маънавий-руҳий камолотига боғлиқ, бири иккинчисисиз, иккинчи-си биринчисисиз равнақ тополмайди, демоқчи бўлади, шахсий ва ижтимоий манфаатлар бир-бирлари билан жисп боғланиб кетганини, уларнинг «соғ» ҳолда яшши, равнақ топиши на жамият, на табиат қонунларига мос келишини эътибордан четда қолдирмайди. Лекин кўп ҳолларда иқтисодий ва маънавий ҳаётдаги «алғов-далғов»лар муайян шахсга бориб тақаладики, бунга «Қанот жуфт бўлади»даги Акрам билан яқиндан танишганингиздан кейин яна бир карра ишонч ҳосил қилишингиз мумкин.

Дарвоқе, Акрам нима учун ўзининг маънавий-ахлоқий, ижодий фаолиятига танқидий кўз билан қараб, ўзининг бир қанча ҳукм-хуносаларидан воз кечди, турмушнинг туб масалаларини замон талаби асосида ечиш зарурлигини уқди. Ахир, Сайёра билан аразлашмасдан олдин ўз изланишлари, хатти-ҳаракатлари, мулоҳазаларини «тафтиш» қилса бўлмасмиди?! Ёки бундан илгари ўзи ҳақида, шахсий ва ижтимоий фаолияти ҳақида бош қотирмасмиди?!

Инсон туб моҳияти билан ижодкор, изланувчан, ўйланувчан мавжудот бўлгани учун ўзини тарбиялаган, камолотга етказган шароитга, иқтисодий-сиёсий омилларга бефарқ бўлолмайди. Ҳамма гап инсоннинг қадр-қиммати, унинг ҳаётини эзгу ниятлар, коммунистик эътиқод асосида ўзгартиришига бориб тақалади. Лекин характер мантиқига жиндак заар етказадиган айрим деталлар мавжудки, улар воқеалар оқимиға, қаҳрамоннинг ўй-фикрларига моҳирона сингдириб юборилма-

ган. Жумладан, Акрам ҳадеб ўзига дашном бераверади: «...ўз оиласида кўрсатган ҳунарлари-чи? Сайёрага қилган қўйполлиги-чи?» Уринли-ўринсиз ўзининг дағаллиги, қўрслигидан шикоят қиласди, шу учун ўзини дам ўтга, дам сувга уради. Лекин ҳаётда шунақаси бўлмайдими?! Ахир, бир карра сурчикиб-қоқилиб кетсанг, поҳида бир умр тўғри юрмагандай бўлиб туюлмайдими?! Балки Акрам шундай ҳолатга тушгандир?!

Афсуски, бу нарса қоронги. Лекин шуниси аниқки, ёзувчи Акрам қўйпол, дағал демоқчи бўлади. Ҳар ҳолда, у қаҳрамонга айни кўпроқ юклагандай туюлади.

Бир қанча персонажлар номидан айтилган мана бу фикрлар шундай хулоса чиқаришга асос беради: «Шу ҳам одамгарчилик бўлдими?. Садқаи олимлик кетинг!», «мен у киши ғалати эканин билардиму, бироқ бунчаликка боришларини.. Яна олим деган номлари бор!», «Бу қанақа пасткашлик? Олим одам!»

Акрам қандай далилларга асосланиб қораланяпти? Далил эса — ўша тарсаки. Бошка ҳеч қанақа факт йўқ. Аммо шу тарсаки деб уни бутунлай одамгарчиликдан, инсонийликдан четга чиқариб ташлаш керакми?

Яхшиямки, ёзувчи бу фикрга қўшилмайди, айнинг бир қисми хотинига тегишли эканини уқдиради. Сайёра шундай мулоҳаза юритади: «У-чи? У яхши қилдими? Худди турмушга чиқмаган тантиқ қизчаларга ўхшамдими? Эркалик ҳам эвий билан-да, ахир?..»

Шу тариқа Акрамнинг оиласида можарода тўғри хулосага келгани кўрсатилади. Аммо шундай бўлса, нима учун Акрам хотинига «...турмушимизни, сени кўп ўйладим. Кўп ма-

салада ноҳақ эканимни тан оламан», деб илтижо қиласди? Ҳатто баъзан ялиниб-ёлворади? Нима учун ўзини ҳадеб ерга уради?

Одил Ёқубов бу муаммони негадир назарга илмайди. У Акрамнинг биринчи бўлиб ён бергани маъқул, демоқчидай бўлади. Бироқ бу борада изтироб чекиши изланишлар, шубҳаланишлар рўй бермайдими! Айтайлик, меморчиликдаги хатосини тан олиш борасида Акрам қанчали қон бўлиб эзилиб кетганди! Хотини билан ярашув арафасида, ярашув пайтида унинг бошидан қарама-қарши хаёллар кечмайдими?! Тўғри, бу ҳақда сўзланади, лекин дард, ҳаяжон, ҳарорат билан йўғрилган манзаралар кам яратилган. Ҳатто айтиш мумкинки, эр-хотин ўртасидаги келишув «битим»и асаддан ташқарида тузилганга ўхшайди.

Айрим мунаққидлар қисса ниҳоясида воқеалар кескин тус олмагани, қаҳрамонларнинг пировардида оғиз-бурун ўпишиб кетишига эътиroz билдиради. Эътироф этиш керакки, уларнинг даъвосида жон бор, аммо ҳақиқат қаерда?

Бу ҳақда бирор хулосага келиш учун умуман бадиий асар хотимаси ҳақида мавжуд бўлган икки фикрга тўхталиб ўтиш жонидир.

Бир турӯҳ танқидчилар ва китобхонлар асар «жанг» билан бошланиб «тинчлик» билан тугаса, яъни дастлаб «ағдар-тўнтар» бўлиб пировардида ҳамма нарса жой-жойига тушса, деган қарашни ҳимоя қилишади. Бундай қараш, айниқса, 50-йилларда авж олган эди. Аммо ўз мавқеини хозирда ҳам сақлаб қолмоқда. Эмишки, ижобий қаҳрамонлар салбий кучлар билан олишувда муваффақият-

сизлилкка учраса, ўқувчиларга ўрнак бўлолмайди. «Аммо,— деб таъкидлайди И. Султонов,— ҳаёт бошқачароқ, яъни мураккаброқ, табиийроқ, бизнинг тасаввуримизга қараганда. Шуни эътибордан соқит қилиш ижодий муваффақиятсизликка олиб келади. Чунончи, «Отелло»ни эсланг. Агар Отелло рашк ўтида ёнмаса, ноҳақлик билан келишиб кетса, Дездемонани ўлдирмаган бўлур эди. Аммо ҳаёт ҳақиқати, характер мантиғи Отеллонинг Дездемонани ўлдирини тақозо қиласиди, бунга Шекспир тўла риоя қилган. Аммо «Отелло»ни кўрган томошабинлар ўзларини ёки жуфти ҳалолларини ўлдириб қўяётгани йўқку!» «Отелло»ку ўтмишга оид экан аммо «Ёш гвардия» (А. Фадеев), «Оптимистик трагедия» (В. Вишневский), «Шафқатсизлик» (П. Нилин), «Қутлуғ қон» (Ойбек) каби асарлар хотимаси фожиа билан якунланганини инобатга олмаслик мумкинми?

Бошқа бир гуруҳ мұнаққидлар ва ўқувчилар асарни ғалабалар, тўйлар, ярашувлар билан эмас, фақат фожиа, «ағдар-тўнтар» билан якунлаш зарур дейишга журъат этмоқда. Ҳатто Ч. Айтматовнинг «Оқ кема»сидаги хотимани намуна тарзида кўрсатиб, ёзувчиларимизни шундан ўрганишга, ўрнак олишга даъват этмоқда.

Иўқ, ҳеч ким фожиали хотимага қарши чиқмайди. Ҳамма гап унинг чуқур ҳаётий асосга эга бўлишида, маънавий-руҳий тараққиётга мос келишида, ниҳоят, ҳаққоний тасвирланишида. Лекин бир асардаги даҳшатли хотима иккинчисига кўчирилиши шартми? Ҳеч қандай асоссиз қаҳрамонлар тақдирини ҳалолкат билан якунлагаш тўғри бўлармикин?

Афуски, ҳар қандай фожиа, ғам-ғусса, ҳалолкат, ўлим ёки баҳт-саодат, қувонч ва шодлик тараққиёт қонунияти ҳаёт диалектикаси тақозоси билан рўй беришини аҳён-аҳёнда унугтиб қўямиз. Ахир, фақат истак, орзу, хоҳишининг ўзи билан турмушни қайта қуриш, ўзгартириш мумкин эмас-ку! Борди-ю, истак, орзу, хоҳишини амалга ошириш учун астойдил курашилса ва бу кураш тараққиёт оқимиға мутаносиб бўлса, турмуш диалектикасининг тақозоси билан олиб борилса, ғалаба қозонилади.

Шунинг учун коммунистик эътиқод маънавий-иқтисодий жараёндаги турғунликни рад этади, юксак мақсадларга мувофиқ фикрлар «Жанги»нинг авж олишини тақозо қиласиди.

Энди шу нуқтаи-назардан «Қанот жуфт бўлади»нинг якунига назар ташлайлик.

Аввало шуки, Акрамнинг «ағдар-тўнтар»да айбнинг кўп қисмини ўз гарданига олиб, биринчи бўлиб «таслимнома»га имзо чекиши ишонарли чиққан. Лекин Сайёра-чи? Айни бўйнига олишга унинг бўйни ёр бердими? Ахир, у эгилган бошни қилич кесмайди деб олдига узр сўраб келган эридан баланд келмаганими? Умуман Сайёра характеристи қай даражада ҳаққоний ёритилган ва у орқали ёзувчи қандай ғояни тарғиб этмоқчи?

«Менинг назаримда,— деб ёзади Умарали Норматов,— Сайёра асарда асосий фигура, қиссадаги асосий можаролар, баҳслар шу образ теварагида боради, китобхон унинг хатти-ҳаракатларини қизиқиш билан кузатади».

Сайёра асосий фигура, марказий қаҳрамон? Бунинг ҳақиқатга тўғри келмаслигини маҳсус далиллар билан исботлаб ўтириш шарт бўл-

маса керак. Негаки, ёзувчи ахлоқий мұаммолар — муҳаббат, оила, садоқатнигина әмас, балки ижтимоий масалаларни, чуончи, меморчилик саңъети, қишлоқ маданияти, ижодкорнинг ўз истеъдоди, ўз халқи, эл-юрти олдиғаги масъулиятига оид жумбоқларни күтариб чиқади ва уларни тадқиқ этишда асосий восита қилиб Акрамни (Сайёраны әмас) олади.

Майли, бу ҳақда узоқ тортишиб ўтирумайлик, аммо танқидчи Сайёра образини қандай талқин этади?

Ў қўйидагиларни таъкидлайди: «Сайёра умуман яхши аёл, лекин у тўқликка шўхлик қабилида иш тутади, кўнглига ортиқча эрк бериб юборади, ёшига ярашмаган қилиқлар чиқаради, янгилик шиори остида бетайин тушунчалар, ҳавоий орзулар қанотида «юксаклиқка» парвоз қилмоқчи бўлади, бир гуруҳ тантиқ, бемаслак ёшлар даврасига қўшилиб, ўзининг оила, эл-юрт олдиғаги масъулиятини унтулади, оиласвий-шахсий баҳтини, аёллик шаънини хавф остида қолдиради».

Бундан чиқдики, Сайёра салбий образ экан-да? Йўқ, Одил Еқубов унга бошқачароқ муносабатда бўлади, қаҳрамондаги аёллик назокати, инсоний гўзаллиги, софлиги, садоқатини меҳр билан тасвирлайди, айни ҷоқда характеридаги қарама-қаршиликлар, айrim қусурларни хас-пўшлаб кетмайди, меъеридан четга чиқиб кетган «эркалиги», «шўхлиги»ни афсусланиб, ачиниб қайд этади. Бироқ нима учун Сайёра танқидчига ёқмади?

Сайёра анъанавий маънодаги аёллар обрасидан жиддий фарқланади. Жумладан, Жамила, Гулнор, Кумушбиби, Нурхон, Саида, Бахорларга айrim хислатларигина ўхшаб кетади,

холос. Лекин нимаси билан? Соф туйғулар, ноёб ҳислар тўлқини мавжланиб турган қалби билан. Қабиҳликка, ноҳақликка муросасизлиги билан. Инсоний шукуҳи, бокиралиги билан. Бироқ Сайёра ўзининг йигирманчи, ўттизинчи, ҳатто эллигинчи йилларда яшаб, баҳтсаодат, ҳақиқат учун курашган дугоналаридан ўзига хос «қилиқлар»и билан ажралиб туради. Инқилоб арафасида яшаган Жамила ёки ўтган асрда зулм жабри, жаҳолатдан ҳалок бўлган Кумушбиби етти ухлаб тушида кўрмаган «қилиқлар» билан ўзлигини кўрсатади.

Аввало шуки, Сайёра ўзини эркин тутади, гоҳида (диққат қилинг: ҳар доим әмас, гоҳида!) эри билан ҳисоблашмайди, ўзига ўзи маҳлиё бўлиб қолади, мустақил ҳаракат қиласман деб гоҳо (гоҳо!) ахлоқ доирасидан четга чиқиб кетади. Чуончи, баъзан ўйин-кулгини меъердан ошириб юборади, кафе, ресторонларга меҳр қўяди, «замонавий» рақслар, жазга қизиқади. Яна шуниси боғки, бунақа пайтларда эри билан әмас, балки ёлғиз ўзи, ҳатто бегоналар билан юришга журъат этади. Лекин миллий анъаналарни, оиласдаги бурчини унтиб қўядими? Ҳамма вақт эрини назар-писанд қилмасдан «Ёшлиқ» кафесида айшини сурадими?

«Қанот жуфт бўлади» жавоб беради: йўқ, асло бундай әмас! Қаҳрамоннинг ўзи ҳам ўзини бутунлай бегуноҳ қилиб кўрсатмайди. У эрига пинҳона мурожаат қилиб шундай дейди: «Ёшгина хотинини ҳаммага кулги қилиб ёлғиз ташлаб кетадими? Ундан кўра судраб олиб чиқиб кетгани яхши әмасмиди?»

Борингки, бу борада Сайёрани ҳақ деяйлик аммо ҳамманинг олдида хотинини судраб олиб

чиқиб кетган эр мақтовга лойиқ бўладими? Шундай пайтда Сайёра: «Нега ҳамманинг кўз олдида зўрлик қиласди, захрини уйга боргандан кейин сочмайдими»— демайдими? Менимча, дейди. Дегандан кейин ўзаро «жанг» бошланмайдими?

Кўриняптики, қаҳрамонлар анча мураккаб муҳитга, мураккаб вазиятга тушиб қолган ва бу ерда бирорнинг мутлақо бегуноҳ ёхуд мутлақо айбор эканлигини аниқлаш мушкул. Пировардида ҳам Акрам, ҳам Сайёра тарсаки «тарихида» айбор деган хулоса келиб чиқади. Ёзувчининг ўзи эса нима учундир Сайёрага аксари ҳолларда кир юқтирасмаслик пайда бўлади. Унинг қаҳрамон фазилатларини бўртириб кўрсатишга, аксинча, камчиликларини «юмшатиши»га интилишини қандай изоҳлаш керак?

Саволга тўғри жавоб қайтариш учун яна бир муаммони ечиш керак бўлади: Сайёра характеристининг мусбат ва манфий томонлари нимадан иборат, улар Одил Ёқубов томонидан қандай ёритилган?

«...Сайёра йил севгисидан пушаймон қилмайди, шунчаки ўшанда ёшлиқ қилганидан, бир-икки йил ўйнаб қолиш ўрнига, биринчи курсни битирар-битирмас турмушга чиққанига ўкинади, холос... Бу хато унинг бошига кўп савдоларни солди. Иккинчи курсни битирмасданоқ ҳомиладор бўлиб, Политехника институтини ташлашга мажбур бўлди... Рост, кейин медицина институтига кирди».

У нима учун биринчи курсдалигида оила курди? Мұхаббати, севгиси соф, мусаффо, зўр бўлгани учун шундай қилдими?

Қиссада бунга «ҳа» деб жавоб берилади.

Шундай бўлса, нима учун Сайёранинг турмуш қургани «хато» деб баҳоланипти? Ва бу «хато» эвазига институтни ташлаб кетишга мажбур бўлди, дегани нимаси?

Бундан ташқари, қаҳрамон нима учун Политехника институтига кирди-ю, уни осонгина тарк этиб, шифокорликка ўтиб кетди?

Мана, ёзувчининг жавоби: «Раъий бўлмаса ҳам осонроқ бўладими деб кирди».

Тўғри, бир қанча қизлар (йигитлар ҳам!) истеъододи, қобилияти бор-йўқлигига қараб эмас, балки «осон-қийин»лигига кўра институт танлайди, аммо Сайёра шундайларданми? Агар шундайлардан дейилса, унинг ақлли, адолатли, виждонли жувон тарзида таърифланганини қандай тушуниш мумкин?

Бу муаммолар бошқалари олдида ҳеч гап эмас. Жумладан, мана бунга диққат қилинг: «Лекин шундан кейин бошига ҳам эрининг ташвиши тушди, ҳам бола, ҳам институт ташвиши. Девонафеъл эр девоналигини қилди. Зафарга ўҳшаганлар уч йил деганда ўйнаб-кулиб ёқлаган диссертацияни беш йил деганда аранг ёқлади, ўшанда ҳам кафедрадагилар билан келишолмай, лойиҳа институтига ўтиб кетди. Лекин «принципиаллик қиламан», деб у ерда ҳам иши юришмади». «Девонафеъл эр» — бу ибора нимани англатади? Агар оиласига, хотинига, муҳаббатига жиддий қарамайдиган, ҳаёт билан эмас, қандайдир хаёллар билан яшайдиган одам деган маънони билдирса, бу Акрам характеристи мантиғига, у тўғрисидаги тасаввувимизга мос келмайди-ку?! Ахир, қаҳрамон ўзининг кечинмалари, хатти-ҳаракатлари, интилишларига кўра девонафеъл эрга ўҳшамайди-ку?! Еки Сайёра унга туҳмат қил-

яптими? Ехуд бу гапларни аччиқ устида айт-яптими?

Севги билан оила қурдим деган аёлнинг турмуш ўртоғини «девонафеъл» деб таърифлаши негадир ёпишиб тушмаётир. Аммо унинг бошқа фикрлари янада ажабланарли. Чунончи, эрининг беш йилда кандидат бўлганидан шикоят қиласди, «ўйнаб-кулиб» уч йилда илмий даражага эришган Зафардан завқланади, унга ҳавас қиласди.

Қизиқ, «ўйнаб-кулиб» диссертация ёқлаш деганда нимани тушиниш керак? Агар қийналмай, тер тўкмай, тўсиқларни бартараф этмай ишини қойиллатиш назарда тутилса, бу чинакам олимлик эмас. Шунинг учун биз уч йил ичидаги «ўйнаб-кулиб» фан кандидати бўлган Зафарга миннатдорлик туйғуларини изҳор этгимиз келмайди. Аксинча, беш йилда шу даражага аранг етган Ақрамга ҳурматимиз ошади. Негаки, у ўз фикри, мустақиллигини ҳам илмада, ҳам амалий ишида намоён қилишга интилган вәшунинг учун «принципиаллик қиласман» деган, айтганларини ҳаётга тадбиқ этишга эришган, натижада келишувчилик йўлидан бормаган. Бунинг учун унинг устидан кулиш инсофданми? Ҳолбуки, Сайёра ҳақиқат тантанаси учун курашган ҳалол, софдил эри устидан кулаётганга ўшхайди: «Аспирантурага у билан баравар кирган Зафар Ленинградда диссертация ёқлаб келиб, институтга бош архитектор бўлди, қанча-қанча талантли лойиҳалар яратди. Мана, мукофотлар оляпти, тагида шахсий «Волга». Ақрам бўлса... энди бир устахонанинг бошлиғи бўлди».

Шахсий «Волга». Мукофотлар. Юқори мансабга кўтарилиши...

Албатта, булар ўз-ўзича ёмон нарса эмас. Ҳамма гап уларнинг келиб чиқиш манбаидар. Борди-ю, манглай теридан, меҳнатдан ортирилган «Волга», қимматбаҳо неъматлар бўлса, уларга ким қарши чиқади?!

Сайёра эса «Волга»ларни ва «Волга»ларни орзу қиляпти-ку?! Мехр-муҳаббат, бахт-саодат, инсонийликни баъзан мансабга боғлаб қўяяпти-ку?

Айрим асарлардаги баъзи ижобий қаҳрамонлар кечаю-кундуз тер тўкади, ишлаб чиқариш планларини юз-икки юз фоиз ўринлатади, лекин яхши ейиш-ичиш, кийинишга, енгил машиналарга нафрат билан қарайди ва бу билан ўзларини замонамизнинг чинакам маёқлари, деб кўрсатишга уринадилар. Аслида шундаймикин?

Иўқ, аслида улар айрим ёзувчиларимизнинг «буйруғи»га кўра шундай фикрлайди, шундай ҳаракат қиласди. Ахир, инсон инсонлигини йўқотмагунча ҳаёт ёғусидан баҳраманд бўлишини тарк этмайди-ку! Ҳаёт ёғуси эса ҳам маънавий, ҳам иқтисодий хазинанинг мўлкўллиги демактир. Зотан коммунистик таълимот шахснинг ҳар томонлами — иқтисодий ва маънавий жиҳатдан равнақ топишини тақозо қиласди. Орзуга айб йўқ, дейдилар. Лекин ҳар қанақа орзу инсон бисотидаги бебаҳо бойлик бўла олмайди. Чунончи, Сайёранинг «Волга»ларга, «Волга»лиларга муштоқ бўлишини қоралаш керакми? Унинг орзуси беозорми? Кимнингдир ҳамиятига, обрўсига доғ туширмайдими?

Хулоса чиқаришга шошилмай, Сайёранинг мана бу сўзларини «ҳазм» қилиб кўрайлилек: «У кишининг ҳали директор бўладиган қобилиятлари бор эканми? — деб пичинг қилди».

Гап диссертациясини беш йилда «аранг ёқлаган», атиги «устахонага бошлиқ бўлган» Акрам ҳақида, жуфти ҳалоли ҳақида кетаётир. Яна шунга диққат қилингки, бу гап Акрамнинг севган хотинига тегишили. Шуни билганингиздан кейин негадир этингиз жунжикиб кетади: наҳотки шу пичинг ўринли бўлса?! Наҳотки яхши кўрган эри ҳақида шундай гапирса?!

Сайёра эрининг юксак лавозимни эгаллагани учун аҳён-аҳёнда мунғайиб пушаймон еб ёки фижиниб гапиришига хайриҳоҳ бўлишийин.

У Акрамнинг ҳам илмда, ҳам ҳаётда буюк бўлишига умид боғлаб эр қилганга ўхшайди. Лекин қайси аёл ўзининг эри даҳо бўлишини истамайди? Қайси хотин обрўли эри эвазига обрўли бўлишни, шон-шуҳрат орттиришини хоҳламайди?

Кўпгина хотин-қизлар шу зайлда мулоҳаза юритади, аммо уларнинг барчаси истаклари бажо келтирилмаса, буни писандаги қилиб, эрларига зулмини ўтказади, заҳрини сочади, деб бўлмайди. Эс-хушли, инсофлилари борига шукр қиласди, борини эъзозлади.

Тўғри, улар ҳам янглишади, қийналган чоғларида эрларини шон-шуҳрат орттирмагани учун «арралайди», лекин бунинг нотўғри эканлигини сезиб, ўзлигига қайтади. Сайёрачи?

«— Дадажон, гапимга ишонинг,— деди Сайёра ёлвориб.— Сизнинг сўзингизни ерда қолдириш мен учун ҳам оғир. Күёвингиз... нимасини айтай, бошда мен уни... жуда яхши талантли, жуда бўлакча бир одам деб ўйловдим...

— Мен ҳали ҳам унинг жуда.. пок, яхши йигит эканига ишонаман. Хондан ҳам хато ўтади дейдилар, қизим.

— Гап хатода эмас, дадажон! Унингиз шунчаки бир... жўн одам экан!»

Айтайлик, Сайёра жаҳл устида шундай фикр юритяпти. Ҳижрон аламига чидай олмай, ўзини оёғости қилган деб ўйлаб, эрининг жўнлигидан нолияти.

Такрорлайман: қаҳрамон шундай деб ўйлаши, гапириши мумкин, лекин бунга ёзувчи қандай қарайди? У Сайёранинг ноҳақ эканлигига шама қилмайдими? Унинг Акрамни қоралаши асоссиз эканлигини қандайдир йўллар билан кўрсатмайдими?

Афуски, Сайёранинг хатти-ҳаракатлари маъқулланётгани ёки маъқулланмаётгандиги баъзи ўринларда сезилмай қолади. Айrim ҳолларда эса, Сайёранинг Акрамга «ҳадя» қилган пичинг-кесатигларини муаллифнинг ўзи қўллаб-қувватлаётгандай туолади. Бундан ташқари, Сайёра эри билан у катта мансабга кўтарилишини эшигандан кейин ярашишга мойиллик билдириди, дегандай маъно ифодаланган. Лекин пировардида қаҳрамон характеристидаги бир қанча фазилатларни ундағи баъзи этишмовчиликлар, бир ёқламаликларни таъкидлаб гавдалантиришга олиб келади.

Қанақа фазилатлар? Аввало шуки, Сайёранинг бизга фазилат бўлиб кўринган хусусиятларни айrim мунаққидлар ниҳоятда салбий ҳодисага йўйганлар. Улардан бири қуидагиларни ёниб-куйиб уқдиради: «Сайёра — енгилтак... Сайёра — эркатой... Сайёра енгил ҳаётга, ёшлар билан кўнгил очиб юришга ўрганган... Ёзувчи унинг бутун ножӯя қилиқла-

рини худди хайрихоҳдай тасвирлайди, унинг хатти-ҳаракатлари нотўри эканлигига шама қилмайди» («Шарқ юлдузи», № 2, 1970, 212 — 213-бетлар).

«Сайёра кирган йўл хатарли йўл эди,— деб ёзади яна бир мунаққид,— у жиддий оқибатларга олиб келиши керак эди, қисман шундай ҳам бўлади, бироқ оқибат-натижага кутилган даражага бориб етмайди...» («Ўзбекистон маданияти», 30 октябрь, 1970 йил).

Фаҳмлашимизча, Сайёранинг гоҳида ўзини ҳали турмуш қурмаган танти қиздай тутиши, эри бўлатуриб, бошқа йигитларга қизиқиши, ҳатто уларнинг севиб қолишни хоҳлагани («Наҳот муҳаббат изҳор этса?!» «Шавкатжон белини қаттиқроқ қисганини сезган Сайёра юраги ўйнаб, тирноқларигача жимиirlаб кетди») ахлоққа хилоф деб топиляпти.

Аслида шундаймикин? Айтайлик, кампир қизлик даврини, гул-гул яшиаб юрган пайтини қўмсаб, ўзига кўп йигитларнинг ошиқ бўлганини, баъзиларга ҳавас билан боққанини, баъзиларни ёқдириб қолганини, аммо пировардидага биттасига кўнгил қўйгани, унга хиёнат қилмаганини кўз ўнгидан бирма-бир ўтказса, буни ахлоқсизликка йўйиш мумкинми? Шунга ўхшаш Сайёра ўзининг қадди-қомати, гўзаллигига ўзи маҳлиё бўлиб, бир оз эркин ҳаракат қилса-ю, бироқ хиёнат кўчасига қадам босмаса, бунинг нимаси ёмон?

Аёл борки, биттасига бутун умрини бағишлайди, бошқасини ҳеч қачон ўйламайди. Аёл борки, биттасига муҳаббат қўйган, биттаси билан яшайди, бироқ севгилисини ўзгаларга қиёслайди, аразлашганда ундан воз кечишига, иккинчи ёр топишга мойил бўлади, аммо мақ-

садини амалга оширмайди, ошириш учун интилмайди ҳам. Шунга кўра уларни бузуқи деб бўладими!?

Асарда таъкидланадики, Сайёранинг фикр доираси кенг. Шундай бўлгач, у ҳар хил ҳодисалар ҳақида ўйланмасинми? Обрўли, истеъоддли эрни орзу қиласди. Акрамнинг шу даражага етолмагани учун куйинади, изтироб чекади. Ҳатто шон-шуҳрат чўққисини эгаллаган одамга кўнгил қўйишдан чўчимайди, шу ҳақда бош қотиради, орзу қиласди, лекин орзулари, ўйларини амалга ошириш учун курашмайди. У ҳар қандай шароитда ҳам Акрамга бўлган муҳаббати, оиласи, қизи олдидаги масъулиятни, бурчни эсдан чиқармайди. Шундай бўлгач, Сайёрани «енгилтак»лика, бузуқиликда айблаш мумкинми? Ахир, у ўзини жарликка қулашдан асраб қолди-ку! Ахир эрига, қизига, оиласига хиёнат қилмади-ку?!

Мана шу хусусиятлари билан Сайёра Кумушбиби, Гулнор, Жамила, Саидалардан ажралиб туради. Шу хусусиятлари билан менга у оригинал, янги образ бўлиб гавдаланяпти. Лекин унинг тузалиб кетиши, маразлардан халос бўлиши асосланганми?

«Қанот жуфт бўлади»нинг хотимасини назарда тутиб, Сайёранинг оиласига қайтиб келишини шарҳлаб, Умарали Норматов қўйидагиларни таъкидлайди: «...бироқ оқибат-натижага кутилган даражага бориб етмайди, асар қаҳрамони (яъни, Сайёра) гўё ўща хатарли йўлда довоннинг чўққисига кўтарилимай туриб, орқага қайтади, ёзувчи муносабати бирдан ўзгаради, вазиятни юмшатиш, қаҳрамонни қайта тарбиялаш эр-хотинни келиштириш билан банд бўлиб кетади, натижада образнинг, бинобарин, бутун асаннинг таъсир кучи

сусаяди...» («Ўзбекистон маданияти», 30 октябрь, 1970 йил).

Асарнинг қандай бошланиши, ундаги во-кәаларнинг ривожланиши, хотиманинг мазмунини ҳаёт белгилайди, характер мантири аниқлайди. Ахир вазиятни юмшатишга, қаҳрамонни қайта тарбиялашга, эр-хотинни ке-лиштиришга объектив ва субъектив сабаблар, турмушнинг ўзи даъват қиласа, бунга қаршилик кўрсатишдан не фойда? Бинобарин, ҳамма гап қаҳрамон характерининг мантири ва унинг ҳаётий асосида.

Шу жиҳатдан қараганда Сайёра характеристи қандай мазмун касб этади? Унинг «исён» кўтариб, пировардида қилмишига пушаймон қилгани далилланганми? Нима учун «исён» оилани парчалашга эмас, балки мустаҳкамлашга олиб келди?

Аввало шуки, ёзувчи қаҳрамонлар ўртасидаги «совуқ» муносабатлар доимий эмас, балки муваққат сабабларнинг оқибати эканлигини уқдиради. Ахир улар бир-бирлари билан юз кўришмайдиган бўлиб жанжаллашмадилар-ку! Борди-ю, эр-хотин орасидаги илиқлиқ «музликка», меҳр-муҳаббат ғазабга, нафратга айланса, ҳаётга қараши, фикрлаши жиҳатидан бири осмон бўлиб, иккинчиси ер бўлса, бири олов бўлиб, иккинчиси сув бўлса, балки муросага келмас эди. Ҳолбуки Акрам билан Сайёра бир-бирларига ёш жиҳатдан ҳам, фикрлаш жиҳатдан ҳам монанд.

Шундай экан, нима учун эр-хотин доимоғиз-бурун ўпишиб яшайверишмайди?

Маълумки, дунёда бир-бирига мутлақ ўхшайдиган, бири иккинчисидан асло фарқланмайдиган одамлар бўлиши мумкин эмас. Би-

нобарин, Акрам билан Сайёра ўртасида қандайдир тафовутлар мавжудки, келишмовчилик пайдо бўлади. Ўша тарсаки бу имкониятни юзага чиқарди, лекин қаҳрамонлар тўқнашувига уларнинг характеристидаги тафовутларгина сабаб бўлдими?

Одил Ёқубов масаланинг шу томонига алоҳида эътибор бериб, тортишувнинг келиб чиқишида, авж олишида фақат субъектив омилларгина эмас, балки объектив шарт-шароитлар муайян роль ўйнаганини ёритишига интилади. Тугуннинг учини мана бу мулоҳазалардан излашга даъват этади: «Қачон у бунчалик ўзгарди? Нега бундай бўлди? Нега? — деди Акрам, деди-ю, ўзидан фижинди.— Профессорнинг тантиқ қизи — унга шон-шуҳрату, бошқача турмуш керак эди. Бошдан шоҳона уйларда яшаб, шахсий «Волга»ларда юрадиган машҳур кишининг хотини бўламан, деб ўйлаган эди. Бу орзуларнинг биттаси ҳам рўёбга чиқмади. Менга ўхшаш оддий тўпори одамни бошига урсинми?— деди Акрам, лекин жаҳл устида ноҳақ ва бачканга хаёлларга бораётганини сезиб, кинояли кулимсиради.

Тўғри, аччиғлангандан кейин «аччиқ» сўзлар чиқяпти, аммо уларда жон бор-ку?! Акс ҳолда эр-хотин ораларидаги келишмовчилик бунчалик жиддий хавф туғдирмаган бўлур эди, лекин «тантиқ» аёlda заковатли юрак ҳам уриб турибдики, бундан кўз юмиб бўладими?

Сайёра характеристида ҳаётга бир ёқлама қарав билан бирга шахсий ва ижтимоий муаммоларни ечишда етти ўйлаб бир кесишига интилиш мавжуд.

Ёзувчининг Акрам характеристидаги ўзга-

ришларнигина эмас, балки Сайёранинг тўғри йўлга тушишини синчковлик билан таъқиб қилиб бориши бежиз эмас. Жумладан, Сайёрадаги «минуслар» барҳам топа боришини асослаш учун жиддий далиллар кашф этилади. Мана, улардан бири: «Сайёра кечалари унинг эҳтиросли оғушларидан, қон-қонини кўпиртирадиган бўсаларидан чарчаб мастона ётarkan, бу баҳт чексиз-чегарасиз, ўз муҳаббати эса офтобдай абадий туюлар, гоҳо бу баҳтдан айрилиб қолишдан чўчиб, кечалари уйғониб кетар ва тонг отгунча Акрамнинг қўлларини ушлаб ётарди».

Оилавий ҳаётнинг назокати, лаззатини шунчалик ҳис қилган аёл турмушининг бузилиб кетишини хоҳлайдими?! Борди-ю, Сайёра Акрамни севмаганида, у билан дастлаб яхши яшамаганида, пировардида оилавий жанжалнинг эзгулик билан яқунланиши амримаҳол эди. Аммо доимо апоқ-чапоқ бўлиб юриш, ҳар қандай шароитда ҳам аччиқ сўз айтишдан ўзини тийиш, нуқул шодлигу қувончлар оғушида яшаш мумкинми?! Эр-хотиннинг уриши дока рўмолнинг қуриши деган нақлда ҳеч қандай асос йўқми?! Бироқ ким жанжал бўлмаса-ю, фақат тинч-тотувлик ҳукмронлик қилса, ҳаммаёққа нур ёғилиб турса демайди?

Бундай орзу ва истак, айниқса, қийналган, чарчаган чоғларда авжига чиқади. Сайёра ҳам шундай вазиятда қуйидагича мулоҳаза юритади. (У ўзини учинчи шахс ўрнида қўйиб галиради): «Аттанг, шу маҳалгача... ҳаётнинг, ёшликтининг қадрини билмаган бир гўдак экан! Гўдак бўлмаса шу ҳусн-латофати билан ўн тўқиз ёшида турмушга чиқармиди? Ақалли

институтни битиргунча ўйнаб-кулиб олса бўлмасмиди? Ҳаётнинг гаштини ҳозирги қизлар билишади».

Ўйнаш-кулиш! Ҳаётнинг гаштини суриш!

Бу, албатта, кўпчилик интиладиган нарса, лекин ҳаёт гаштини ким қандай суради, ким қайси маънода тушунади?

Одил Ёқубов Сайёранинг аҳён-аҳёнда даврон суриш, ялло қилиб юриш, жонни оғримасдан ўзига роҳат баҳш этишга интилишни қайд этади. Ахир, қаҳрамоннинг киноактриса бўлиш, шуҳрат қозониш йўлига ўтиши бежиз эмас! Аммо қаҳрамоннинг санъаткорлар даврасига қўшилиши ҳар томонлама пухта, чуқур асосланган дейиш қийин.

Акрамнинг ўша қишлоқда туғилиб ўслани, ота-оналариникига, мактабдош дўсти, кейинчалик раислик лавозимига кўтарилган Туробжонларникига тез-тез бориб туриши, ўша ердаги клуб лойиҳасини яратиши, лойиҳа асосида бино қад кўтартгани ишонарли тасвирланади. Сайёранинг бир «юмалаб» киноактриса бўлиб қолиши-чи?

Бир жиҳатдан унинг санъаткорларга қўшилиши шубҳа уйғотмайди. Негаки, эри меъмор, санъаткор ва у бу соҳага бефарқ қарамайди, деб ҳисоблаш мумкин. Бундан ташқари, дугоналари, дўстларининг аксариси киночилар билан бевосита ёки бавосита алоқада бўлади. Аммо шуларнинг ўзи Сайёрани экранда образ яратишга даъват этадими? Шуларнинг ўзи бир соҳани ташлаб, иккинчисига ўтишини тақозо қиласдими?

Қиссадан англашиладики, Сайёрада бу хил истеъдод йўқ, у оилавий можаро оқибатида киночилар билан ошно бўлиб қолди. Аммо

унинг фильмда бош қаҳрамон образини олиб чиқиши учун бундан ҳам муҳимроқ, қимматлироқ, салмоқлироқ асос бўлиши лозим эди. Ёки Сайёра айрим гўзал қизлар сингари актриса бўлишни ёшлиқдан орзу қиласмиди?

Унинг киночиларга муносабати ҳақиқатдан йироқ демоқчимасман. Одил Ёқубов қаҳрамон билан эри ўртасидаги «жанг»нинг кўпгина белги-аломатлари ўша фильм асосига, сценарийсига мос келишини кўрсатадики, бунга умуман умид билан қарамиз. Аммо Сайёра билан кино санъати, киночилар ўртасида боғланган «ип»— мантиқий тугун асло «узилиб» кетмайдигандай мустаҳкам эмас. Асосий тугун, етакчи сюжет-чи? Уларнинг айрим тармоқларига «дарз» кетган, лекин яхлитлигича ҳаётий чиққан. Сайёранинг пировардида ўз нуқсонларини англаши, муҳаббат эркинлигини, оиласвий бурчни бир оз суиистеъмол қилганини сезиши ва тўғри йўлга тушиши шубҳа туғдирмайди. Бунга ишонч ҳосил қилиш учун мана бу фактлар, мана бу воқеаларга диққат қилинг: дастлаб Сайёра фильмдаги фикрлар, туйғулар, ҳодисалар оқимиға «шўнғиб» кетгандай бўлади, негаки, унда ўзи билан эри ҳаётидаги юз берган ножӯяликка ўхшаш «афдар-тўнтар»лар қаламга олинган, аммо бора-бора сценарийдан совиди, ролга «киролмай» қолади, айни чоқда ўзининг картинасида образ яратишга енгиб бўлмас зарурат, чинакам истеъдод борлиги учун эмас, балки бошқа ният билан (уни қўлга олиш учун режиссёр атайн «қармоқ» ташлаган эди!) таклиф қилинганини билади-ю, ўзгара бошлайди: «Ҳа, дадаси ҳақ, унинг, йигирма олтига кирган, бола кўрган бир аёлнинг арти-

стка бўлиб, шон-шуҳрат қозонаман дейиши... чиндан ҳам енгилтаклик эмасмикан? Дадаси айтмоқчи, чин артист бўлишга унинг истеъоди етармикан? Агар у истеъододли бўлса... Нега **бу** ишга киришмасдан туриб совий бошлиди. Ахир... бу даврада ўтирганларнинг шодхуррамлиги, уларнинг орзу-умидлари, Никуларнинг қувончи ва рашки — ҳаммаси унга қандайдир ёт-ку! Ҳатто унинг шаънига айтилган мақтовлар ҳам уни ҳаяжонга солаётгани йўқ-ку!

Бора-бора ундаги иккиланиш ишончга айланади ва бу ишонч актёрликдан воз кечишига мажбур қиласди. Ундан кейин-чи? Сайёра ўзини осмондаги ойман, деб ердан, она ердан узилиб қолганини сезади, аммо отдан тушса-да, узангидан тушгиси келмайди, яъни узр сўраб эри олдига бормайди. Худди шу пайтда ёзувчи Уларни учраштиради ва бу учрашув янга висолга, баҳтга йўл очади. Шундай экан, конфликтнинг ярашув «битими» билан якунланиши ҳақиқатга зид келади деб бўлмайди.

Одил Ёқубов характер мантиғига, ҳаёт ҳақиқатига қарама-қарши ўлароқ вазиятни юмшатган, драматик тўқнашувларнинг ечимида нуқсонга йўл қўйган, эр-хотинни яраштириб қўймаслиги керак эди, деёлмайман. Бироқ таъна қиласидиган ўрнимиз бор: эр-хотиннинг қайтатдан қўша қариши, чигалликлар ечими бир оз тезлаштириб юборилган. Ҳаттоки, қарама-қарши тарафларни, яъни Акрам билан Сайёрани тезроқ яраштиришга интилгандай ҳаракат қиласди ёзувчининг ўзи. Сайёранинг роль ўйнаётгандага йиқилиб кетиб оёғидан лат ейиши, касалхонада даволаниши ва худди шу пайтда эри билан учрашуви атайн «уюштирилган»га ўхшайди.

Лекин шу тахлитда фикр юритиш мүмкінми? Ахир, асардаги воқеалар харakterларнинг мантиқий ривожи ёзуви томонидан «уюштирилмайдими?»

Ха, «уюштирилади», факт ва ҳодисалар бир-бирига «уланади», лекин шундай уюштирилиши, шундай уланиши керакки, ҳеч қандай сунъийлик, зўрма-зўракиликка йўл қўйилмасин, барчаси табиий, ҳаётий бўлсин!

Асардаги бадиий тўқималар реал ҳаётнинг ўзидаи табиий ва ҳаққоний бўлиб гавдаланади, (айрим истиснолардан ташқари) бироқ бу фақат эр-хотин муносабатлари, интим ҳаёт тасвиридагина кўринадими?

«Қарс икки қўлдан чиқади...— дейди Сайёрага дадаси,— у ҳозир жуда ээзилиб юрибди. Шундай пайтда... инсоний масъулият, бурч, адолат деган гап бор. Қанот жуфт бўлади, битта қанот билан қуш парвоз қилолмайди, қизим, Қим билсин, сен ҳозир дўстлик қўлини чўзсанг, қийналганда суюсанг, ёрдам берсанг, балки у ҳам қаддини тутиб олар. Институтда ҳам ишларининг мазаси йўққа ўхшайди».

Бундан чиқдикни, қисса эр-хотин бир-бири сиз яшай олмайди (қанот жуфт бўлади, дейилганда шу маъно англашилмайдими?) деган фикрни ифодалаш учун ёзилган экан-да? Йўқ, Одил Ёқубов оиласи бурч, масъулият, адолат, муҳаббатдаги софлик, садоқат, қалбдаги ноёб ва нодир туйғулар пировардида ижтимоий тараққиётни ҳаракатга келтирувчи омиллар бўлиб ҳисобланади, аксинча, жамиятнинг маънавий-иқтисодий асоси қай даражада мустаҳкам бўлса, ўssa, равнақ топса, шахсий фаолияти, севгининг чинакам баҳт-саодатга, ёрқин турмушга олиб келиши шу даражада тезлашади

шу даражада юксак мақсадни амалга ошириш учун имкон яратилади, деган фикрни ҳимоя қилади, худди шу фикрни қаҳрамонлар фаолиятига сингдириб юборишга итилади. Бу севги тарихи, оиласи «жанг»лар тасвирида гина эмас, балки Сайёранинг киночилар билан, Акрамнинг меъморлар ва колхоз раиси билан тўқнашувида ҳам намоён бўлади.

Мана шу тўқнашувлар «Қанот жуфт бўлади»нинг салмоини оширган, унда ижтимоий оҳангнинг баландроқ жаранглашини таъминлаган, айни чоқда ёрқин қиёфадаги харakterларни намоён қилган. Кинорежиссёр Шавкатжон, меъмор Султон ва колхоз раиси Туробжон шулар жумласидандир. Лекин шуниси харakterлики, учала шахс ҳам иккинчи даражали қаҳрамонлар, аммо уларсиз «Қанот жуфт бўлади»ни тўлақонли асар деб бўлмайди.

Шавкат ҳам, Султон ҳам, Туробжон ҳам айрим эпизодларда ҳаракат қилади, бироқ ҳаққоний, ҳаётий образ сифатида улар Акрам, Сайёralар билан «мусобақалашган»да ютса ютиб чиқади-ю, аммо ютқизмайди!

Одил Ёқубов талқинида Шавкат шунчаки ахлоқсиз, енгилтабиатли йигит сифатидагина эмас, балки шахсий ҳаётдаги бетайнлиги, бузуқилигини санъатга — ижтимоий фаолиятига кўчирган юзи ялтироқ, ичи чиркин, манфур шахс тарзида гавдаланади. Ахир, ўзини ниҳоятда маданиятли, истеъододли санъаткоргина эмас, балки ажойиб қалб эгаси қилиб кўрсатишга зўр бериб уринган, шу туфайли Сайёра ни йўлдан урмоқчи бўлган одам шу Шавкат эмасми?! Ахир, шу ниятини амалга ошириш учун фильмдаги фожиани оддий баҳтсизлик,

омадсизлик деб ишонтиromoқчи бўлган, айшишрат суриш мақсадида ҳақиқатга, санъатга хиёнат қилган режиссёр шу Шавкат эмасми?!

Қандай таъсиран, ҳаётий образ!

Шавкатнинг бадиий тип тарзида ўзини «намойиш» қилиши учун ёзувчи унга ҳар хил маразларни «ёпиширавермайди». Унинг муайян фазилатларга бегона эмаслиги, шарт-шароитнинг мураккаблигига қараб иш тутувчи, пайтида муроса қилувчи, пайтида ҳужумга ўтувчи айёр, яшовчан, изланувчан эканлиги таъкидланади. Лекин таъкид қанчалик аниқ, ёрқин, ҳаққоний бўлмасин, барибир бадиий таҳлил эмас!

Шу жиҳатдан Туробжон образига назар ташлар эканмиз, унинг характерида колхоз раҳбарига оид мураккаб мулоҳазалар, қарама-қарши туйғулар мужассамлаштирилганини кўрамиз; унинг фаолияти, хатти-ҳаракатлари қаламга олинган эпизодларни кўздан кечирад эканмиз, гоҳо кўпчилик манфаати учун ўзини аямайдиган, барча куч-қудрати, имкониятларини фидо қиласдиган, гоҳо қийин шароитларда ҳам ўзига кир юқтиромайдиган, сувдан қуруқ чиқадиган колхоз раиси гавдаланади. Баъзан шу хусусиятлари билан «Синчалак»-даги Қаландаровни эслатади, бироқ у Абдулла Қахҳор қаҳрамонидан кўчирилган нусха эмас. Одил Ёкубов «қаландаров»чиликнинг бизнинг замонамиздаги янги хусусиятларини кўра билган ва оригинал тип яратишга интилган. Фикримизни ойдинлаштириш учун мана бу сўзларнинг мағзини чақиб кўрайлил: «Биз... правление деганда Туробжон Икромов деб биламиз. Туробжон Икромов деганда... правление деб биламиз».

Ким бундай деяпти? Жавоб берамиз: Туробжон Икромовнинг ўзи! Наҳотки «Қанот жуфт бўлади» даги раис шу зайлда фикр юритяпти? Бу балки Қаландаровнинг ўша ерда кезиб юрган руҳидир?

Ха, қисман шундай. Туробжон ҳам Қаландаров сингари деҳқончилик илмини миридан-сиригача билади, ернинг тилига тушунади, бир қанча ҳолларда ўзбошимчалик билан иш тулади, ҳеч кимнинг фикри билан ҳисоблашмайди (правление деганда ўзини, ўзи деганда правленини тушуниши бежиз эмас-ку, ахир!) Мансабини худди «Синчалак» қаҳрамони сингари чин қалбдан севади, унга гард юқтиромаслик фамини ейди, ҳатто шу мақсадда ёлғоняшиққа, кўз бўямачиликка йўл қўяди. Лекин асл моҳияти билан Туробжон Қаландаровдан ажралиб туради, фақат исм-фамилияси билангина эмас. Туробжонда Қаландаровдаги ўжарлик, билиб-бilmасдан ўзини ўтга, сувга уриш одати йўқ. У узокни кўришга, ҳар бир воқеага илм кўзи билан қарашга қодир. Мухолифига пайтида «ҳужум» қиласди, пайтида «ҳимояга» ўтади. Унинг бу сўзларига диққат қилинг: «Сизнинг нима мақсадда келганингизни билиб турибман, ука. Аммо лекин колхоз ҳаёти билан атрофлича танишмай, фақат ўша масала билан чекланиб қолсангиз... ёзган нарсангизда қора бўёқлар кўпайиб кетмасмикин? Фоявий жиҳатдан тўғри чиқармикин ёзган мақолангиз?»

Бу раиснинг уни танқид қилмоқчи бўлган журналистга жавоби. Қаранг-а, «қора бўёқлар», «фоявийлик» ҳақида мулоҳаза юритяпти! Қаландаров бундай мушоҳада юритолмасди. «Яхши», «ёмон»ни биларди-ю, аммо масала-

нинг моҳиятини ҳар жиҳатдан чуқур англашга қодир эмасди. Туробжон бу борада ундан анча ўзб, илгарилаб кетган!

Одил Ёқубов раиснинг гоҳо ўз мансабини сунистеъмол қилишини ҳам, гоҳо сидқидилдан, чин юракдан вазифасини адо этишини ҳам кўрсатишга ҳаракат қиласи ва бу ҳаракат бир қанча ҳолларда зое кетмайди. Энг муҳими, Туробжон фаолияти, хатти-ҳаракатлари, изланиш-интилишлари Акрам учун мисли бир кўзгудай унинг фазилатларини ҳам, айрим камчиликларини ҳам гўё янгича шароитда, янгича шаклда намойиш қилиб тургандай туюлади. Шавкатнинг ҳақиқат тантанаси учун курашиш ўрнига маишатга берилиб кетиши, Убайнинг ўз эътиқодига кўра ҳар хил маразларга муросасиз бўлиши. Султоннинг мансаб йўлида ҳар қандай муқаддас туйғуни булғаши — барча-барчаси Акрам характерини чуқур ёритишга қаратилган. Сайёра, Ҳамида, Шоҳиста каби образлар ҳақида ҳам худди шундай дейиш лозим. Бироқ улардан айримлари ўз қиёфаларини, дунёқарашларини, кенг кўламда намоён қилолмай қолган. Оқибатда «Қанот жуфт бўлади»нинг адабиётимизда, ёзувчи ижодида катта воқеа бўладиган чина-кам кашфиёт даражасига кўтарилишига бир-мунча путур етган. Лекин асарда турмуш мурakkabliklari, зиддиятларини ёритиш орқали ҳақиқат тантанаси, коммунистик эътиқод тантанаси учун меҳнат қилишга, курашга даъват этувчи ҳаётий foя мавж уриб турганини инкор этиб бўлмайди.

Тўғри, бу foянинг мундарижа — мазмунни янада кучли, бақувват, баркамол бўлиши учун мавжуд имкониятлардан етарли фойдаланил-

ган эмас. Ёзувчи билан гоҳ баҳслашиб, гоҳ хайриҳоҳ бўлиб, гоҳ унга қарши чиқиб, ҳаётий фикрлар оламига хаёлан парвоз этасиз, парвоз муваффақиятини эса истеъдод таъминлаганига ишонч ҳосил қиласиз.

«Қанот жуфт бўлади»ни етук ижодкор яратгани сезилиб туради: воқеаларни шунчаки баён этиш эмас, балки бадиий таҳлил қилишга интилиш кучли. Энг муҳими, замондошлиаримиз фаолиятини ёритиш орқали реалистик типларни гавдалантириш, характерларнинг янги қирраларини очиш тенденцияси кўзга яққол ташланади.

Бадиий етуклик нишоналари шунда кўринадиди, Одил Ёқубов қаҳрамонлар интим дунёсининг таҳлилига ижтимоий мазмунни сингдириб юборади. Шунинг учун Акрам билан Сайёра ўртасидаги оилавий можаролар фақат бу икки шахсга, фақат ушбу эр-хотингагина эмас, балки энди турмуш қурган кўпчилик ёшларга тааллуқли эканлиги ошкор этилади. Яна шуниси диққатга сазоворки,— бугун ҳам, келажакда ҳам муҳим аҳамият касб этадиган масалалар кўтарилади. Жумладан, оила қурилгандан кейин, тўйдан сўнг ҳам севги, баҳт барқарорлиги учун курашиш керак, меъморлик, архитектура ҳам ўзига хос, санъат бўлиб, бу соҳадаги муваффақиятларга ноёб истеъдодни ишга сафарбар этиш орқали эришилади, акс ҳолда кўнгилсиз натижалар келиб чиқади, деган мулоҳазалар доимо дол зарблигини сақлаб қолади. Тор доирага оид икир-чикирлар, майдо-чуйда муаммолар эмас, балки меҳнаткаш халқимизнинг ҳаётини коммунистик эътиқод асосида қайта қуриш, ўзгартириш ва шу ўйл билан баҳтли келажак за-

минини ҳозирлашга боғлиқ проблемалар «Биллур қандиллар» қиссасида ҳам қаламга олинади.

Маълумки, асар тез муддатда ёзилди, лекин у завқшавқ билан ўқилади, кишини ўзига ром қилиб олади.

Бунинг сабабларини чуқурроқ англаш ниятида дастлаб рус адаби Евг. Богатнинг «Сабоқ» деб номланган очеркида тасвириланган мана шу вазиятни эслайлик: беш-олти қиз ўз тенгдоши, дугонасини калтакляяпти, бор куч-қуввати билан ваҳшиёна калтакляяпти. Бирини муштлаяпти, иккинчиси тепкилаяпти, учинчиси дуч келган жойига тушираяпти. Тўртинчиси... Хуллас, барчаси бир қизга ташланиб, уни эзиб, мажақлаб ташлаяпти. Ўласи қилиб дўппосланган қиз касалхонага келтирилади, лекин у нима учун бу жазога гирифтор бўлди? Аниқланишича, дугоналаридан бирини тўғрисида ундан деганимиш, иккинчиини бундай деб чақимчилик қилганимиш, холос.

Айборлар, бир жонга қасд қилганлар жиноий жавобгарликка тортилади, жазосини олади. Бироқ бу ерда йигитлармас, балки қиз болалар ваҳшийлик қилди? Ахир, улар назокату латофат рамзи эмасми?

Очерк муаллифи Евг. Богат яна бир фактга диққатимизни жалб этади: беш-олти қиз биттасини мажақляяпти-ю, буни йигирма йигитча «томуша» қиласи, улардан бир қанчаси қизни қандай қилиб дўппослаш тўғрисида «кўрсатма» бериб туради, аммо биронтаси ваҳшийликка чек қўйилсан, деб жафо чекаётганга ёрдам қўлини чўзмайди. Диққат қилинг: кимки қизни жароҳатлашда иштирок этса,

судланади, бироқ йигирма «томушабин» қонун моддасига кўра жазоланиши мумкин эмас. Шунга қарамасдан улар қаҳрамон сифатида тақдирланмайди, жамоатчиликнинг ғазаб ва нафратига учрайди. Чунки, маънавий қашшоқлик ҳеч қачон меҳр-муҳаббат қозонолмайди. Дугонасини ўласи ҳолатга келтирганлар ҳам, уларнинг қабиҳ ишини «мазза» қилиб кўрганлар ҳам ҳар хил сабабларга кўра мудҳишликка қадам қўйганлар, пировардида шуниси англашиладики, маънавий қашшоқлик деб аталган даҳшатли «касаллик»дан ҳаммасига «юққан», ҳаммаси шу «касаллик»дан ўз «улushi»ни олган. Лекин бу «улуш»нинг миқдор-мундарижаси қандай, у қачон, қандай шароитда фожиага олиб боради, умуман маънавий қашшоқликнинг пайдо бўлиш манбалари, сабаб-шартлари нимадан иборат, бу «касаллик» қандай шакл-кўринишларда ўзини намойиш қиласи — буларни аниқлаш анча мушкул. Негаки, ўша иллатга гирифтор бўлганлар албатта бироннинг жонига қасд қиласи, иккинчисига чанглал солади, учинчисини маҳв этади, деб бўлмайди. Маънавий қашшоқлик ҳаётидаги маразлар сингари турли хил қиёфада намоён бўлади.

«Биллур қандиллар» қиссасидаги воқеалар маънавий қашшоқликка алоқадор эмасдай туюлади. Асар сюжети уччалик мураккаб эмас. Унда «Сабоқ» очеркидаги фожиавий ҳолатлар ҳам йўқ дараҷада. Тўғри, «Биллур қандиллар»даги Бегимқул хотини Нибуфарга чанглал солади, жароҳатлайди, лекин тана жароҳатидан қалб жароҳати даҳшатлироқдир. Маънавий қашшоқлик эса юракларга ўқ бўлиб отилади, дилларни пора-пора қиласи, ғам-

аламлар түлқинини ҳосил қиласы. Одил Ёқубов масаланинг шу жиҳатига алоҳида эътибор беради.

Хўш, қандай ғам-аламлар ҳақида сўзланади «Биллур қандиллар»да?

Бир қарашда саволга жўнгина жавоб бериш жуда осондай туюлади: Нилюфар Ҳикматилло деган билан севишгандай бўлади, ҳатто ўпич ҳам ҳадя этади, аммо ундан айниб, Бегимқул деган Ҳикматиллонинг ўртофини эр қиласи, сўнгра янгишганини англайди-да, илк муҳаббатини қўмсагандай бўлади. Қиссанинг мазмунини шу тариқа сўзлаб бериб, мазкур жумбоқни ечиш мумкинга ўхшаб кўринади. Аслида асар моҳияти фақат эр-хотининг бир-биридан ажralиши ва шу муносабат билан туғиладиган туйғулар оқиминиги на қамраб олмайди. Аниқроғи, ёзувчи оилавий можаролар негизида муҳим ижтимоий муаммоларни кўтариб чиқади ҳамда ҳаётий, ҳаққоний образлар орқали ёритишга интилади, бу интилиш эса кўп ўринларда самарали яқунланади.

Гап инсоннинг маънавий етуклиги, руҳий баркамоллиги ҳақида кетаётир. Одил Ёқубов инсоний самимийлик, беғуборлик, софлик юксак даражадаги маданият, илм билан «пайванд»ланса, баҳт-саодат, адолат ва ҳақиқат тантанаси учун, одамнинг ҳар жиҳатдан улуғвор бўлиши учун қулай шарт-шароит, муҳит яратилади, деган фикри ҳимоя қиласи. Энг муҳими, шу фикр қаҳрамон характеристи ва ҳаёт ҳақиқати замиридаги барча зиддиятлари, мурakkabliklari билан монанд ҳолда олиб ёритилади. Шунинг учунми, «Биллур қандиллар» сюжетини ҳаракатга келтирувчи Ҳикматилло,

Нилюфар ва Бегимқулни анъанавий қаҳрамонлар сирасига киритиб бўлмайди. Уларнинг ижобий хусусиятлари, фазилатлари, камчиликлари ошириб-тошириб кўрсатилмайди, ҳар бир характеристерга хос тақорорланмас маънавий-руҳий оламнинг ижтимоий тараққиётга боғлиқ жиҳатлари ёзувчининг диққат марказида туради. Айниқса, Ҳикматилло образи кенг кўламда тасвирланади. У билан биз дунёнинг кўпгина ташвишларини бошимиздан кечирамиз, турмушнинг аччиқ-чучукларини, ширин, лаззатли, қайгули дамларини баҳам кўргандек бўламиз. Лекин Ҳикматилло доимо ўсиб борувчи, ўзгарувчи динамик характеристер тарзида гавдаланади, баъзан уни қўллаб-қувватлагинг келса, баъзан у билан баҳслашгинг, унга эътиroz билдиргинг келади. Ҳикматилло тоҳида янгишади, тажрибасизлик қилиб нуқсонларга йўл қўяди, маънавий-руҳий баркамолликка эришишда анча қийинчиликларни бошидан кечиради, бироқ Одил Ёқубов уни мусаффо қалбли, самимий инсон сифатида гавдалантиради. Қурилиш техникумida таҳсил олаётганда Нилюфар билан танишади, дастлаб улар бир-бирларига астойдил талпинади, бир-бирига меҳр қўйиша-ди. Афсуски, кўп ўтмай Нилюфар Ҳикматиллонинг қадрига етолмай қолади, аниқроғи, қиз йигитда уддабурролик, ишбилармонлик хусусиятларини тополмайди, аёл кўнглини ҳар хил йўллар орқали овлашга уқуви етишмаслигини англайди, яхши яшаш учун иқтисодий замин яратишга қурби етмаслигини кўради. Хуллас, Ҳикматилло Нилюфар орзу қилган ёрдан анча орқада эдики, уларнинг оралигига совуқлик тушади, бутунлай ажralишиб кетади.

Ҳикматилло Нилюфарнинг хато қилаётганини сезиб турди, бироқ чуқур англаб етмайди, қизни енгилтаклиқда айблайди, қўлни ювиб қўлтиққа уради. Шунинг учун биз уни бир жиҳатдан айблашимиз мумкин, лекин иккинчи томондан йигит бошқача йўлни тутолмас эди, дейишга мажбурмиз. Ҳикматилло Бегимқулнинг фирромлигини яхши билади, Нилюфарга шуни тушунтириб, кўзини очишга уринмайди. Айни чоқда шуни таъкидлашимиз зарурки, Ҳикматилло Бегимқулни қанчалик ёмонласин, қиз барибир унга ишонмасди. Негаки, у Бегимқулда Ҳикматиллодан топилмаган фазилатларни кашф этгандай бўлади ва Ҳикматилло аламидан шундай қиляпти, деб ўйларди.

Муайян вақт ўтиши билан Нилюфар шуни англайдики, у инсонийликни «биллур қандиллар»га қўрбон қилган, зебу зийнатни, молу мулкни баҳтиёрлик омили деб билган: «Бегимқулнинг... мардлигига, сахийлигига, совчилар келган бу оқ «Волга»ларга ойисидан аввал унинг ўзи учмаганмиди? Тўйдан бир ҳафта олдин Бегимқул Нилюфарни шу уйга бошлаб келганида ва у жиҳозга тўла бу хоналарни, ердаги қип-қизил гиламлар, ҳали филофдан чиқарилмаган анави сервантлар, холодильниклар, тўрда турган рангли телевизорларни кўрганида ёш боладай севиниб, қимматбаҳо буюмларни қўллари билан силаб-сийлаб кўрмаганмиди?... — Ҳаммаси яхши-ю, фақат... қандилингиз ярашмаяпти!— деб кулган эди». Сўнгра Нилюфар биллур қандилларга ҳам эга бўлади, бироқ биллурдай тиниқ, соғ кўнгиллар бир-бирларидан озиқлансангина, баҳт-саодат тантана қилишини кечроқ тушуна-

ди. Лекин тушуниши ҳам катта гап! Аслида тушунмаслиги мумкин эмас эди. Негаки, Нилюфар қалбидаги пок, самимий, гўзал туйфулар яшириниб ётган эди, Ҳикматилло билан бир йилдан кейин учрашганда мана шу туйфулар қайтадан уйғонади, жунбушга келади. Борди-ю, Ҳикматилло билан дуч келмагандা ҳамма нарса жой--жойида қолиб, Нилюфарда ўзгариш бўлмасмиди, деб қолишингиз мумкин, бироқ ёзувчи шунгя шама қиладики, бу воқеа шунчаки ташқи сабаб, бир турткি, баҳона, холос, аслида ҳаёт оқими табиий суратда қизнинг Бегимқул билан баҳтиёр бўлолмаслиги ни кўрсатади. Чунки, Нилюфарнинг маънавий дунёси эриникига асло мос келмайди, бири олов бўлса, иккинчиси сув, бири тун бўлса, иккинчиси кун, бири паастда турса, иккинчиси баландда яшайди, аммо буни на Нилюфар, на Бегимқул ўз пайтида англаб олган. Бегимқул эса умуман хотинидан анча тубан туришини ҳеч қаҷон тушунмаса керак: «Бу хотинининг турмушдан норози бўладиган нима камчилиги бор? Нима етмайди ўзи? Егани олдида, емагани кетида! Қийгани атласу ипак! Ҳеч нарсадан кам-қўсти ўйқ! Нима тиласа — ҳаммаси муҳайё! Қишлоқда у тенги қиз-келинчаклар қўллари косов, соchlари супурги, қишин-ёзин тиним билишмайди! Қишлоқни айтади, шу ерлик, шаҳарлик ёр-биродарларининг туриш-турмушиниям билади-ку, Бегимқул. Ҳаммасиям унга, хотинлари Нилюфарга ҳавас қилишади! Бу бўлса, арши-аълода яшагандай яшайдио, сира чеҳраси очилмайди. На унга — Бегимқулга кулиб боқади, на ўзи ўйнаб-кулади! Бегимқул уни уришиб ҳам кўрди, сўкиб ҳам кўрди — бўлмади. Аламидан ичиб келиб тўполон ҳам

қилди — фойда бермади. Кечаю кундуз бир нималарни ўйлагани ўйлаган, қовоғи солингани солинган».

Нилюфардаги илк бор уйғонган пок, самимий ва гүзәл түйғулар билур қандилларнинг нурида йүқөлиб кетгандай туюлади, Бегимқұл эса ҳамма нарсаны, шу жумладан муҳаббатни ҳам ўша қимматбаҳо бойлик билан ўлчайди, оқибатда Нилюфарнинг қалбига йўл тополмайди, лекин ўша қандиллар билан Нилюфарнинг кўзини қамаштириди, ўзига оғидирди, асир қилди, холос.

Ёзувчи бу учун Бегимқұлнинг ўзинигина қораламайди. Чунки, райгазда мастер бўлиб даврон сураётган бу йигит билур қандиллар ёруғида туғилған эмас, яъни молу мулкка муқкасидан кетиш унга она сути билан кирмаган, кириши мумкин эмас. Негаки, қандай бўлишидан қатъий назар, у ҳам одам, ўзига яраша ҳамияти, ор-номуси, виждони бор, бироқ муайян шароитда Бегимқұл ўзини пулга урган, юрак қўрини, билимини, куч-қудрати, имкониятларини бойликка тиккан, бинобарин, ленинча принципдан чекинилган ҳолда турмуш кечириш ҳолатлари ҳали ҳам баъзан учраб туради ва улар Бегимқұлларга қўл келади. Аниқроғи, меҳнатдан топилмаган бойлик маънавий қашшоқликнинг урчишига, авж олишига имкон туғдириб беради ва қаерда ҳалоллик, адолат, ҳақиқат тантанаси таъминланмаса, ўша жойда қабоҳатлик, мудҳишлиқ ривожланаверади. Лекин бу мудҳишлиқ, қабоҳат юқорида эслатилган «Сабоқ» очеркидагидай кўзга яққол ташланиб туравермайди. Бегимқұллар буни умуман кўролмайди. Негаки, уларнинг ўзлари маънавий қашшоқликни келтириб

чиқарувчи сабаблардан бириди. Бу «касаллик»нинг манбалари муайян шарт-шароитга бориб тақалиши «Биллур қандиллар»да алоҳида таъқидланади-ю, бироқ чуқур тадқиқ этилмайди. Яна шуниси баҳслики, Одил Ёқубов кўп ўқиб, маданий ўчоқлардан ўринли фойдаланадиган одамлар маънавий қашшоқлик балосига йўлиқмайдилар, демоқчи бўлади. Бу фикрни бутунлай нотўғри дейиш қийин. Лекин чин инсонийлик хусусиятларидан маҳрум бўлиб, соғ, мусаффо, гўзал туйғуларга қалби тўлиб-тошиб турмаган шахслар ўқиш-ўрганиш билан давримиз қаҳрамонларига, маънавий-руҳий жиҳатдан баркамол гражданларга келиб қўшилиши амримаҳол. «Биллур қандиллар»да яна нималардир етишмаслиги сезилади, бироқ Одил Ёқубовнинг бу асари чин маънодаги замонавийлик руҳи билан суғорилған бўлиб, маънавий қашшоқлик фожиаларининг олдини олишга, баҳт-саодат тантанаси учун курашга, муҳим ижтимоий-ахлоқий муаммолар тўғрисида бош қотиришга даъват этади.

Баъзи адабиётшунос-танқидчилар билан гаплашиб қолсангиз: «Биллур қандиллар»да қатор фазилатлар бор, у зўр қизиқиши билан ўқилади, ҳаётий лиризм билан суғорилған, ёзувчи қаҳрамонлар ички дунёсини, хатти-ҳаракатларини чуқур ёритишга интилади, интилиш кўп ҳолларда самарали яқунлангану, бироқ у гоҳида бирданига ловиллаб ёниб, сўнгра дарров сўниб қолган гулхандай таъсир кўрсатади, қиссада ниҳоятда оригинал, янги типлар яратилган дейиш қийин дейишади.

Бу гапларда жон бор: «Биллур қандиллар»да маънавий қашшоқлик оқибатидан ке-

либ чиққан фожиалар рўйи рост кўрсатилади, биз Нилюфарнинг «биллур қандиллар»га маҳлии бўлиб, муҳаббати, баҳтини қурбон қилганиги, Ҳикматиллонинг эса ўша муҳитни ёриб чиқолмаганлиги, ёриб чиқолмаслигини, Бегимқулнинг фақат пул, бойлики яшашнинг негизи деб билганлиги ва оқибатда боши берк кўчага кириб қолганлигини сезиб оламиз, бироқ бу воқеалар кенг кўламда чуқур тадқиқ этилмайди, конкрет кузатишлардан кучли умумлашмалар чиқарилмайди. Гап қиссанинг ҳажмини ошириш, характерларнинг хусусиятларини батафсил ёритиш ҳисобига «Биллур қандиллар»ни «семиртириш» тўғрисида кетмаяпти. Гап шундаки, Одил Ёқубов иллатлар, маразларни моҳирлик билан кўрсатади, уларнинг касридан баҳт, муҳаббат инқирозга юз тутганини ишонарли кўрсатади, лекин ўша иллатлар, маразларнинг баъзи ўринларда социалистик қонунчиликнинг бузулишига боғлиқ эканлигини мавжуд мураккабликлари, зиддиятлари билан тасвиrlашга ҳамма вақт эришавермайди. Тўғрироги, маразлар, иллатларнинг илдизлари, келиб чиқиш сабаблари деярли очилмай қолади. Аммо шуниси англашилиб турадики, аслида Нилюфарлар, ҳатто Бегимқуллар ҳам жуда иллатли шахслар эмас, улар муайян шартшароит тақозосига кўра маразларнинг урчишига, авж олишига сабабчи бўлганлар.

«Биллур қандиллар»да йўл қўйилган нуқсонларни Одил Ёқубов «Фарзандлар бурчи» туркумига кирган очеркларида «юваб» кетишига астойдил ҳаракат қилган.

Одил Ёқубов чорак асрлик ижодий фаолияти мобайнида ҳамма вақт газета-журналларда

публицистик мақолалари билан чиқиб туради, аҳён-аҳёнда очерклар ҳам ёzáди. Қўргина мулоҳазалари, кузатишлари республика матбуотидагина эмас, балки «Литературная газета» «Литературное обозрение» каби марказий газета-журналларида босилади.

«Фарзандлар бурчи»да эса ёзувчининг очеркчиликка оид барча фазилатлари мужасамлашгандай туюлди: турмушнинг ич-ичига кириб ўтирик ижтимоий масалаларни кўтариб чиқиш ва кўпчиликнинг диққатини жалб этишда ўзига хос мардлик, матонатини кўрсатди.

Бу мардлик ва матонатнинг қадр-қиммати яна шунинг учун ошадики, ҳозир ёзилаётган бир қанча очерклар ёзилади-ю, муайян вақт учун хизмат қиласди-ю, хотирамизда узоқ сақланиб қолмайди. Аксари очеркларимизда, публицистик мақолаларимизда чиройли, гўзал иборалар, қизиқ фактлар, воқеалар ҳаддан ташқари кўп фойдаланилади.

Кундаликли турмушимизда «Электр энергиясини тежанг! Сувни исроф қилманг! Ердан унумли фойдаланинг! Етиширилган ҳосилнинг бир грамми ерда қолмасин! Нонни кўзингизга тўтиё қилинг! Бир ушоғи увол бўлмасин!» деган зарур шиорлар кўп қўлланилади, тўғри қўлланилади, лекин негадир «Сўзга эҳтиёт бўлинг, ундан тежаб-тергаб фойдаланинг, заиф, ожиз, ўлиқ фикрни ифодалашга йўл қўйманг, сўз оз бўлсину, маъносилик бўлсин, сўзни сунистеъмол қилиб ўқувчининг юракбагрини тиғламанг!» деган чақириқлар кашф этилмаган. Бундай чақириқларга талаб кучли эканлигини айrim авторларнинг эзмалигини кўрганингизда ҳам, баъзи публицистик мақо-

лалар, очеркларни ўқиганингизда ҳам чуқур ҳис қиласиз. Шундай бадиий асарлар, очерклар борки, улардаги кўп ва хўб нодир сўзлар, мазмундор иборалар, гўзал жумлалар, қизиқ гаплар қалбингни жизиллатмайди, ақлингга ақел қўшиб, онгингни ўзгартирмайди, маънавий сабоқ бермайди!

«Литературная газета»нинг доимий автори бўлган марҳум ёзувчи Георгий Радовнинг қайси бир очерки ёки мақоласини ўқиманг, ўзингиз сезмаган ҳолда фикрлар «жанги»га киришиб кетасиз. Чунки, у тил бойлигини, ифода ранг-баранглигини ҳаётнинг фоятда мураккаб, зиддиятли, фоятда жўшқин, жанговор дамларини ёритишга сафарбар қилади, сўзлар, иборалар, жумлалар қишлоқ ва шаҳар аҳолисига сув ҳамда ҳаводай зарур бўлган ижтимоий муаммолар таҳлили учун моҳирона ишлатилиди. Аниқроғи, Георгий Радов Владимир Тендряков, Борис Можаев, Гавриил Троепольский, Михаил Рошчин, Юрий Қазаков сингари ҳамкасабалари билан бир қаторда очеркчиликда Валентин Овекин анъаналарини давом эттириди, мазмундор асарлари билан бойитди, мустаҳкамлади.

Шу кунларда ўзбек очеркчиларининг овечкинчасига қалам тебратиб, овечкинча таҳлили ўзлаштиришга астойдил интилаётганликлари — кишини беҳад қувонтиради. Чунки, Валентин Овекиннинг реал воқеаликни тадқиқ этиш принциплари ниҳоятда тўғри, ҳаётий бўлиб, социалистик реализм талабларига тўла жавоб берганлигидadir. Тўғри, ҳали бизда Георгий Радов ёки Владимир Тендряков сингари катта шуҳрат қозонган очеркчиларимиз бор, деб даъво қилмоқчимасмиз. Бироқ бу соҳадаги

кўпгина изланишларимиз моҳият эътибори билан ҳозирги пешқадам рус очеркчилари ижодига ҳамоҳангдир.

«Фарзандлар бурчи» билан танишганимизда бунга тўла ишонч ҳосил қилдик. Унинг дастлабки саҳифаларида Иброҳим Ҳамробоев ва Раҳим Бекжонов сингари машҳур ўзбек олигмлари билан учрашамиз, аммо Одил Ёқубов уларнинг геология ва ядро физикаси соҳасидаги кашфиётларини тадқиқ этмайди, буни ўз олдига мақсад қилиб қўймайди, асосий диққат-эътиборини Иброҳим Ҳамробоев ва Раҳим Бекжоновнинг маънавий-маданий жиҳатдан фоятда етук, баркамол инсон эканлигини кўрсатишга қаратади, уларни ҳалқимизнинг асл фарзандлари сифатида кўпчиликнинг ҳурмат-муҳаббатига сазовор бўлганлигини таъкидлайди. «Фарзандлар бурчи»да кўпроқ Мирзажон Эминов, Аҳмаджон Одилов, Манноп Жалолов, шунингдек, севимли санъаткорларимиздан Ҳалима Носирова ва атоқли драматургимиз Комил Яшин номлари тилга олиниб туради.

Бу қаҳрамонларга бағишланган ўнлаб очерклар, мақолаларни ўқиганимиз, бироқ уларнинг аксариси хаёлимиздан кўтарилиган, қалбимизда ўчмас из қолдирмаган, завқ-шавқ бахш этмаган, маънавий мадад бермаган. Бунинг сабабларига тўхталиб, «Фарзандлар бурчи»нинг муаллифи шундай деб ёзади: «...нега кўп очеркларимизда мураккаб ҳаёт муаммоларини четлаб ўтишга ҳаракат қиламиш? Нега ҳақиқатан ҳам ҳамма нарса «ўзи бўлгандай» қилиб ёзамиш? Нега бу масалада рус совет очеркчиларидан, Валентин Овекин, Владимир Тендряков, Георгий Радов, Гавриил Троепольский

кйлардан ўрганмаймиз? Ахир, ҳаёт ҳам, адабиёт ҳам шучигал муаммоллари билан, зиддиятлари билан, инсон характерининг курашчанлиги билан ибратли эмасми?»

Бу муроҳазалар савол аломати билан айтиляпти-ю, бироқ Одил Ёқубов уларни бутун жон-жаҳди, бутун вужуди, қалб түғени билан тасдиқлайди ва бир ўринда Л. И. Брежневнинг Олмаотада айтган бир сўзини эслатади: «Қийинчиликларни, бунинг устига аллақачонлар ўтмишда қолиб кетган қийинчиликларни қувончли байрам кунида эслаб ўтиришнинг нима ҳожати бор, деб сўрашлари мумкин. Бундай гапга қўшилиб бўлмайди. Агар биз қийинчиликлар тўғрисида галирмасак, уларни камайтириб кўрсатсак, шу тариқа чўлқуварлар жасоратининг аҳамиятини беихтиёр пасайтириб қўйган бўламиз...»

«Фарзандлар бурчи»да қаламга олинган қайси бир муҳим воқеа иштирокчисини олманг, унинг ўз қудрати, ақл-заковатини қанча-қанча тўсиқлар, тўғаноқлар билан тўқнашувда намоён қилганлигини сезиб турасиз. Яна шуниси борки, ёзувчининг диққат марказида доимо иши юришган, омади келган, баҳти кулиб боққан ажойиб инсонлар туради, аммо бу қаҳрамонлар мақсадига осонликча эришолмайдилар.

Аҳмаджон Одилов, Мирзажон Эминов, Манинп Ҷалолов ташқаридан қараганда бир юмалаб қаҳрамон бўлганга ўхшайди, аслида улардан ҳар бирининг ўзига хос дарди, орзу умидлари, ўзига хос хусусиятлари мавжудки, Одил Ёқубов қаҳрамонлари билан расмий суратда сухбатлашмайди, рақамлардан енгилелпи хулосалар чиқармайди, юрагини, дилини

очиб сўзлади, фикр олишади, дардлашади. «Фарзандлар бурчи»нинг Аҳмаджон Одиловга бағишлиланган қисми айниқса ҳаётий, ҳаққоний чиққан. Муаллиф унинг образига гўё ўз қалбидаги туйғулар, эҳтирослар, чуқур ҳаётий мушоҳадаларни «пайванд»лаб юборади. Шунинг учунми, Аҳмаджон Одиловнинг тадбиркор раҳбар, яхши одам сифатидаги хусусиятлари, келажак ҳақидаги орзу-умидлари, бугунги ташвишлари бизда шубҳа туғдирмайди. Айниқса, заҳматкаш паҳтакорлар учун ҳалигача яхши маданий-маишӣ шароит яратишга монеълик қилаётган айrim қурилиш ташкилотларининг раҳбарларини очиқласига «тузлаши» ундаги эътиқоднинг зўр қудратга эга эканлигидан далолат беради.

Мирзажон Эминов, Манинп Ҷалоловлар ҳам жонкуяр, инсонпарвар раҳбар, яхши ташкилотчи, ишнинг кўзини биладиган дехқон тарзида таърифланадилар ва бу таърифлар аксари ҳолларда қўзланган мўлжалга адашмасдан етиб боради. Бироқ гоҳида улар ўзлари куч-қувват сарфлаб эмас, балки қандайдир тасодифлар шарофати туфайли юксак натижаларни қўлга киритяптилар, дегандай маъно юзага қалқиб чиқади. Бунинг боиси шунда бўлса керакки, Одил Ёқубов ҳаёт мураккабликларини овечкинчасига тадқиқ этишга давлат этади, шу давлатга ўзи кўпинча риоя қиласди-ю, аммо бальзида ўзи тўғри белгилаган мўлжалдан бир оз чекинади. Бир қанча ўринларда бу қаҳрамонларнинг ишлари китобларда тасвирлангандан ҳам аъло деб қайта-қайта уқдиришлари ҳам унчалик ёпишиб тушмаяпти. Шунингдек, «кўрган-кечирганларимга бир оғиз ҳам уйдрма қўшмай, фақат ҳақиқатни

«әзишга ақд құлдім», «лекін иккі құлмий күксімгә қүйіб айтаман: ҳақиқатни, фақат ҳақиқатни өздім», деган изохлар негадир ортиқчадай туолади ва уларға сарфланған сұзлар тежалса, әхтиёт қилинса, мақсадға мувоғиқ бўларди. Негаки, тасвирланған воқеалар оқимидан муаллифнинг ҳар қандай мұхитда ҳам ростгүй бўлишга интилгани аччиқ бўлса ҳам ҳақиқатни айтишга, ҳимоя қилишга киришгани маҳсус изохларсиз англашилади. Пирвардида яна бир қаҳрамон — ижодкорнинг ўзи кўз ўнгимизда жонли, ҳаққоний образдай гавдаланади. Дарвоқе, «Фарзандлар бурчи» одатдаги очерклардан фарқ қиласы, у ёзувчининг сўз санъати, ҳаёт қаҳрамонлари ҳақида гузатишлари, ўйлари тарзда тақдим этилган ва бу гузатишлар, ўйлар мисли кўзгудай заҳматкаш замондошларимизнинг қўриқ ерларда қилаётган қаҳрамонона меҳнатларини қувончу севинчлари, дард-аламлари билан акс эттиради. Яна шуниси борки, Манноп Жалолов ёки Аҳмаджон Одилов, ёхуд Мирзажон Эминов ҳам, муаллифнинг ўзи ҳам мустақил образлардек фикрлайдилар, баҳс қиласылар.

«Фарзандлар бурчи»нинг шуниси диққатни жалб этади, унда қаҳрамонлар характеристидағи зиддиятлар, курашчанлик, фаоллик ҳам, ёзувчи ишидаги мураккаблilikлар, фидойилик, жасорат ҳам қотиб қолган ҳолда, доғматик тарзда талқын этилмайди, ҳар бир адид ёки пахтакор деҳқон изланиш-интилишларидаги ютуқ ва камчиликларнинг асл сабаблари, манбалари ахтарилади. Айниқса, Одил Еқубовнинг ўз ижодига, асарларига танқидий ёндашиши, эришилган мұваффақиятлар, йўл қўйилган нуқсонлар мөхиятини объектив ҳақи-

қат асосида аниқлашга жазм этгани таҳсинга сазовордир. Жумладан, у шундай деб ёзади: «Мен Чингиз Айтматовга ҳавас қиласман. Илк қиссаси «Жамила»ни Мухтор Аvezовдай улуғ ёзувчи кўриб, унга оқ фотиҳа берди, сўнг то умрининг охиригача ўз шогирдининг ижодини кузатиб йўл-йўриқ кўрсатиб борди... Мен ўзимни Чингизга ўхшатмоқчи эмасман. Қозонда бўлса чўмичга чиқишини яхши биламан. Демак, каминанинг «қозонида камроқ» экан, буниям тан оламан. Шундай бўлса ҳам goҳо ижод ҳақида, бошимдан ўтган қийинчиликлар ҳақида, қылган хатоларим ҳақида танҳо ўйлаган чоғларимда адабиёт аталмиш бу улуғ даргоҳнинг муқаддас эшигини очиб кирган пайтларимда қаттиқўллик, баобру бир устозим бўлмаганини ўйлаб ўқинаман».

Шу тариқа ёзувчи ўз тажрибаларини «тафтиш»дан ўтказади, ҳаётни бадиий тадқиқ этиш принципларига оид мулоҳазалари билан ўртоқлашади, санъаткорнинг ҳалқ, эл-юрт олдиғаги бурчи, масъулияти тўғрисида баҳс юритади, айни ҷоқда замондошларимизнинг қалбимизни забт этувчи, әхтиросу туйғулар оқимиға «фарқ» қилювчи таъсирчан образларини яратади, шунга кўра «Фарзандлар бурчи» зўр қизиқиши билан ўқиласи, очеркчиликда янги имкониятлар мавжудлигини кўрсатади.

ДУНЕ ҚЕНГЛИКЛАРИ ИЧРА...

Томчида денгиз акс этади деганларидек, ҳар бир қатра ерда, бир сиқим тупроқда бутун ер қатламларининг хусусиятлари яшириниб ётган бўлиши мумкин. Уфқнинг бир чеккасига қараб, осмонда нималар рўй бераётганини билиш мумкин.

Бадиий адабиётда ҳам худди шунга ўхшаш ҳодисалар учрайди: ҳикояда, — сўз санъатининг бир қатрасида оламдаги катта воқеаларнинг моҳиятини кўришимиз мумкин. Албатта, ҳар жиҳатдан бақувват, баркамол ҳикоя назарда тутиляпти. Лекин қанчалик салмоқли, зўр ҳикоя бўлмасин, у қисса ёки романнинг ўринини босадими, романнинг «юки»ни кўтара оладими? Ёхуд қисса роман ёки ҳикоянинг ҳиссасини чиқара оладими?

Баъзан шундай гапларни эшишиб қоламиз: қаранг, қандай ҳикоя, битта романнинг мазмунини ўзида мужассамлаштирган! Бундай деявериш мумкин, бироқ гап қандай маънони ифодалаётганига ҳам эътибор бериш керак! Романдай зўр ҳикоя бўлса, романдан воз кечака қолганимиз маъқулмасми?

Йўқ, воз кечолмаймиз, роман ҳикоянинг, ҳикоя эса қиссанинг «юки»ни кўтармайди, кўтараолмайди. Бири иккинчисини инкор этмайди, бири иккинчисини тўлдиради, бири иккинчисининг давомчиси, издоши бўлиб майдонга чиқади. Айни чоқда уларнинг барчаси ўзига хос мустақилликка эга, бири бирини тақрорламайди, ўзига хос индивидуал белгилири билан бир-бирларидан ажralиб туради. Томчида дengiz акс этиши мумкин, бироқ томчи ҳеч қачон дengiz бўлмайди.

50-йилларнинг охиридан то 60-йилларнинг охиригача роман инқизозга учради, бундан кейин «семиз» асарлар ўқилмайди, истеъмолдан чиқиб кетади, эпик полотноларнинг келажаги йўқ, ҳамма нарса жуда қисқа, лўнда бўлади, «телеграф услуги» ҳукмронлик қиласи, деган шов-шувлар бутун дунё миқёсида тарқалди, 70-йилларга келиб, уларга ўз-ўзидан

чек қўйилди, энди романчиликни «ўлдириб» «жанозаси»ни ўқийдиганлар кўзга кўринмай қолди.

Чингиз Айтматов қиссалари билан фақат қириғиз адабиётинигина эмас, кўпмиллатли совет адабиётини ҳам бойитди. Энди у романга қўл урди, катта эпик полотносини ўқишга мушарраф бўламиз.

Одил Ёқубов ҳам биринчи галда қиссалари билан машҳур бўлди, бироқ у изланишлар доирасини кенгайтириб бориб, 1965 йилда «Эр бошига иш тушса» романини ёзди.

Роман танқидчилар томонидан ҳам, ўқувчилар оммаси томонидан ҳам илиқ кутиб олинди, ижобий баҳоланди. Бунга, шубҳасизки, етарли асослар мавжуд эди: «Эр бошига иш тушса»да Улуғ Ватан уруши даврида фронт орқасидаги, меҳнат жангидаги воқеалар тадқиқ этилади, Машраб, Қўчқор ва Акмал исмли уч нафар ёш қаҳрамонларнинг маънавий камолотга интилиш жараёни кўрсатилади.

Уч ёш йигит, уч ўртоқ бирга ўқишади, бирга меҳнат қилишади, бирга юришади, бироқ бир-бирларидан ажralиб турадиган хусусиятларга эгаки, ёзувчи масаланинг бу жиҳатига алоҳида эътибор беради.

Уруш орқасидаги ҳаётни тасвир этишга бағишиланган асарларимиздан «Эр бошига иш тушса» шуниси билан фарқланадики, унда ёшларнинг турмуши, меҳнат фаслияти, интим ҳаёти мураккабликлари, зиддиятлари билан чизилади, қаҳрамонларнинг фазилатлари рўйи рост кўрсатилади, нуқсонлари хаспўшлаб ўтилмайди. Аксинча, уч ёш қаҳрамон шахсий ҳаётида ҳам, ижтимоий фаолиятида ҳам тин-

май кураш олиб боради, баъзан мағлубиятга учрайди, пировардида галаба қозонади.

«Одил Ёқубов бу романда ҳам,— деб таъкидлайди Озод Шарафиддинов,— ўз ижодининг асосий принципига содиқ қолади — схематизмдан қочиб, ҳаёт бениҳоя мурраккаб жараён эканидан келиб чиқади».

Ҳа, «Эр бошига иш тушса» романни ҳаётйлиги билан ўқувчиларнинг олқишига сазовор бўлди, адабиётимизда романчилик равнақига ўзига хос ҳисса бўлиб қўшилди, аммо Одил Ёқубов ўз истеъодини сафарбар этиб, ҳаёт кенгликлари, тафаккур кенгликлари ичра ноёб жавоҳирларни кашф этди, янги, оригинал образлар, баркамол бадиий типларга жон ато қилди, деб айтиш қийин. Аниқроғи, у романга янги ҳаётй материал олиб кирди-ю, шу материални кенг миқёс, чуқур мазмун касб этадиган улуғвор роя, салмоқли концепция асосида тадқиқ этишга қисман эришди, холос.

Биз ёш қаҳрамонларнинг характеристикини очишга йўналтирилган кўпгина қизиқарли, ибратли воқеаларнинг шоҳиди бўламиз, бироқ уларнинг эпик миқёси, масштаби романчилик талабига қисман жавоб беради. Натижада Қўчкор, Машраб ва Акмаллар бир-икки қиррали характерлар даражасига кўтарилади, кўпқиррали, кенг миқёсли эпик образлар бўлиб гавдаланмайди.

«Улуғбек хазинаси» романидаги Одил Ёқубов маҳоратнинг янги, юксак погонасига кўтарилиб, биринчи йирик эпик асаридан етишмовчиликларига барҳам берди, характеристларни ҳам, воқеаларни ҳам чуқур тадқиқ қилди, ўзининг санъаткор сифатидаги тафаккур доирасини кенгайтиради.

Роман эълон қилиниши биланоқ танқидчиликнинг эътиборини қозонди. Воҳид Зоҳидов, Матёкуб Кўшжонов, Умарали Норматов, Пирмат Шермуҳамедов, ИброҳимFaфуров, Маҳкам Maҳмудов ва бошқа мунаққидлар романни бир овоздан ёзувчининг ҳам, сўнгги йиллардаги ўзбек адабиётининг ҳам катта ютуғи, деб баҳоладилар.

Агар «Муқаддас», «Қанот жуфт бўлади» каби қиссалари билан Одил Ёқубов ижодий камолотга эришганлигини исботлаган бўлса, «Улуғбек хазинаси» билан у ўзининг катта бадиий кашфиётлар яратишга қодир эканлигини кўрсатди, етук санъаткор адаб сифатида танилди, шуҳрат қозонди.

Москвалик мунаққидлардан В. Оскоцкий, А. Ҳакимовлар ҳам романнинг «Дружба народов» журналида босилиб чиққанлиги муносабати билан «Литературная газета» ва «Знамя» журнали саҳифаларида мақолаларини эълон қилиб, «Улуғбек хазинасини» юксак баҳоладилар.

Романнинг бевосита таҳлилига кўчмасдан Иброҳим Faфуровнинг «Роман — тарих ойнаси» деб аталган мақоласига тўхтамоқчи миз.

Танқидчи Одил Ёқубовнинг хизматларини муносаб тақдирлайди, унинг «Улуғбек хазинаси» билан ўзбек тарихий романчилигини боййтганини эътироф қиласди, аммо бу эътироф қандайдир ажаблантирувчи зиддиятларга ўраб берилгандай таассурот қолдиради.

«Одил Ёқубов воқеанавис адаб. У характеристларни кенг ва чуқур план билан таҳлил за тадқиқ қилиш йўлидан эмас, воқеаларни таҳлил қилиш ва воқеалар ичida ҳаракат қила-

ётган қаҳрамонларнинг равиш-рафтори, туйғу ва түгёнларини кўрсатиш йўлидан боради».

Ёзувчи характерларни таҳлил қилмаса, воқеалар билан ўралашиб қолса, воқеанавислик билан шуғулланса, у инсоншуносликда янгилик яратолмайди-ку, деб юборасиз ва Одил Ёқубовнинг нима учун воқеанавис бўлиб қолганлигини, кишиларнинг характерларини таҳлил қилмаслигини танқидчи нима билан далилларкан, деб мақолани ўқишида давом этасиз, бироқ бошқа бир вазиятга дуч келасиз: «Биз тарихан Улугбекни донишманд подшоҳ ва буюк маърифат эгаси сифатида танимиз. Адаб романда Улугбекнинг мана шу икки ёрқин, кўзга ташланиб турадиган белгисини ҳар жиҳатдан тадқиқ қилишга интилади».

Қизиқ, мунаққид ҳозиргина Одил Ёқубов характерни эмас, воқеани таҳлилу тадқиқ қиласди, деган фикрни ўртага ташлаганди, энди эса бунинг аксини тасдиқлаяпти-ку! Балки бу зиддият тасодифдир, деб мақолани ўқишида давом этамиз: «Адаб унинг қиёфасида (гап Али Қушчи тўғрисида кетаётir — H. X.) ўрта асрнинг етук олимни, бениҳоя мардона инсон, ҳур фикрли шогирд маърифатнинг қайтмас курашчиси образини ёрқин гавдалантириб беролгандир».

Иброҳим Faфуров бундан сўнг: «Мавлоно Муҳиддин, Али Қушчи каби Одил Ёқубовнинг романда яратган энг муваффақиятли образларидандир», деб уқдиради.

Бундан чиқдики Одил Ёқубов воқеанавис мас инсоншунос экан, қаҳрамоннавис экан. Зотан чинакам реалист ёзувчи бундан бошқа

вазифани бажармайди, бундан бошқа иш билан шуғулланмайди.

Ҳаётий бўлса-да, унчалик катта янгилик бўлиб жарангламаган «Излайман» қиссаси тўғрисида мулоҳаза юритганда Иброҳим Faфуров биронта жиддий нуқсон устида тўхтамайди, «Улугбек хазинаси»да эса анча йўқотишлар бор, деб ёзувчига танбеҳ беради-ю, бу йўқотишлар нимадан иборат эканлигини конкрет далиллар орқали кўрсатмайди.

Хайриятки, мунаққид «Улугбек хазинаси»нинг фазилатларини одилона, ҳаққоний таъкидлайди, романнинг умумий гоёвий-бадиий йўналишини ижобий баҳолайди.

Мана энди Одил Ёқубовнинг бу йирик эпик полотноси ҳақида батафсил сўзлашимизга навбат келди.

«Умрлар бўладики, тиригида ўликдир, умрлар бўладики, мангаликча тирикдир».

Мақсад Шайхзода инсон ҳаётининг мазмунини шу тариқа гоятда ихчам, гоятда аниқ, гоятда таъсирчан қилиб ифодалаган: ё тиригида ўлик ёки мангаликча тирик!

Одил Ёқубовнинг янги романидаги асосий қаҳрамонлардан бири — Улугбек — «мангуликча тирик», иккинчиси эса — Абдуллатиф — «тиригида ўлик» бўлиб гавдаланади.

Улугбек!

Неча асрлар синовига бардош бериб, «мангуликча тирик» бўлиб қолган улуг сиймо тўғрисида қанча-қанча китоблар, илмий мақолалар ўқиганмиз, драматик фожиа-ю, фильмларни томоша қилганимиз. Бу асарларнинг гоёвий-бадиий жиҳатдан алоҳида салмоқ касб этганлари шуни кўрсатдик, Улугбек даҳоси

мисли бир океандир, ҳар гал ундан атиги бир томчи сипқоргандай бўламиз, холос.

Буни «Улуғбек хазинаси»ни ўқиганимизда яна бир бор ҳис этдик. Лекин айни пайтда Одил Ёқубов бу буюк сиймо образини ёритиши да янгиликка, оригиналликка интилади.

Бу нималарда кўринади?

Ёзувчи диққатимизни қаҳрамон ҳаётининг ниҳоятда қалтис ва драматик дамларига — умрининг сўнгги онларига жалб этади. Чунки, мана шундай онларда инсон характери ўзининг бутун мураккаблиги билан намоён бўлади.

«Улуғбек хазинаси»да мустабид жаҳонгирнинг буюк невараси билан шундай шароитда танишамиз: у илм-фандада мисли кўрилмаган ғалабаларга эришган, лекин салтанатда мағлуб бўлиш арафасида турибди.

Голиблик ва мағлублик!

Бу икки қутб сув билан ўтдек қарама-қарши туйғулар, фикрларни туғдиради, ҳеч қаҷон бири иккинчиси билан муроса қилмайди. Улуғбек ҳаётига эса ғалаба ва мағлубият айни чогда бир пайтнинг ўзида кириб келади. Шунинг учун унинг қалбida, ички кечинмаларида, ақлу хаёлида пайдо бўлган ҳис-туйғулар, ғоялар кураши одатдагига нисбатан ўн чандон шиддатлироқ тус олади. Бу ҳис-туйғулар гирдоғига «шўнгиган» китобхон қайтиб чиқолмайди, ўзини ўша тўқнашувларда, ғоялар «жангига» иштирок этажтандай сезади, ўша давр воқеалари ичida «сузиб» юргандай бўлади.

Романинг биринчи саҳифаларидаёқ шундай вазият вужудга келади: Улуғбек қафасга тушган шердай тўлғониб, ўзини гоҳ у ёққа, гоҳ бу ёққа урмоқда, изтироб чекмоқда. Ҳаз-

рати Навоий таъбири билан айтганда, «занжирбанд шер» бўлмиш улуғ инсоннинг бу изтироблари китобхонни бефарқ қолдиролмайди. Зоро, бу «занжир»ни ясашда Улуғбекнинг ўзи иштирок этган. Ҳатто маълум маънода у ўзини ўзи «занжир»лаган дейиш мумкин. Ахир Улуғбек — шоҳ Улуғбек — олим билан, Улуғбек — ҳоким Улуғбек — мутафаккир билан, Улуғбек — давлатпаноҳ Улуғбек — инсон билан доим муроса қилиб келган-ку!

Одил Ёқубов «икки» Улуғбек образини барча мураккабликлари, зиддиятлари ва табиийлиги билан ёритиши ўйлида катта меҳнат қилган. Ёзувчи қаҳрамон ички дунёси ва уни ўраб олган одамлар хатти-ҳаракатининг ишонарли чиқишини таъминлашга астойдил ҳаракат қиласи, ҳаракат аксари ҳолларда барака келтиради. Ҳусусан, Улуғбекнинг руҳий ҳолати, юриш-туриши, хулқ-атвори, бутун фаолияти ҳаёт мантиқига, тарихий ҳақиқатга мос тушиди: қаҳрамон саросимада, унинг хатти-ҳаракатларидаги қатъийлик ва салобат қандайдир журъатсизлик билан, руҳий тушкунлик билан алмашиниб турибди. Ахир, салтанатга дарз кетмоқда, ҳокимият нурай бошлаган, Улуғбек — шоҳ, Улуғбек — олим олдида тиз чўкиб, ўзининг мағлуб этилганлигини эътироф қилиш арафасида турибди!

Ёзувчи қаҳрамон ҳаётидаги мана шу ниҳоятда қалтис дамларни ва ҳал қилувчи бурилишини қаламга оларкан, уларнинг тарихий тараққиёт натижаси эканлигини алоҳида қайд этади. Ҳа, ҳатто Улуғбекдай етук инсон ҳам ҳокимликдан ўз ихтиёрига кўра воз кечолмайди! Воз кечиш у ёқда турсин, ҳукмронлигини сақлаб қолиш учун барча куч ва воситаларини

сафарбар этади! Айни чоқда бир томчи қони қолгунча олишишга, жаңғ қилишга құнт этади, аммо ноўрин құрбонлар беришга йўл қўймайди. Негаки, сўнгги дақиқаларда Улугбек — олим, Улугбек = мутафаккир голиб чиқади. Аммо бу осонликча амалга ошмайди, томирларида Амир Темур қони мавж уриб турган шоҳ Улугбек олим Улугбек олдидан бирданыга таслим бўла қолмайди. Бу қўйидагича шарҳланади: «Бошидаги тож, тагидаги таҳт илм-фунун учун даркор эканини тушунмаганида бу совуқ кошонани, гуноҳи азимга ботиб қолган бу ҳарам, шон-шуҳрат ва мансаб ишқида ҳеч бир разолатдан тоймаган бу амиру умаро, саркору саройбонлар, хурофот ва таассуб ботқоғига ботган дин пешволарини тарк этиб суюкли фан толиблари орасига, илм-маърифат даргоҳига кетмас эдиму? Лекин нечора? Бу манҳус тожу таҳт, бу салтанат, инсонлар устидан ҳокимлик қилмоқ истаги шундай ширин эканки, унинг нияти поклигига ким инонади? Ким унинг самимилигига, ўз ихтиёри билан салтанатдан қўл ювганига инониб тинч қўяди?»

Йўқ, тинч қўймайди, ҳеч ким ишонмайди! Лекин ўзгаларни ишонтириш шартми? Виждан амрига мувофиқ иш кўрса бўлмасмиди? Бўларди, албатта. Лекин Улугбек қанчалик буюк бўлмасин, у ҳам ўз муҳити, ўз жамиятининг фарзанди. Шунинг учун «иродасидан зўрроқ-куч» уни таҳт ва салтанат учун курашга даъват этаркан, у бу кучга бўйсунади. Натижада Улугбек сунъий, схематик образ эмас, реал ҳаётдагидек ҳаётий ва ҳаққоний бўлиб тавдаланади. Зотан муаллиф буюк олим характеристерининг объектив ҳақиқат, тарихий та-

раққиёт тақозосига кўрга ўсиш-ўзгаришини ёритишга барча куч-қудрати, имкониятларини сарфлаган.

Асарнинг биринчи қисмida доимо Улугбек билан рўбарў келамиз, уни ҳар хил шароитларда учратамиз, бироқ нима учун ундаи қилди, бундай қилмади, нега бир ерда дадил бўлиб, иккинчи ерда журъатсизлик қилди, деган тахминларга бормаймиз, ўзгача бўлишини тасавур қилолмаймиз, оқибатда ижодкорга ҳам, қаҳрамонга ҳам ишончининг ортади, мустаҳкамланади. Мана, Мирзо Улугбек лашкарбошилар билан кенгашмоқда, тожу таҳт таҳдид остида қолганини англатмоқда, бироқ шаштидан тушмайди, ҳокими мутлоққа хос қатъиятлик ва салобат билан дадил буйруқлад беради, куч ва имкониятларни салтанат химоясига сафарбар этади, овозида, нутқида, юриш-туришларида ҳадисираш сезилмайди, бироқ ич-ичидан зил кетади, вазиятни дохиёна аниқлаб, ўзи яратган илм хазинасини сақлаш тадбирларини кўради, бу вазифани суюкли шогирди Али Қушчига юклайди...

Айниқса, унинг шогирди Али Қушчи ва ўғли Абдулатиф билан қилган сұхбати, баҳс, мунозаралари узоқ вақт эсда қолади. Ҳар иккала ҳолатда — Абдулатиф билан тўқнашувда, Али Қушчи билан мулоқотда Улугбек ўз характеристерининг ҳам ўткир жиҳатларини, ҳам заиф томонларини намоён қилади.

Хўш, қандай заифлик мавжуд?

Мана, у ўз фарзандидай азиз кўрган Али Қушчига юрак дардини тўқмоқда, шогирдини энг яқин сирдошидай тутиб, у билан ҳасратлашмоқда, орзу-истагини баён этмоқда: «...Мовароуннаҳр осмонини қора булутлар қопла-

моқдадур. Шаҳзода Абдулатиф Жайхундан ўтиб, Кешга яқинлашиб келадур. Букун до-рассалтана Самарқанд ҳам ҳаф остида туриб-дур... Сени бу даргоҳга чақирмоқдан муддаом шуким, қирқ йил салтанат тебратиб ортирган бутун бойлигим — расадхона ва кутубхонам, битилган, ҳали ниҳоясига етмаган рисола-ю. китобларим — барчаси сенинг қўлингдадур. Алқисса, бу хазинани жоҳил гумроҳлардан, маҳдуд мутаассиблардан асраб қолмоқ... ёл-ғиз сенинг ихтиёриңг ва идрокингдадур».

Қаранг-а, буюк мунахжим шоғирдига ўзи-га ишонгандай ишонади, заррача шубҳалан-масдан, унга кашфиётлари, бой илмий мероси-нинг тақдирини топшириялти. Бироқ Али Қушчи... «нечун фалакиёт илмини идрок эта олгаи, ўткир тафаккури ила коинот сирларини очиб, янги юлдузлар кашф этган алломалар сарбо-ни тахт ва салтанатнинг бевафолигини тушун-мади? ... Ёхуд уни тарк этишга иродаси етма-ди? Нечун ҳокимият деб аталмиш бу сохта шон-шавкатдан воз кечиб, бутун тафаккури, ўткир мушоҳадаси, бутун салоҳиятини илм-фунунга, инсонни улуғловчи зиё-маърифатга баҳш этмади? Нечун?» деб таъна қўлганида бунга жавобан Улуғбек шундай дейди: «Қа-мина барига тушунамен, Али! Аммо ҳодиса-лар силсиласи шундайким, буни аҳли фазл идрок этишдан ожиздур. Фозиллар идроки шоҳлар идрокидин ожиз бўлганидан эрмас, йўқ! Бильякс, ҳақ таоло сизларга шундай пок-лик ато этганким, шоҳлар ҳаётининг мислсиз сафолатини идрок этишдан ожиздурсиз!»

Айтайлик, аҳли-фазл олимлар тожу тахт-нинг мислсиз разолатини чуқур англашга қо-дир эмаслар. Шоҳлар-чи?

Асардаги Улуғбек баъзан шоҳларни фуқа-ро ва донишмандлардан бир погона устун қў-йишга урингандай, у фикр ғалабасини таъ-минлашга яхши нарсаларни қурбон қилишдан ҳам тоймаётгандай кўринади, шу фикр ундаги даҳоликнинг кенг қулоч ёзишига халақит бе-ради. Оқибатда ақлу адолатга, инсонийликка хилоф тадбирлар ҳам амалга оширилиб ту-рилади.

Бу Улуғбекнинг заифлигими ёки феодал жамиятнинг маҳдудлигими? Бу бир жиҳатдан даврнинг чекланганлигига, тарихий шароит-нинг етилмаганига йўйилса, иккинчи томондан бу борада Улуғбек шахсининг баъзи заиф жиҳатлари туфайли намоён бўлган, деб айтиш мумкин. Улуғбекнинг ўзи ҳам буларни эътироф этади, баъзан шароитга, баъзан қўнгилга қа-раб иш олиб борганилиги туфайли ноҳақлик-ларга қўл қўйилганлигини тан олади, буни ўзи-нинг ожизлиги деб билади ва шунинг учун «вужуд-вужудигача титраб кетади», Улуғбек-нинг буюклиги ҳам шунда, зероки бу тариқа мушоҳида юритиш ўз фаолиятига фақат адо-лат юзасидан баҳо бериш, ўз хатти-ҳаракатла-рига танқидий муносабатда бўлиш, ўзидаң қаноатланмаслик ҳисси билан яшаш буюк шахсларнинг ақлу идрокига хосдир!

Бу ҳолат Улуғбек билан Абдулатиф тўқ-нашувида янада мукаммалроқ, аниқроқ аке этади.

Ота ва ўғил деганда биз бир-бирига қадр-дон, ҳамдаму ҳамдард зотларни кўзда тута-миз, бироқ Улуғбек билан Алдулатиф муно-сабатида заррача меҳр-муҳаббат, ҳурмат туй-гулари йўқ, замон зayıli, ҳокимият ишқи улар-ни мутлақо келишиб бўлмайдиган душманга айлантирган.

Улуғбек буни яхши билади, ўғли билан сулҳ тузишни таклиф қилганида ҳатто ўз ихтиёри билан тожу таҳтни топширганида ҳам ўғлининг марҳамат қилишига ишонмайди. Аммо шунга қарамасдан ҳалокатга маҳкум этилганини аниқ сезганида ҳам Абдулатифга шундай деб мурожаат қиласи: «Менга ҳеч нарса керак эмас. Бу тожу таҳт, салтанаг, шон-шуҳрат — бари ўзинингга буюргай! Фақирга ёлғиз расадхонани инъом этсанг бас! Бир бурда нон, бир қумғон совуқ сув бўлса етар. Азмим — қолган умримни «Зижи Курогоний»ни тутатиб мутолаа ила қун кечирмоқдир...»

Қизиқ, наҳотки Улуғбек Абдулатифнинг бунга кўнмаслигини билмаса?! Наҳотки ғолиб подшоҳ, тожу таҳтдан айрилган ҳукмдорга илтифот қилмаслигини тушунмаса? Тушунади! Бироқ ноумид шайтон, деганларидек, балки ўғли инсофга келиб қолар деган хаёлга боради. Қолаверса, ҳәётини сақлаб қолиш, умрини илм-маърифатга бағишлиш йўлида Абдулатифдан бошқа суннадиган кишиси йўқ! У ўзининг чўкаётуб, чўпга осилаётган одам ҳолига тушганини кўриб-билиб турибди, аммо барибир Абдулатифга талпиняпти, унга кўз тикяпти, ўзига мадад беришини орзу қилияпти, «ўғлим!» деб, ундан қандайдир илтифот кутяпти.

Бу Улуғбекдай зўр инсоннинг заифлиги эмасми? Заифлиги! Лекин бу заифлик тубанлик ё риёкорликнинг ифодаси эмас. Бу қаҳрамон характеридаги даҳолик билан ёнма-ён юрадиган заифлик аломати, инсонга хос заифлик. Зотан буюклик айни чоқда оддийлик ҳамдир. Чунки, Улуғбек фақат ўз бошининг ғамини ейиш учун хиёнаткор ўғлининг марҳа-

матидан баҳраманд бўлмоқчи эмас! Азбаройн илм-фан, маърифат, эзгулик йўлида бир томчи қони қолгунча заҳмат чекиши мақсадида Абдулатифга бош эгяпти! Бош эгяпти-ю, бироқ эътиқодидан тонаётгани йўқ, у илм-фандан юз ўғирмайди, тиз чўкиб узр сўрамайди, фурурини поймол қилишига йўл қўймайди, ўлимига рози-ю, хиёнаткорлик сари бир қадам ташламайди.

Ёзувчи шунга эриша олганки, биз Улуғбек тимсолида фақат зафарлар қучиб, мағлубият нималигини билмаган, илм-фан, маърифат соҳасида фақат кашфиётлар яратган, камчиликлардан йироқ, доимо шуду хуррам яшаб, гам-гусса, баҳтсизлик нималигини тотиб кўрмаган қандайдир бир илоҳий қаҳрамонни эмас, балки ўзида мураккаб туйғуларни ҳам, оддийликни ҳам, даҳоликни ҳам мужассам-лантирган ҳаққоний образни, жонли шахсни кўрамиз. Бунга ишонч ҳосил қилиш учун Улуғбекнинг мана бу сўзларига аҳамият беринг: «Йўқ! — деб хитоб қилди.— Мен салтанатдан айрилишдан қўрқмайман.Faқат Мовароённаҳрга қирқ йил раҳнамолик қилиб, ортирган бойлигим — мадрасаю расадхонам, нодир хазинам — тўплаган кутубхонам ва ниҳоят, яратган асарларим — барчаси зеру забар бўлишидан қўрқадурмен. Ҳа, фақат шундан қўрқадурмен. Тағин бир нарсадан — келгуси авлодлар бандай ожиздан ҳазар қилмасму, деб қўрқамен. Мирзо Улуғбекдай коинот сирларини очмоқни тилаган, фозилликни даъво этган мавлоно, ҳайҳот, охир оқибат барча шоҳ, барча таҳт соҳибларидаи салтанатни деб ўз пушти камаридан бўлган фарзанди ила

тожу таҳт талашубдир-да, деган ном қолдирмоқдан қўрқамен, мавлоно Али!»

Бу парчада қаҳрамон юрагининг туғёни мавж уриб турибди, яраланган улуғвор юракнинг улуғвор ниодси эшитиляпти!

Тўғри, қаҳрамон ички дунёсидаги баъзан ҳислар оқимининг сустлашиши ёки тафаккур тараққиётининг кенг кўламда тасвири этилмаслиги, гоҳида муаллифнинг факт-ҳодисалар тасвирида оқсан қолиши кўзга ташланади, бироқ «куп-қуруқ» эҳтироссиз фикрларни, ҳисҳаяжонга йўғрилмаган ғояларни учратмаймиз. Чунончи Улуғбек дардини ифодалайдиган ма-на бу парчага диққат қилинг. «О, юлдузлар... юлдузлар! Мирзо Улуғбек эллик йил уларга ошифта бўлди. Кечаларни бедор ўтказиб, ҳар бир ситора, ҳар бир юлдузнинг буржини, яъни ҳаракатидаги чамбар йўлини кузатди. Эвоҳ! Қирқ йил умрини сарф қилиб, юлдузлар сирини ўрганди-ю, замин сирига, инсонлар ҳаётига келганда ғафлатда қолди. У фалак сирларини билсан, замин ва ҳаёт сирларини ҳам биларман деб ўйлаган эди! Иўқ, янгишди! Фалак сирларининг бир четини хиёл очгандай бўлди, лекин инсоният, ҳаттокум ўз пушти камаридан бўлган зурриётларининг юракларига қўл солиб кўролмади, мақсадлари не — билолмади».

Кўп нарсаларни билолмади, лекин кўп нарсаларни била олди ҳам, билолгани учун билмагани тўғрисида гапирияпти, билғанлари уни замонасидан бир погона юксакликка кўтариб қўйди, давр тараққиёти даражасидан бир қадам олдинга силжитди, бир қадам илгарилаб кетишини таъминлади, ёзувчи қаҳрамон характеридаги мана шу илғорликни, мана шу даҳоликни мадҳ этади, улуғлайди.

Романда Улуғбекнинг мунахжимлик фаолияти тафсилотлари билан берилмайди, аммо қаҳрамоннинг коинот дарғаларидан бири бўлганлигини ёзувчи маҳсус изоҳларсиз доимо англатиб туради. Муаллиф Улуғбекнинг давлатни бошқаришдаги маҳорати, эзгу ишларни амалга оширгани, илм-фан соҳибларига раҳнамолик қилгани, шу билан бирга аҳён-аҳёнда ўринисиз қон тўккани, шафқатсизликларга йўл қўйгани, ноҳақликларга барҳам беролмагани хусусида ҳам сўзлайдики, бунга эътироz қилиш қийин. Бу ўринда кекса темирчи, уста Темур Самарқандийнинг бир сўзини эслаб ўтайлик: «Кўнглингизга келмасин, мавлоно, аммо уруш баҳона, бу амиру умаро кафангдо қилди-ку биз бечораларни. Жавр бўлганда биздай камбағал ҳунармандларга жавр бўлди...» Бироқ гоҳида қаҳрамоннинг даҳолиги, улуғворлиги кенг кўламда кўрсатилгану, унинг шафқатсизлиги тўғрисида камроқ айтилган, деган таассурот туғилиши ҳам мумкин. Лекин бу таассу ротни бутунлай тўғри деб бўлмас. Ёзувчи асосан ҳақ: у тарихий ҳақиқат тақозоси билан Улуғбек характерида даҳолик ҳукмронлик қилган, деган нуқтаи назардан келиб чиққан ва тўғри қилган.

Асарда яна икки образ ғоятда ёрқин, таъсирчан чиққан: бири Али Қушчи, иккинчиси Қаландар Қарноқий. Али Қушчи билан Қарноқий ака-ука, устоз-шогирдлай бир-бирига яқин, биродар, қон-қардош: иккалasi ҳам илм-фянга, маърифатга меҳр қўйган, лекин бу меҳр-муҳаббат икки хил синовдан ўтади. Али Қушчи ҳатто ўз шахсий баҳтидан воз кечиб, бор-йўғини, бутун вужуди, куч-қудратини тафаккур тантанасига бағишлайди, дунё сирла-

рини англашга қаратади. Қаландар Қарноқий эса бу даражагача күтарила олмайды; жонидан ортиқ күрган севгилисига эришолмагач, тарки дунё қиласы, қаландарчылык йүлида адолат излашга киришади, бироқ тезда бу ҳам янглиш йўл эканини тушунади, сўнгра илм-маърифатнинг чинакам ҳимоячисига, чинакам фидойисига айланади. Ёзувчи бу соддадил камбагал йигитнинг сермашаққат ҳаётини бўлакча бир ҳамдардлик билан тасвирлайдики, унинг бошига тушган мусибатлари қалбинизда ўчмас из қолдиради. Жумладан, Қаландар Қарноқийнинг юксак эътиқод билан илм даргоҳига қадам ташлаши, таҳсил кўриши, шу аснода устози Мавлоно Муҳиддиннинг қизини яхши кўриб қолиши, соғ, муқаддас севгисининг поймол қилиниши, сўнгра дарвешлик кўчасига кириши, ниҳоят замона зайдига мувофиқ яна тўғри йўлга тушиши кишини чуқур ҳаяжонга солади.

Али Қушчининг ҳаётидаги бундай драматик ҳодисалар йўқ, лекин Одил Еқубов унинг ички кечинмалари, фикр-ўйларидаги зиддиятларни, қаҳрамонни ўраб олган оғир муҳитга шундай «пайвандлайди»ки, натижада чинакам ҳаётий драматизм вужудга келади. Бу кўпроқ Али Қушчининг устод Улуғбекка қўйган меҳр ва садоқатида, буюк мунахжимнинг меросига муносабатида намоён бўлади. Унинг Салоҳиддин Заргар билан тўқнашув саҳнасини эслайлик: «Аммо сўз оддий дурданалар — тилла ва жавоҳирлар тўғрисида эмас, илм жавоҳирлари тўғрисида борадур. Инсониятнинг энг дониш фарзандлари бунёд этган хазина устида борадур. Сизга маълумдир, устод Мирзо Улуғбек бу хазинани сал кам

кирқ йил йиғибдур. Фақир эса устод Мирзо Улуғбекнинг меҳр-саҳовати туфайли одам бўлганменин. Устоднинг нон-тузини, берган илмини унуглан шогирд кўр бўлур, валломат. Бас! Камина ўз бошини асраб қолмоқ матлабида устоднинг раъйини қайтармоқдан кўра сиз айтган хурофтот гулханида ёнмоқни афзал кўрамен!»

Муаллиф қаҳрамон сўзлаётганида «Али Қушчи ҳаяжонланиб, қулт этиб ютинди», деб изоҳ беради ва бу изоҳ унинг нақадар мураккаб вазиятда қолганини кўрсатиб турибди. Бу саҳнада Али Қушчининг ўз аҳди, ўз сўзида қатъий турадиган ғоятда эътиқодли олим, кучли инсон эканлиги ишонарли қилиб тасвирланган. Зотан у қандай шароитга тушмасин, кимлар билан тўқнашмасин, ҳамма вақт дадил ҳаракат қиласи. Чунончи, Улуғбек шоҳ билан мулоқотда бўлганда ҳам, Улуғбек — олим билан суҳбатлашганда ҳам ўз сўзидач қайтмайди, фикр-мулоҳазаларини рўйирост айтади, ўзини ҳам, ўзгаларни ҳам камситишга йўл қўймайди.

Ёзувчи қаҳрамон матонатини ҳаётдан узиб олган ҳолда кўрсатмайди, инсонга хос хусусиятларини ҳаддан ташқари бўртириб юбормайди. Бу ҳолат Али Қушчи ҳибсга олинниб, зиндонга ташланганда янада яқъолроқ кўринади: «У кўзларини юмиб, тишини тишига босиб узоқ ўтириди, сўнг аста-секин ҳушини йиғиб, ўзини койишга тутинди: «Нечук тўлғанасен, нечун ёш боладай бесабр, бетоқат бўласен, сенга не бўлди, Али? Ҳақ таолонинг синовларидан, бу мудҳиши ҳибсу зиндонлардан кўрксанг, нечун устоднинг тилагига ризолик бердинг? Бошда, устод Қўйқаройга чақириб гар-

данингга бу хатарли юмушни юклаганида... нечук хўп дединг, нечук бир баҳона топиб, тойиб чиқмадинг? Ё шоҳзода Абдулатиф шайх Низомиддин Ҳомуш янглиғ бидъат ва хурофот маддоҳларининг қўлидаги бир чўқмор эканини билмас эдингму? Ўз падари покига қилин кўтарган бу мустабид ҳеч бир кимсага шафқат қилмаслигини, меҳру шафқатдан маҳрум бир маҳлуқ эканини билмас эдингму? Йўқ, билар эдинг!.. Бас! Бошда ҳаммасига ақлинг етиб туриб, бу хатарли юмушга бел боғлабсен, энди нечун титрайсан? Нечун телбаланиб, ўзингни у ёқдан бу ёққа отасен? Сабру тоқат ўрнига бошингни деворга уриб, фарёд қиласен?»

Айрим ўқувчилар, «Нега бир сўзли мард қаҳрамон бундай ўйларга боряпти? Нима учун аҳду паймонини бузишга мойиллик билдириялти? Унинг иккиланишлари, шубҳаланишларидан хиёнат нафаси уфураётгани йўқми?» дейишлари мумкин, лекин бунга асос йўқ. Чунки, «Улуғбек хазинаси»да реалистик тасвир принципларига риоя қилинади, қаҳрамонлар-нинг ҳолати, ўсиш-ўзгариши объектив ҳақиқат нуқтаи назаридан танқид этилади, объектив ҳақиқат эса ҳеч қачон факт ҳодисаларни силлиқлаширишга, чучмаллаширишга йўл бермайди. Бинобарин, Али Қушчининг қийинчиликлар олдида бир оз эсанкираши, ҳадиксираши, ҳатто қўрқиши унинг катта жасорат кўрсатган инсон эканлигини йўқка чиқармайди, аксинча, унга нисбатан китобхонда ишонч ва ҳурмат туйғуларини уйғотади.

Қаландар Қарноқий эса дастлаб турмуш зарбалари олдида ўзини бутунлай йўқотиб қўяди, тушкунликка тушади, ҳаёт лаззатларидан воз кечиб, жонини худо йўлига тикади,

туноҳларга ботиб қолган мажруҳдай сезади ўзини, сўнгра аста-секин ўзига келади, турмушини изга солади, «мангуликча тирик»ларнинг ҳимоячилари, тарафдорлари сафидан ўрин олади, шу билан Али Қушчига, Улуғбекка яқинлашади.

Романдаги мураккаб образлардан бири Мавлоно Муҳиддиндир. Устоз Улуғбекдан кўп яхшилик кўрган, унинг даврида шон-шуҳрат қозонган бу қобилиятли олим вазият кескинлашганда ўз эътиқодини ҳимоя қиломайди, жонини сақлаш учун хиёнаткорликка ўтади, эзгу ишларидан, илмий топилмаларидан, ҳатто суюкли устоди Улуғбекдан юз ўгиради, қўлини юваб қўлтиққа уради.

Айтайлик, Улуғбек ва Али Қушчини «мангуликча тирик»лар деб ардоқлаймиз, Қаландар Қарноқийлар ҳам «мангуликча тирик»ларга ҳамнафас бўлганлиги учун ҳурматга сазовордир, лекин Мавлоно Муҳиддинни қандай таърифлаш мумкин?

Ёзувчи инсон ҳаётининг чигалликлари, зиддиятларини тарихий тараққиётнинг диалектик қонунларига кўра талқин этиб, гоҳида бу борада қатъий фикр, қатъий мулоҳаза айтиш, қатъий баҳо бериш, узил-кесил ҳукм-хуласа чиқариш мумкин эмаслигини кўрсатади, Мавлоно Муҳиддин характеристи бу фикрнинг конкрет кўриниши, конкрет мисоли сифатида гавдаланади.

Балки Мавлоно Муҳиддинларни «чала ўлик, чала тирик» деб аташ маъқулроқдир?

Менимча, шундай деб аташ мақсадга мувофиқдир. Улар ўйлаб чиқарилмаган, ҳаётдан олинган типлардир. Борди-ю, аксинча бўлганида «тиригиде ўлик»лар тезда барҳам топар-

ди, эл-юрга оғат келтиролмасди. Ахир, Абдулатифнинг падаркуш даражасига етишида уларнинг ҳам «ҳиссаси» бор-ку?! Абдулатифга ўхшаш «тиригиде ўлик»лар «мангуликча тирик»лар билан курашганда Мавлоно Муҳиддин каби «чала ўлик, чала тирик»ларга сунямаса, ҳеч қаочон голиб чиқолмаслиги турган гап-ку!?

Одил Ёқубов қаҳрамонларнинг — хоҳ салбий бўлсин, хоҳ ижобий — муайян шарт-шароитда камолга келиши, уларнинг яшаш учун кураши ижтимоий тараққиёт тақозосига мувофиқ юз беришини унутмайди. Образларга бадиий бўёқни ҳаёт ҳақиқати асосида «тақсимлайди».

Бу жиҳатдан асардаги «тиригиде ўлик»ларнинг энг йирик вакили Абдулатиф характери анча пухта ишланган. Ёзувчи унинг қонида мустабид бобоси янглиғ аёвсиз ҳокимлик ҳисси қайнаб турганлигини, тоҷу таҳт учун ўз отасини ўлдиришдан ҳам тоймаслигини, айни ҷоқда шароитга қараб иш тутганлигини бутун тафсилотлари билан тасвиirlайди. Хусусан «мангуликча тирик»ларга қарши курашда Абдулатифнинг инсонийлик қиёфасини ўйқотганлиги, илм-маърифатдан хабардор бўлгани ҳолда жаҳолатга берилиб, мислсиз шафқатсизликлар қилгани ўқувчи қалбида чуқур нафрат уйғотади. Бироқ баъзан шундай таассурот туғиладики, Абдуллатиф гўё фақат жонини сақлаш ниятида ҳаракат қилади, у давлатни бошқариш миқёсидаги катта муаммоларни ечишга қодир бўлмаган арзимас одамлардек мажруҳ ва нотавон туюлади, аслида эса шаҳзода ўзига хос йирик шахслардан биридирки, уни «майдалаштириш» ҳақиқатга хилофdir

деган шама «Улуғбек хазинаси»нинг ўзида аниқ ифодаланган.

Романда Улуғбекнинг ҳалокати, Абдуллатифнинг ўлими фоятда таъсирчан манзараларда чизилади, лекин буюк мунажжимнинг қатл этилиши юрагимиздан бир парча этни юлиб олгандай ачиштиrsa, падаркушнинг боши олинганда, «итга ит ўлими»деб юборгингиз келади. Зоро, асар икки хил ҳаёт, икки хил ўлим тўғрисида нақл қилади: кимки ҳаётини халқ манфаатига, эл-юрг равнақига бағишиласа адолату ҳақиқат тантанасига сафарбар этса, у чинакам қаҳрамон бўлади, шон-шуҳрат қозонади, мардлик ва матонат тимсолига айланади, ўлими эса умумхалқ мотами бўлади, порлоқ хотира қолдиради, аксинча, фақат ўз бошининг ғамини еб, ўзгаларга, меҳнат аҳлига хиёнат қилиш билан кун кечиrsa, жаҳолат ҳам қабоҳат келтиrsa, унинг ўлими ҳатто ачиниши туйғуларини ҳам уйғотмайди, ўзи бадном бўлади.

«Улуғбек хазинаси» тўғрисида тағин нималар дейиш мумкин? Яна қандай илиқ сўзлар айтиб, қандай эътиrozлар билдиришимиз лозим?

Роман кўпгина муҳим ижтимоий муаммоларни ўртага ташлайди, улардан бир қанчасининг бадиий ечимини беради, бир қанчасини ўқувчилар диққатига ҳавола қилади. Улуғбек, Али Қушчи, Қаландар Қарноқий, Мавлоно Муҳиддин, Абдулатиф сингари аксари образлар анча таъсирчан, ёрқин бўлиб чиқкан, Хилватий, Султон Жондор, шайх Низомиддин Ҳомуш каби баъзи иккинчи даражали образларнинг характерларидаги айrim нуқталар, айrim хусусиятлар етарли даражада

очилмагандай туюлади, асарнинг тилида ёзув-чининг маҳорати намойиш қилинса ҳам гоҳида архаик сўзлардан меъеридан ортиқча фойдаланилгани, гоҳида муаллиф шарҳлари билан қаҳрамон нутқида фарқ сезилмай қолганини сезиш мумкин.

Эндиликда, «Улугбек хазинаси»ни чуқуроқ тадқиқ этиб, унинг фазилатлари, айрим қусурларини кенг кўламда ёритиб берадиган илмий асарлар пайдо бўлса ажаб эмас. Зеро бу асар баркамол илмий кузатишлар, илмий хуласалар, фикрлар «жанги» учун бой материал беради.

Ижодкор доим ўсишда, ўзгаришда бўлади, унинг изланишлари узлуксиз давом этади, бироқ миқдор ўзгаришларнинг сифат ўзгаришларга айланиши баъзан секинлик билан рўй беради. Аниқроғи, гоҳида катта юксакликлар забт этилса, гоҳида фақат юксакликларни эгаллашга тайёргарлик кўрилади, ижодий машқлар амалга оширилади.

Шу нуқтаи назардан қараганда Одил Ёкубов фаолиятида бир қанча жиддий ижодий босқичларни босиб ўтди. Бу «Муқаддас», «Қанот жуфт бўлади», «Улугбек хазинаси» ва ниҳоят, биз энди фикр юритмоқчи бўлган «Диёнат» асарларида яққол кўринади.

ШИДДАТГА ШИДДАТ ҚУШИЛАДИ

Ҳар кимда ўзига яраша шиддат бўлади, лекин у хилма-хил салмоқ, ранг-баранг мазмун касб этиб, турли хил ўйсинда ўзлигини намойиш қиласди. Зотан шиддатсиз ҳис-туйғусиз одам ҳеч қачон чинакам баркамолликка эришолмайди. Дарвоқе, ишқ — бу аланга, бу олов,

бу мавж, бу шиддат демакдир, деб онг урган шоирларимиз минг карра ҳақ! Лекин ҳаммамиз ҳам табиат ато қилган шиддатдан унумли фойдаланяпмизми? Ўни меҳнатимизда, интилиш-изланишларимизда, курашларимизда кўз-кўз қилоляпмизми?

Саволларга аниқроқ, ёрқинроқ жавоблар топиш ниятида Абдулла Ориповнинг мана бу сатрларига мурожаат этамиз:

Учмоқда! Қаерга? Чўққига! Нечун?
Бургутнинг шиддатин ўйғотган нима?
Бўронли даргоҳда не кутар уни,
Кудратли қанотин қўзгатган нима?

Ўйноқи шамоллар ила басма бас,
Ана, қўнди бургут энг юксак жойга!
Чўққи узра мағрур турди-ю бирпас,
Яна бўрон мисол қўзғалди, қайга?..

Ана шиддату мана шиддат! Унинг олдида ўйноқи шамоллар ҳам, даҳшатли бўронлар ҳам ҳеч гап эмас! Бироқ зўр қудрат, зўр ҳаракат ўз-ўзидан наф келтиравермайди. Шунинг учун шоир баралла хитоб қиласди: «Ахир, не бўларди берсанг, табиат, шу буюк шиддатга яраша мақсад?»

Иўқ, бу шунчаки хитоб эмас, балки қалб тўридан отилиб чиқсан шиддатли нидо бўлиб, янги фикрлар тўлқинини ҳосил қиласди: заҳматкаш юртимизнинг асл фарзандлари бутун куч-қудрати, шиддатини эзгулик кашф этишга сарфляяпти, бироқ баъзи ноқобил шахслар Абдулла Орипов шеъридаги бургутдай ўзларини тоҳ ўтга, гоҳ сувга уриб юриб, гайрати,

шижоатини халқ манфаатига йўналтиrolмайтганлиги ҳеч кимга сир эмас-ку! Ҳолбуки, инсон эзгулик учун туғилган, эзгулик яратиш учун туғилган. Шунинг учун у Максим Горький таъбири билан айтганда, «Инсон номи мағрур жаранглайди!» Лекин ҳаёт мураккаблигига диққат қилинг: ким эзгулик яратмайман, мағрур жарангламайман, деб ўйладиди? Ҳеч ким! Аммо кўпчилигимизнинг ўйларимиз, хаёлларимиз, орзуларимиз хатти-ҳаракатларимизга, фаолиятимизга, қуаш-интилишларимизга ҳамма вақт монанд келавермайди-да!

Коммунистик эътиқод билан қуролланган ҳақиқий истеъодд эгалари сингари Одил Ёкубов ўзининг деярли барча асарларида мана шу номонандлик, номутаносибликнинг ижтимоий моҳиятини ёритиш мақсадида хилманил, ранг-баранг бадиий типлар, ҳаётий образлар, мураккаб характерлар яратиб, социалистик реализмнинг бекиёс қудратини намойиш қилиш йўлида шиддат билан қалам тебратмоқдаки, бу унинг «Диёнат» романидаги очиқ ойдин кўринади.

Шунинг учун очиқ-оидин кўринадики, мазкур асар кучли туйғулар, эҳтиросли фикрлар, ўткир ғоялар шиддати билан мавжланиб, қалблардаги шиддатни авж олдиради, ўзи ҳам, воқеалари ҳам, қаҳрамонлари ҳам табиий шиддат руҳига йўғрилган. Аниқроғи, «Диёнат»да тинимсиз изланиш-интилишлар, қуашлар билан нафас олаётган замондошларимизни учратамиз, уларнинг қувончлари, ғам-аламлари, зафарлари-ю, мұваффақиятсизликларига шерик бўламиз. Айниқса, Отақўзи билан Нормурод Шомуродов олишуви, тўқнашув-тортишуви бутун вужудимизни қамраб олади,

Ахир, ҳар иккаласида бургут қудрати-ю, бургут шижоати жўш уриб туради-ку! Ҳар иккаласи ҳам ҳаёт юксакликларини кўзлаб, фикрлар, ғоялар, туйғуларнинг чексиз-чегарасиз залворли уфқларида парвоз этади-ку!

Хуллас, бир-бирига муносаб рақиблар! Рақиблар! Йўқ, бу сўз қаҳрамонлар муносабати моҳиятини очиб беролмайди. Отақўзи ва Нормурод Шомуродов, авваламбор, бир-бирига яқин қариндош, бири жиян, бири тоға. Яна шунчаки тоға-жиянларгина эмас, балки отаболадай жуда яқин бўлиб кетган одамлар. Улардан бири — тоға — машҳур олим, кекса инқилобчи, совет ҳокимиятини ўрнатишда, мустаҳкамлашда бевосита иштирок этган, қуашган, ёшини яшаб, ошини ошаб, гўрининг оғзи кўриниб қолганда ҳам эътиқодида мустаҳкам турадиган инсон, иккинчиси кучга тўлишган истеъоддли раҳбар, колхоз раиси, улдабурро мутахассис, жон-холини халқ манфаати йўлига тиккан, бироқ ишбилармонлигига маҳлиё бўлиб кетиб, аҳён-аҳёнда диёнату виждонга қулоқ солмайдиган ёки адолатга зид борадиган мураккаб характерлари бақувват, йирик шахс.

Очигини айтайлик: қаҳрамонларнинг бу тарздаги тавсифи уларнинг асл қиёфасида, руҳи, қалби, ақлида мужассамлашган мазмунни тўла ва мукаммал кўрсатолмайди. Ёзувчи шунга эришганки, Отақўзида ҳам, Нормурод Шомуродовда ҳам ҳил ижобий хислатлар, мураккаб туйғулар, салбий ҳолатлар бир-бirlари билан табиий суратда ҳаётнинг ўзидаидай қоришиб, қўшилишиб, бирлашиб кетган ва баъзан уларда мусбат ва манфий хусусиятларнинг қандай қилиб туғилгани ёки барҳам топиб кетганини англай олмай қолишингиз ҳеч

тап эмас. Тұғри, бу мuloҳазалар күпроқ Отақұзига тегишли. Нормурод Шомуродов эса аксари ҳолларда захматкаш халқимизнинг энг яхши фазилатларини ўзига жо қылган ажайиб сиймо тарзида гавдаланади. Аммо у ёзуви фикрларини ўқувчиларга етказиб берувчи воситачи эмас, балки ўз эътиқоди, ўз дунёқарашига мувофиқ яшовчи, ҳаракат қылувчи жонли, реал шахс сифатида намоён бўлади. Шунга қарамасдан Отақұзы образи ёрқинроқ, кўламлироқ, чуқурроқ, ҳаётйроқ бўлиб чиққанки, бу табиий ҳолдир. Ахир, романдаги эпик тафаккурни яратувчи, ҳаракатга келтирувчи барча кучлар, воситалар ҳам, ёзуви диққат маркази ҳам — барча-барчаси Отақұзига уланган, Отақұзига боғланган-ку! Нима тўғрисида сўз очилмасин, қандай масала кўтарилмасин ҳаммаси Отақұзы билан бошланиб, Отақұзы билан якунланади, сюжет «ўқи» ҳам, композициян тузилиши, услугуб ҳам ўша образ дунёсини ёритишга хизмат қиласди. Зотан бадиият талаблари ҳам, ҳаёт тараққиёти ҳам шунга мостушади, вазиятнинг бошқача бўлиши ижтимоий муаммоларни санъаткорона тадқиқ этишга қулай имкон туғдирмасди.

Бадиият талаблари деганда биз шуни на-
зарда тутамизки, асар ғоясини чуқур ёритиш
учун талаб қилинган барча воқеалар, фикрлар,
тўйғулар, кузатишлар, тафсилотлар бир нуқта-
га йиғиб берилиши керак, Отақұзы эса мана
шу нуқта вазифасини ўтайди.

Ҳаёт тараққиёти тақозоси деганда шуни англаймизки, роман воқеаларининг иштирокчилари қилиб олинган шахслар ҳам, китобхонлар ҳам шиддатли, жонли, реал тўйғулар, ке-

чинмалар, ҳаққоний мuloҳазалар дунёсида яшайди, курашади.

«Диёнат»да мана шу икки омил — ҳаётийлик ва бадиийлик бир-бирига моҳирона қўшиб олиб борилгани туфайли Отақұзы қалбларни тўлқинлантирадиган баркамол бадиий тип дарражасига кўтарилган. Йўқ, шунчаки тўлқинлантирибгина қолмайди. Гоҳида инсоний саҳовати билан дилларни хушнуд этади, гоҳида раҳбарлик истеъоди билан, топқирлиги, удавабурролиги, ишбилармонлиги билан самимий ҳурмату муҳаббатимизни қозонади, гоҳида файритабиий ҳатти-ҳаракатлари билан кўнгли-
мизни ғаш қиласди, ранжитади, гоҳида диёна-
тини йўқотган кимсалардай иш олиб бориб нафратимизни қўзгайди, гоҳида... Эҳ-хе, унинг шахсияти, фаолияти, интилиш-изланишлари, курашларидан келиб чиқадиган ғоятда зидди-
ятили, қарама-қарши, мураккаб мuloҳазалар,
тўйғулар, ҳислар оқимининг моҳиятини анг-
лаш осон эмас ва мана шу оқим асарнинг би-
ринчи саҳифалариданоқ бизни ўзига жалб қилиб, тортиб олади-да, то қаҳрамон билан сўнгги бор учрашувлардан кейин ҳам қўйиб юбормайди, вужудимизни, қалбимизни гўё забт этиб, ўз мулкига, ўз оламига, ўз ҳаракат, фаолият майдонига айлантиргандай таассу-
рот туғилади.

«Диёнат»нинг бошидаёқ мана шундай вазият пайдо бўлади: «Отақұзы миллионер раисларга хос виқор ва дабдаба билан қўққисдан «бостириб» келди. Домла Шомуродов машина овозини эшишиб, кўчага чиққанида дарвоза олдида бири оқ, бири ҳаворанг иккита «Волга» қатор турарди. Кетма-кет «Газик» келиб тўх-
тади.»

Дастлаб қаҳрамоннинг виқори, дабдабаси бир оз оғирроқ ботади, яхши ҳазм бўла қолмайди китобхонга, бироқ кейин Отакўзи тогаси Нормурод Шомуродовнинг чин инсон, ҳақиқий олим, принципиал ва жанговор курашчи, ҳалол сиймо эканлигини оғзидан бол томиб ганирганда, ёниб-куйиб, бутун вужуди билан фурурланниб сўзлаганда унга меҳримиз, иззат-ҳурматимиз ошиб кетади: «Умуман тога-жиянлар бир-бирини дилдан яхши кўришса ҳам бу меҳроқибатни ҳеч қачон ошкор қилишмас, аксинча бир-бирини сал чандиб туришга одатланган. Лекин ҳозир негадир, эҳтимол, сўнгти пайтларда мақтов ва улуғлашларга ўрганиб қолгани учундир, тогасининг қочириқ-учириқлари Отакўзига малол келди».

Энди бир-бирларини чандиб туришмас, қочириқ-учириқлар қилишмас, балки даҳанаки жангларга қиришади, жиддий тўқнашувларга боришиб, ўзларининг ким эканлигини намоён эта бошлайди.

Мана ўша жанглардан бири: «Нега энди мен... қариган чоғимда... сенинг ўғлингни деб, ўз виждоним... виждонимга қарши иш тута? эканман?

Отакўзи қўлларини столга тираб, бутун гавдаси билан олдинга энгашди:

— Сиз... нима деяпсиз ўзи? Сизнинг виждонинг қийналадиган нима иш қилди менинг ўғлим? Ё одамхўрликни тарғиб қиляптими ўз диссертациясида?»

Бу олишувнинг асоси жуда табиий, салмоқли ва муҳим мазмун касб этади. Гап шундаки, Отакўзи тогасидан кандидатлик диссертациясини ҳимоя қилаётган ўғлини қўллаб-қувватлашни кутяпти, Нормурод Шомуродов эса бу

диссертация билан танишиб, унинг ҳали баркамол иш даражасига кўтарилимаганини, унда нотўғри фикрлар илгари сурилиб, тузи ошиб кетган шўрли сувлардан фойдаланишини тарғиб этганини вужуди, виждони билан ҳис қиласи, тушунади, тушуниб, ҳис қилиб турган адолат-сизлики ёқлаш бундан ҳам даҳшатлироқ адолатсизлик бўлиб чиқишини яхши билади. Шунинг учун ёш олим ўз жигарининг фарзанди бўлишига қарамасдан унга ён босолмайди, бироқ қарши боришдан ҳам ўзини тияди, халақит бермай қўяқолай, кейин ўзи тушуниб олар, деган ўйга боради. Отакўзи эса илмий ҳақиқатнинг галиб чиқиши ёки мағлуб бўлиши билан қизиқмайди, бунда виждон, қалб, диёнат катта аҳамият касб этишини назар-писанд қилмайди. Тўғри, адолат, виждон, диёнат фанга бевосита алоқадор эканлигини билади, аммо ўғли, жигаргўшаси, фарзандининг обрўси, мавқеини ҳар қандай ҳақиқатдан, диёнатдан юқори қўяди.

Ёзувчи қаҳрамоннинг бундай кайфиятини рўйи-рост кўрсатар экан, унинг бу борада ҳақ эмаслигини алоҳида таъкидлайди, Нормурод Шомуродовга нисбатан ўқувчининг меҳри товланиб, иззат-ҳурмати ошиб кетишини таъминлайди. Ахир, у ўз жигарбанди деб ҳам диёнатига хиёнат қилмайди! Бунга чин қалбимиздан офарин деймиз, гап шундаки, ҳозир чинакам олим бўлишни эмас, балки унвон, даража олишини удумга айлантириб юборганлар кўпайиб боряпти, амалда, ҳаётда ҳам уларга йўл очиляпти, бу эса ҳақиқий истеъдодларнинг рўёбга чиқишини қийинлаштиради, ҳатто баъзан уларнинг ҳалокатини таъминлайди. Яна шуниси даҳшатлики, ўша шахслар вазиятнинг бун-

дай йўналишга келиб тақалишини, фожиаларни келтириб чиқаришини ўйламайди, лекин ютқизмайди, ютади, ниятларини амалга оширади. Қаранг-а, қораланиши лозим бўлганлар, фош этилиши зарур бўлганлар оқибат-натижа да голиб чиқяпти Тўғрику-я, лекин улар ҳукмрон мавқега эга эмас, жамиятимизнинг маъна вий-мафкуравий йўлини белгиламайди, деб ўзимизга таскин беришимиз мумкин ва шундай бўляпти ҳам.

Ўз-ўзига таскин бериб юрганлар ёки кўриб кўрмаган, билиб билмагандай бўлиб юрганлар орасида Отақўзи ҳам бор. Нормурод Шомурод мана шуниси билан келишолмайди, шунисига бефарқ қарай олмайди, шунисини ҳазм қилолмайди. Энг муҳими, ҳазм қилолмай, келишолмай, кўниколмай жимиб кетаверишга, четда томошабин бўлиб кузатиб туришга вижидони, қалби йўл қўймайди. Пировардида тўқнашувларга, олишувларга уланиб кетади, драматизм кучайиб таранг тортиб боради ва тўқнашувлар, олишувларда нимаики иштирок этса, барчаси бирлаҳза тўхтаб турмайдиган узлуксиз давом этувчи шиддат билан ҳаракат қиласди.

Тоға-жиян ўртасидаги биринчи жиддий «жанг»да ҳар иккала томон ҳам енгилмайди, аммо ғалаба ҳам қозонмайди. Битта нуқта қўйилади, холос. Бу нуқтанинг моҳияти шундан иборатки, Отақўзи тоғасини тарқ этади, ундан бутунлай юз ўгирадиган даражада хафа бўлади. Бироқ хафа бўлиши ўринлими?

Ёзувчи бу саволга жавоб беришга шошилмайди. У қаҳрамонлар дилида, онгода, ички дунёсида рўй берган ўзгаришлар, хилма-хил тўнтаришлар оқимини кузатишда давом этиб,

диққатимизнинг Нормурод Шомуродовга, унинг жуфти ҳалоли Гулсара аяга қаратади.

«Принципал бўламан деб, ҳаммадан айрилиб, бир уйда бир ўзимиз сўппайиб қолдик-ку, домлажон?»— деб Гулсара ая Нормурод отани «чақиб» олгандан кейин мана шундай вазият вужудга келади: «Бўлди! Бас!— Нормурод Шомуродов гурзидек мушти билан столни гурсиллатиб урди. Кенг юзига қон тепиб, кўзлари ваҳимали чақчайиб кетди: кампир унинг нозик туйгуларига ниш урганди.— Гапирма дегандим сенга бу гапларни! Падарига лаънат унақа... тўғри гапга тескари бўладиган тувишгандарни! Қозилашган қариндош бўлмас, деб... керак эмас менга унақа ўз жигилдонини деб қозилашиб юрадиган... нопоклар!»

Қўриняптики, Отақўзи нопоклар қаторига ўтказиб қўйилди, лекин Нормурод Шомуродов унинг шунчаки нопок эмаслигини яхши билади, жаҳл устида жиянига шундай таъриф беряпти, аслида тоға миллионер раис фақат нопоклиги билан ном чиқармаганидан хабардор. Иўқ, унда салбий хусусиятлар билан олижаноблик, ҳалоллик, ишбилармонлик, дадиллик, мардлик қўшилиб, қоришиб кетганлиги учун куйиб ёнади, эзилади, дард чекади: «Домла эшикни қарсиллатиб ёпди-да, боши айлангандай бўлиб, деворга суюнди... домла аъзойи бадани бўшшиб, ўзини креслога ташлади».

Тоға фақат жиянига, жиянининг ўғлига кайишмагани учунгина шундай ҳолатга тушаётгани йўқ. Ҳаёт тақозосига кўра вазият жуда чигаллашиб, мураккаблашиб кетган. Ёзувчи қаҳрамонлар муносабат-муомалаларининг доимо шиддатли тўқнашувларга келиб тақалишини кучли, ҳаётӣ, табиий исбот-далиллар орқа-

ли кўрсатади. Мана шу исбот-далиллар ғоятда беғубор, самимий, айни соқда жуда чигал, мураккаб воқеалардан ташкил топгани туфайли бизнинг ишончимизни қозонади, вужудимизни хилма-хил туйғулар, кечинмаларга тўлдиради, қаҳрамонлар билан ҳамдарду ҳамнафас бўлишга олиб келади.

Нормурод Шомуродов ўз виждонига қарши бориб, жиянининг ўғлини қўллаб-қувватламагани, номигагина фан кандидати бўлишни қоралагани, нотўғри илмий йўналишга қўшилгани тақдирлашга лойик, аммо қаҳрамонимиз тақдирлашимизни кутмайди, аксинча, гам-аламлар қаърига тушиб қолади.

Аввало, жиянига, жиянининг ўғлига ёрдам қўлини чўзолмагани учун ўзини қўярга жой тополмайди, тинчини йўқотади. Лекин дард устуга чипқон чиқди, деганларидек, бундай кўнгилсизлик бошқа кўнгилсизликлар билан уланиб кетиб, қаҳрамоннинг дил ярасини авж олдириб, кучайтириб, оғирлаштириб юборади. Ахир, кўзининг бирдан бир оқу қораси бўлган ёлғиз фарзандининг Улуг Ватан урушида мардларча жанг қилиб, Совет Иттифоқи Қаҳрамони бўлиб, ота-она бағрига қайтиб келолмагани, бевақт, шафқатсиз ажалга учрагани, сўнгра бўлгуси келини — гўзал қизни бир ноқаснинг бадном этгани, пировардида мана бу бадномлик натижасида дунёга келган қизга жиянининг ўғли, жиянининг қизи ўша аёлнинг ўғлига қўшилиб, оила қураётгани Нормурод Шомуродовга, унинг хотини Гулсара аяга ҳам игнадек ботмайдими, бутун вужуди, виждонини ларзага келтирмайдими!

Яна шунисидан мамнун бўласанки, бу воқеалар ривожи ижтимоий тараққиётга, ҳаётга,

объектив ҳақиқатга монандлаштирилган ҳолда тасвирланади. Зўрма-зўракиликка, сунъийликка йўл қўйилмайди, қаҳрамонлар жонли, реал, ҳаққоний турмуш муҳитидан ажратиб олинмайди, улар муаллиф «бўйруги»га истаги, хоҳишига кўра эмас, балки ҳаётий зарурат асосида, ижтимоий тараққиёт тақозосига мувофиқ ҳаракат қиласди. Эътибор беринг: Отақўзи ўз истаги, ўз хоҳишига кўра тогасининг ярасини янгилаш учун Фазилатхон (сўқир тақдир тақозосига кўра Шомуродовга келин бўломмай қолган аёл) билан, уни бир пайтлари бадном қилган ўша аёлни авраб-алдаб, бошини айлантириб, норасмий турмуш қурган, ўғил ва қиз орттирган Бўрибоев билан, йигирманчи-ўттизинчи йилларда Нормурод Шомуродовнинг Мирзачўлни ўзлаштириш ҳақидаги илмий хуносаларига тиш-тироғи билан қарши чиқиб, уни узлуксиз равишда таъқиб қилган, кейинги пайтларда қандайдир йўллардан бориб, қандайдир воситаларни ишга солиб фан доктори бўлган, дастлабки ниқобларини юлиб олиб ташлаб, янги ниқоб кийиб юрган Миробидов билан оғиз-бурун ўпишмайди. Бунга уни ҳаёт мажбур қиляпти. Фазилат Отақўзининг колхозида яшайди, шунга кўра унинг ўғли билан раиснинг қизи, қизи билан раиснинг ўғли топишиб, бир-бирларини ёқтиришиб, севишиб қолишади. Тўғри, ёзувчи уларнинг, Ҳайдар ва Латофат, Қодир во Тоҳиранинг, бўлгуси келин-куёвларнинг муносабатларини бутун нозиклиги, назокати, латофати, мураккабликлари, қиинчилеклари билан ҳаётнинг табиий оқимидаи кўрсатолган, деб барада айтольмаймиз. Негаки, баъзан улар ўз хоҳишлиридан кўра муаллиф истагига мувофиқ ҳаракат қилгандай бўй-

лади. Чунончи, дастлаб Латофат Ҳайдарга рўйхушлик бермайди, раиснинг ўғли бўлганинг учун мени мажбур қилиб ўзингга хотинликка олмоқчисан, деб рўйи-рост айтади, тап тортиб ўтирамайди, аммо муайян вақт ўтгандан сўнг ўзи севиб қолди, деган фикр ўртага ташланадики, мана шу фикр етарли даражада асосланмаган. Аммо ҳар иккала персонаж роман сюжети, конфликтини ҳаракатга келтирувчи куч бўлмагани туфайли улар ҳаёти тасвиридаги номутаносиблик (сунъийлик, юзакиликдан келиб чиқсан) чиройли кўйлакка қўпол суратда ёпиштирилган ямоқдай хунук кўриниб турмайди. Бир оз таъбингни хира қиласди-ю, сўнгра асосий воқеалар тасвиридаги табиийлик, ҳаққонийлик билан «ювиб» кетилади. Борди-ю, Отақўзининг фаолиятини ёритишга қаратилган воқеалар, фактлар ифодасида қандайдир зўрма-зўракилик, сунъийликка йўл қўйилса, «Диёнат»нинг ҳозирги ҳолатдагидек катта бадний-гоявий куч-қудрат билан жаранглаши амримаҳол эди. Ҳайриятки, Одил Еқубов қунт, сабр-чидам билан, беҳад изланиш-интилишлар билан бу борада ҳаётийликни таъминлайди, Отақўзи хатти-ҳаракатлари, кечинмаларининг ўқувчиларда заррача шубҳа, ишончсизлик туғдирмасликка эришади. Зотан у Отақўзининг раис сифатида ўнлаб ҳар хил тоифадаги одамлар билан мулоқотга, мумомлагла гиришишини билади, бироқ ҳаммасига эмас, балки айримларигагина диққатимизни жалб этади. Жалб этганда ҳам ҳар қандай тасодифлардан қочиб, фақат ҳаётий заруратга суюнади, турмуш оқимига жиддий эътибор беради.

Романдаги барча тўқнашув-тортишувлар-

нинг бир учи Отақўзига, иккинчиси Нормурод Шомуродовга боғланади-ю, бошқа қаҳрамонлар эса конфликтнинг авжини оширишга хизмат қиласдиган туртки беришдан нарига ўтишмайди, тоға-жиян характерларининг у ёки бу қиррасини ёритишда муҳим восита бўлиб хизмат қилишишади. Муҳим восита бўлиб хизмат қилаётганликларининг боиси шундаки, уларнинг деярли барчасида ўзимизнинг ўйларимиздан, ўзимизнинг кечинмаларимиздан нимадир мавжудлигини кўрамиз, замондошларимизга хос хусусиятлардан нималарнидир гавдалантирганига, жонлантирганига гувоҳ бўламиз. Натижада улардаги фазилатлар бизни қувонтиради, салбий ҳолатлар, нуқсонлар курашга даъват этади, қаердаки манфий хусусият бўлса, барчасини илдизи билан йўқотишга чорлайди, ўзимизнинг онгимизни ўстиришга, ақлимизни чархлашга, маънавий баркамолликни эгаллашимизга ундейди. Лекин бу кайфиятнинг туғилиши ҳам, ривожланиши ҳам, мустаҳкамланиб, хукмрон мавқени эгаллаши ҳам биринчи галда Отақўзига бориб тақалади. Натижада у асарда ягона, етакчи гоявий-бадий марказ вазифасини ўтайдиган образ даражасига кўтарилиши керак ҳдикни, ёзувчи мана шу нуқтан назардан келиб чиқиб Отақўзи ҳарактерининг хилма-хил, ранг-баранг, мураккаб қирраларини очишга алоҳида эътибор беради. Қайси бир қаҳрамон хурсанд бўлмасин, баҳт нашъасини сурмасин ёки дард чекмасин, эзилмасин, ғам-аламлар дарёсига «ғарқ» бўлмасин, оқибатда бу манфий-мусбат туйғулар, ҳислар, кечинмалар миллионер раис кайфияти, ҳолати, психологияси, интилиш-изланишларига ҳамоҳанглик, муштараклик касб эта-

ди. Айниңса, Нормурод Шомуродовда шундай бўлади. Негаки, у моҳият-эътибори билан ро-маннинг ғоявий-бадиий мавқенини белгилашда Отақўзи сингари масъулиятли ва муҳим ўрин тутади. Тоганинг жиян билан олишуви, тортишуви бир лаҳза тўхтамайди-да, ахир! Улар хатти-ҳаракатлари, ўйлари, ишларининг шиддати-чи? Иккала яқин қариндошнинг гоҳ рақиб, гоҳ иттифоқчи, гоҳ бир-бирларини ардоқловчи, гоҳ бир-бирларига нафрату ғазабларини изҳор қилувчи шахслар сифатида гавдалантирилиши-чи?

Нормурод Шомуродов Ҳайдарнинг фан кандидати бўлишига кўмаклашишдан бош тортганда Отақўзи ундан юз ўгириб, қўлини ювиб қўлтиққа уриб кетганда қаттиқ азият чеккан эди, аммо айни замонда мамнунлик тўйғуси пайдо бўлади: ахир, вижданан нотўғри деб билган ишга қўл урмади-ку!

Шунга қарамасдан Одил Ёқубов унинг диссертацияси ҳимоясига етиб борганини тасвирлайди. Бу мантиққа зид эмасми? Ахир, ҳимояга ёрдам беришдан бош тортган ва ўзининг бу қарорини одил, адолатли деб ҳисоблаган домланинг кейинги ҳаракати ғайритабиий-ку!

Вазиятга юзаки қараганда ғайритабиий бўлиб туюлиши мумкин. Аслида Нормурод Шомуродовнинг Ҳайдар ҳимоясида иштирок этиши ҳар томонлама асосланган.

Аввало шуки, жияни, жиянининг ўғлига домла фақат яқин қариндош қондош-жондош бўлганлиги туфайли меҳр қўйиши зарур эди ва бу заруратдан учаласи ҳам маҳрум этилган, лекин мазкур шахсларни бирлаштирувчи булардан муҳимроқ, салмоқлироқ омил мавжуд:

Ҳайдарда олимлик қобилияти мавжуд бўлиб, у она-Ерга самимий муҳаббат билан қарайди, тупроқ сирларини чуқур ўрганиш натижасида эл-юртга, ҳалққа катта наф келтириш мумкинлигини англайди, ундаги бу хусусият, шубҳасизки, отасидан юқсан, падари-бузрукворидан ўтган ва ҳар иккаласидаги мана шу фазилат Нормурод Шомуродовни ўзига тортади, ота-боладаги қандайдир кибру ҳаво, ўзларини бошқалардан юқори қўйинш, ўта мағрутланиш, мақсадга тўғри, ҳалол йўлдан эмас, балки номақбул, носоз воситалар орқали бориш эса унинг ғазабланиб, йўлбарсдек наъралар тортишига, тўлғанишига олиб келади, икки ўт орасида қоврилишига сабабчи бўлади.

Ёзувчи мурракаб фикрлар, қарама-қарши түйғулар оқимини тадқиқ этиб, қаҳрамон хатти-ҳаракатларининг табиий эканлигини тасдиқлайди. Ахир, жиянининг ўғли катта бир довондан ошмоқчи, олимликнинг биринчи, дастлабки босқичини эгалламоқчи-ку! Шундай пайтда тоға қўлини қовуштириб, олма пиш, оғзимга туш деб ўтираверадими?

Хуллас, роман воқеаларининг ривожи, ҳаёт мантиғи Нормурод Шомуродовнинг Ҳайдар ҳимоясига боришини тақозо қиласди, айни чоқда ҳимояда оғзига мум тишлиб, лом-лим демасдан ўтиромаслигини ҳам кўрсатади. Бироқ гапиргандга профессор нима дерди? Жиянининг ўғли деб Ҳайдарнинг хом-хатала бирёклама фикрларини ёқлармиди? Борди-ю, ёқласа вижданига хилоф иш тутиб, диёнатига дод туширмасмиди?

«Илмий ишнинг асосий хулосаларидан бири оқава сувлардан қайтадан фойдаланиш муаммоларига бағишиланган, яъни бу сувлар...

минерал тузлар миқдори беш процентга чиқ-
қунча... уларни ишлатиш мумкин, деган якун
ясالган... Бу сув, яъни беш процентгача ми-
нерал тузлари бўлган бу оқава сувлар ерга қан-
дай таъсир этаркин? Демоқчиманки, ерниг
шўрини баттар ошириб юбормасмикин? Маса-
ла шундаки... бу ерда келтирилган диаграмма-
лар сал ноаниқ, мавҳумроқ эмасмикин?..
Халқимизда етти ўлчаб бир кес, деган гап бор!
Худди шу муаммо, масалан, Америкада ҳам
бор. Аммо уларда шундай қонун мавжудким,
сувдаги минерал тузлар миқдори бир фоиздан
ошса... бу сув ишлатилмаслиги лозим!»

Ҳайдарнинг ҳимоясида айтилган мана бу
сўзлар Нормурод Шомуродовга тегишли. Қа-
ранг: улар чертиб-чертиси кескин айтилмаяпти,
аксинча, чўчиб-чўчиб, қандайдир ҳадиксираб
айтиляпти, бироқ кекса олим виждонига, диё-
натига хиёнат қиласмаслик учун адолатли фик-
рини изҳор қиляпти. Мулойимлик, осоийшта-
лик, босиқлик билан изҳор қиляпти-ю, аммо
бу босиқлик, осоийшталик, мулойимлик таги-
да фоятда жиддий, ўткир, принципиал йўсинда
ифодаланаётган аччиқ ҳақиқат ётибди. Аччиқ
ҳақиқатнинг моҳияти шундан иборатки, Ҳай-
дар илмий ишини ниҳоясига етказмаган, замо-
навий талаблар даражасидаги юксакликка
кўтарилимаган ва пировардида унга анча-муни-
ча олимлар қарши овоз беради. Иўқ, раиснинг
ўғли ҳимояда йиқилмайди, муваффақиятсиз-
ликка учрамайди, лекин Нормурод Шомуродов
нутқи унга жиндай зарба беради, дабдабали
мақтovлар, «урра-урра»лардан маҳрум қила-
ди, холос.

Тоғасининг касридан ўғлига доф тушгани-
ни билган Отақўзи яна тўнни тескари кийиб

олади, қариндошлилик ипини бутунлай узиб,
қўлини қўлтиғига ургандай бўлиб кетади,
ғазаби, нафрати ортиб, Нормурод Шомуро-
довнигина эмас, балки ўз онасидай меҳрибон
бўлиб қолган Гулсара аянни доғда қолдиради,
ҳар иккаласидан юз ўгиради, Гулсара ая бу
даҳшату надоматлар, фам-аламларни кўтарол-
масдан вафот этади.

Отақўзининг Гулсара аянинг ўлими ҳақи-
даги хабарни эшитган пайтдаги ҳолати қалби-
мизни жунбушга келтирадиган даражада таъ-
сирчан қилиб ифодаланган: «Мана, бу шумхаб-
ар етиб келганига бир соатдан ошди, аммо
хәёлидан ўша кунги машъум воқеалар чиқмайди,
кўз олдидан ариқ бўйидарайхон чопиб
ўтирган аянинг миттигина бўй-басти, фам чўк-
кан дардли кўзлари кетмайди. Буни эслали
билан аянинг ўлимига гўё ўзи айбордай бў-
лади-ю, юраги музлаб, бу фикрни жон-жаҳди
билан ҳайдашга уринади, хаёлини бошқа нар-
саларга чалғитмоқчи бўлади, лекин зум ўтмай
ўйлари яна ўша сертикан сўқмоқларга бурил-
ганини ўзиям сезмай қолади. Яхшиям ая ўша
ерда, ўша дақиқада қулаг қолмабди! Балки
шундай бўлгандир ҳам, балки у эшикни қар-
силатиб ёпгандеёқ йиқилиб тушгандиру,
кейин касалхонада... Иўқ, иўқ, ундаи бўлиши
мумкин эмас! Бошқа бир нарса бўлган унга.
Кейинги пайтларда ая ўзи чарчаб қолган, ёл-
физликдан эзилиб, ўғлини ўйлайвериб, адойи
тамом бўлганди. У бўлса, Отақўзи бўлса, бу-
тун заҳрини шу муштипар кампирга, бу беба-
қо дунёнинг фам-ғуссасидан қадди дол бўп
қолган шу кўнгли синиқ кампирга сочди! Ҳа,
ӯша куни яхши қилмади, Отақўзи! Аввалам-
бор, тоғаси савол берганда залда ўйилган

барча илм аҳлининг юзига оёқ қўйиб, шартта туриб чиқиб кетди, кейин чолга аччиқ қилиб, одамлар орасида башарасига туфлагандан бешбаттар қилди! Рост, тоғасиям яхши қилмади. Минг тўғри, минг ҳақгўй бўлганда ҳам Ҳайдар ети ёт бегона эмас, ўз жигари-ку, ахир! Ўсадиган эл — бир-бирини ботирим дер, деган гап бор-ку, ахир? Аммо... лекин... падарига лаънат ўша диссертациянинг! Нима, ўғли Ҳайдар кандидат бўлмаса, осмон ағдарилиб, ерга тушармиди?»

Бир қарашда миллионер раисман, деб ўзиға бино қўйган одамнинг шу тахлитда мuloҳаза юритиши, ўзининг яқин кишисининг бевақт ўлимидагуноҳи борлигини эътироф этиши, ҳар қандай илмдан, тўғрироғи, илмий даражадан инсонийликни юқори қўйиб, диёнати даъватига мувофиқ иш кўриши мантиқсизлик бўлиб туюлиши мумкин, бироқ ёзувчи Отақўзидаи мураккаб, кучли ва йирик, кенг миқёсли шахса да чинакам инсоф, виждон, адолат ҳам чукур илдиз отганини ишонарли кўрсатади. Уғлига ҳам, ўзига ҳам заар етказган, ҳар иккаласини қўллаб-қувватламаган, ҳар қандай шароитда ҳалоллигини, адолатпарварлигини намойиш қилган ва шу тариқа қариндошларини аямаган, уларга дашном берган тоғасини ая вафотидан кейин қишлоғига олиб бориб жойлаштирган, аяни ҳам иззат-икром билан дағни этган, барча маросимларини ўринлатиб ўтказган жиян тўғрисида бошқача фикр туғилиши мумкин эмас-ку, ахир!

Шу тахлитда иш қилган, одамгарчилик бурчини аъло даражада бажарган инсонга ихлосингиз ортади, унга меҳрингиз товланиб кетади, лекин Отақўзи айб-гуноҳларини адо-

латли ҳаракати билан ювиб, чинакам ҳалқ қаҳрамонлари қаторига қўшиладими? Нормурод Шомуродов сингари ҳар қандай мұхитда ҳам виждонига қарши боролмайдиган, диёнатига хиёнат қилмайдиган ҳалол, мард, инсофли шахс даражасига кўтариладими?

Савонни бу тарзда кўндаланг қўйиши учалик тўғри бўлмас. Негаки, асар воқеалари ривожи, ҳаёт мантиғи, объектив ҳақиқат нимани тақозо қилса, ёзувчи шунга қараб қалам тебратиши керак. Айрим ижодкорларимиз эса салбий шахсларнинг тезда қайта тарбияланиб, тубдан ўзгариб, соғ инсон, чинакам қаҳрамон бўлиб етишганини кўрсатишига шошиладилар. Оқибатда ҳаёт воқеаларининг ривожи ўз қонуниятларига, ўз мантиқ-эҳтиёжлари, талабарига эмас, балки ёзувчилар хоҳишига, истагига мослаштирилади, бундай мослашув эса шунчаки мослашув бўлиб қолаверади, у ҳаёт ҳақиқатга айланмайди.

Отақўзи ички дунёсида, кечинмалари, туйгулари, хатти-ҳаракатларидаги ўзгаришлар тасвирида сунъийликка, юзакиликка, зўрмазўракиликка йўл қўйилмайди. Айни чоқда ёзувчи ўз қалбининг тўрида қаҳрамоннинг манфий хусусиятлардан халос бўлиб, етук инсонлар сафидан мустаҳкам ўрин олишини хоҳлаганилигини билдириб қўяди, бироқ бу хоҳиш, бу туйғу характерни ўз ҳаёт йўлидан четга чиқариб, янгича бурилишга олиб келолмайди. Олиб келганида эди, бизнинг қаҳрамонга ишончимиз йўқолларди. Ишонч йўқолгандан кейин ёзувчининг ҳар қандай ҳаракати барака келтирмайди, зафарли натижалар билан якунланмайди.

«Диёнат»нинг деярли барча персонажлари

ўз хатти-ҳаракатлари, ижтимоий ва интим фаолияти билан кишини ўзига ром қилиб олади, диққатимизни жалб этиб туради, нигоҳимиздан четда қолмайди, пировардида уларга гоҳ хайрихоҳ бўлишимиз, гоҳ нафратланишимиз тамиланади.

Хуллас, романда нимаки тилга олинмасин, барчаси бизни қизиқтиради, бефарқлик туйғусини пайдо қилмайди. Хусусан Отақўзи билан Нормурод Шомуродов бутун вужудимизни эгаллаб олиб, кучли драматик тебранишлар, олишув-тортишув тўлқинларини авжига чиқарди.

Тоға жуфти ҳалолидан, яккаю ягона суюнчиғидан, меҳрибонидан ажralиб, қишлоққа, жиянининг ҳузурига кўчиб келгандан кейин оз муддатгина «нафасни ростлаб олиш» даврини бошидан кечиради: ўзида ҳам, жиянида ҳам адолат, ҳақиқат, ҳалоллик туйғуси мавжудлигига яна бир карра ишонч ҳосил қиласди, лекин бир оз вақт ўтгандан сўнг ўзи кўчириб олиб келинган ҳовлиниң бошқа бир колхозчига тегишли эканлигини, ҳовли эгалари раисдан норози бўлиб юрганини сезади-да, ўзининг ниҳоятда бой, қимматли шахсий кутубхонаси билан Отақўзига айтмасданоқ мактабдан иккита бўш хона топиб, ўша ерга кўчиб ўтади.

Шу тариқа Отақўзи билан Нормурод Шомуродов олишув-тўқнашуви янги поғонага кўтарилади. Бу тўқнашув-олишувлар заррача силлиқлаштирилмасдан барча мураккабликлари билан рўйи рост кўрсатилади. Айниқса, уларнинг ижтимоий моҳиятини ёртишга алоҳида эътибор берилганини мамнуният билан қайд этиш керак. Зотан ёзувчининг ғоявий-бадиий мақсади ҳам шундан иборатdir. Ахир,

иккала қариндош-уругнинг, тоға-жияннинг «жанг»лари бошқаларга ибрат бўладиган маънони англатсагина муҳим салмоқ касб этиди-ку! Дарвоҷе, Нормурод Шомуродов ўз манфаати, ўз фойдаси учун жияннига қарши чиқмайди. Ахир, унга жияни қишлоқда яшаш учун қулай шарт-шароит яратиб берди-ку! Аммо бу илтифот кимнингдир қувончи, шодлиги, баҳтини ўғирлаш ҳисобига келгани Нормурод Шомуродовни хурсанд қилолмайди. Бунинг устига Отақўзи Мингбулоқдай жуда ажиб, гўзал, антиқа жойда чорвачилик комплексини ўз ичига олган катта қурилишни бошлаб юборадики, оқибат-натижада кўпчиликнинг ғазаб-нафратини уйғотади. Ахир, Мингбулоқ бекиёс ва муқаддас табиат яратган мўъжиза-ку! Мўъжизани эса кўз қорашибидай асрар, ҳимоя қилиш керак-ку! Отақўзи эса уни ўйқотиб, ўрнига ҳар хил комбинатлар қурмоқчи ва бу юзаки қарашда эзгуликдай бўлиб кўринади. Ахир, раис қишлоқ ҳалқи учун, коллектив хўжалик учун кўп фойда келтиришини кўзлаб шундай қиляпти-ку!

Ҳа, Нормурод Шомуродов Мингбулоқда қуриладиган комплекс мўл-кўл иқтисодий наф келтиришига заррача шубҳаланмайди, аммо у табиат мўъжизаси бутун қишлоқ аҳлиниң бугуни, эртаси, келажаги учун зўр аҳамият касб этишини тушуммаган, ҳис қилмаган жиянидан; тадбиркор, тажрибали колхоз раисидан хафа бўлади ва меҳнат ветеранлари билан биргарайкомга шикоятнома билан мурожаат этишдан тоймайди. Аниқроғи, ёзилган шикоятномага қўшилади, қандай қилиб имзо чекиб юборганини сезмай қолади.

Одил Ёқубов қаҳрамон руҳияти, дилида

кечган ўзгаришлар, бир-бирлари билан алмашиниб турган қарама-қарши түйгулар, мураккаб ҳислар оқимини асарнинг ғоявий асосига монандлаштирилган ҳолда гавдалантиради, шунга кўра биз Нормурод Шомуродовнинг дард чекиши, эзилиши, иккиланишларини сезиб оламиз: тоға бир жиҳатдан жияни кўрсатган илтифотлар, одамгарчилик, ҳалоллик билан изоҳланадиган хатти-ҳаракатлардан мамнун бўлса, иккинчи жиҳатдан миллионер раиснинг қуюшқондан чиқиб кетиб, ҳамма жойда фақат ўзининг айтгани, ўзининг деганини амалга ошираётганидан разабланади. Газабланади-ю, бироқ жони ҳалқумига келади: жигари шундай қиляпти-ку, ахир?!

Бегона билан эмас, балки жигар, қон-қариндош билан тўқнашув оғир кўчади, фавқулодда кескин вазиятда ривожланади, романда мана шу кескинлик, жиддийлик, оғирлик ижтимоий тараққиётга бевосита боғланиб кетадиган психологик ҳолатлар тарзида талқин этилади, натижада уларнинг таъсир кучи ортади, юракларни ҳам тўлқинлантиради, ҳам ларзага солади. Тўғрироғи, қаҳрамонлар доимо тўлқинланадилар, ҳаяжонланадилар, ларзага тушадилар, түйгулари, фикрларини қамраб олган қаттиқ «жанғ»ларни бошидан кечирадилар ва ёзувчи шунга эришганки, булар бизга, китобхонларга «юқади», ақлу ҳушимизни забт этиб, асир қилиб олади, вужудимизга сингиб кетади.

Яна шуниси характерлики, романда ҳисаяжон, эҳтирослар авжи тўқнашувлар кучайган сари ошaborади, курашлар, олишувлар шиддатига шиддат қўшилаверади. Айниқса, Нормурод Шомуродов билан Отақўзи муноса-

батлари чигаллашиб, мураккаблашиб, таранг тортилиб, ҳислар, түйгулар оқимида «порглаш»лар ҳосил қиласди, хилма-хил «ағдар-тўнтириш»ларга олиб келади, «алғов-далғовлар» пайдо бўлишини тамиилайди.

Оқибатда Отақўзининг кирдикорлари, қилмишлари, зимдан олиб борган қора ишлари ошкор бўлиб қолганлиги ишонарли кўрсатилган. Колхоз хўжалигини кўтараман, миллионер бўламан, шон-шуҳратга эришаман деб, у бошқа хўжаликлар чекига тушган ўғитлар, курилиш материалларини эгри, носоз, адолатсиз ўйлар орқали ўзлаштиради, Мингбулоқда комплекс яратишга киришади, Нормурод Шомуродов сингари ҳақиқатгўй одамларнинг оғзини ёпиб қўйиш пайига тушади, ўз мавқенини мустаҳкамлаш учун ҳар хил лаганбардорларга, ҳатто абллаҳларга ён босади, уларнинг ёвуз, ифлос ниятларини амалга оширишга кўмаклашади, виждони, диёнатининг нидосига кулоқ солмайди, борни ошириб-тошириб, бирни икки қилиб, йўқни йўндиришдан тоймайди, зўравонлик билан ишини битиришдан қайтмайди.

Романда шу нарсага алоҳида урғу бериладики, Отақўзи фаолияти кўп жиҳатлари билан қишлоқ ҳаётини, колхоз турмушини яхшилашга, дехқонларимизнинг фаровонлигини таъминлашга қаратилади, хўжалик иқтисодининг юксалишига йўналтирилади. Бинобарин, ҳаракатдан барака униби ва унга таҳсинлар айтишимиз зарурмасми? Афсуски, бараканинг илдизи ифлослик, қабиҳликка уланган бўлиб чиқади. Ҳалол меҳнат, адолату софлик эмас, балки виждонсизлик, диёнатсизлик, ёлғоняшиқ орқали юзага чиқсан барака бўлиб чи-

қади. Қимларнингдир кўз ёши, қимларнингдир бахти саодати, қимларнингдир насибаси эвазига келган барака эканлиги сезилиб қоладики, Нормурод Шомуродов яна курашга отланади. Тўғрироғи, курашишга отланганлар сафига қўшилиб, сардорлардан бирига айланади.

Яна бир сардор сифатидарайком секретари Аброр Шукуров майдонга чиқади, лекин уни нима учун охиргилаҳзаларда энди эслаямиз? Ахир, бу одам асарнинг деярли барча воқеаларида иштирок этади-ку!? Ҳа, иштирок этади-ю, бироқ унинг жонли қиёфаси «Диёнат»нинг сўнгги бобларида кўзга яққол ташлана бошлади, дастлабки ҳолларда эса шунчаки кўриниб кетади, тўқнашувлар шиддатига деярли таъсир кўрсатмайди.

Бунга бир жуҳатдан эътиroz билдириш қийин. Ахир, Аброр Шукуров роман сюжетини ҳаракатга келтирувчи қўшимча куч сифатида гавдалантирилади-ку! Аммо у дастлаб фақат тўғри йўлдан кетаётган ўта ижобий қаҳрамон деб таърифлангандай бўлади, бироқ кейинчалик, айниқса, асар хотимасига яқинлашган сари Аброр Шукуров «китобий» эмас, чинакам ҳаётий образ тарзида гавдаланиб, қалбимизни тўлқинлантиради, ҳаяжонлантиради. Шунинг учун ҳаяжонлантирадики, у Нормурод Шомуродов сингари Отақўзининг фазилатлари, қусурлари, камчиликларига бефарқ қарамайди, уларнинг ижтимоий илдизларини ахтаради, миллионер раис билан гоҳ бевосита, гоҳ бавосита баҳслашади, тортишади: «Пахта бизнинг фахримиз» деган гап шунчаки бир шиор эмас! Еб ўтирган нонимиз, дастурхонимиз шу нарса-га боғлиқ! Бироқ ким сизга фақат планни ўйла, деди?» «Деганлар бўлмаганми? Тилимни

қичитиб, ярамга туз сепиб нима қиласиз, ўртоқ Шукуров? Қалламни шартта узуб ташласангиз ҳам айтаман — шу бугун ҳам бор унақа одамлар!» «Бор бўлса даври ўтияпти уларнин! Баландпарвоз гапларим учун кечирасиз, лекин улуғ бойликни яратётган одамларнинг турмуши, меҳнати, маданиятини кўпроқ ўйлайдиган пайт келмадимикин, Отақўзи ақа!»

Ҳар иккала қаҳрамон ўртасидаги бу мунозара Аброр Шукуровнинг ички монологи тарзida берилади ва у райком секретарининг қандай раҳбар, қандай инсон эканлигини қисман кўрсатишга хизмат қиласи. Ички монолог (у романда анча салмоқли ўринни эгаллаган) дан англашиладики, Аброр Шукуров бугунги колхоз ҳаётининг мураккабликларини тўла идрок этади, вазиятни яхшилаш фақат раҳбарликка-гина боғлиқ эмаслигини бутун вужуди, ақл-заковати билан тушунади, лекин инсон эзгулик йўлида жонини фидо қиласа, мавжуд имкониятлардан тўғри, оқилона фойдаланса, анча-мунча нарсани ўзгартиради, деган ақидага мувофиқ фикр юритади, меҳнат қиласи, иш олиб боради. Бир кўришдаёқ Нормурод Шомуродовни ёқтириб қолганлиги бежиз эмас! Чунки, домланинг қарашлари, фикрлари билан райком секретарининг нуқтаи назари, ўйлари, туйгулари ўртасида муштараклик мавжуд, улар бир-бирларига маънавий жиҳатдан яқин, бу эса ҳар иккала қаҳрамонни бирлаштиради, ягона нуқтада учраштиради, ҳамдарду ҳамкорга, иттилоғчиларга айлантиради.

Ҳар иккала иттилоғчи, ҳамкору ҳамдард қаҳрамон бир ёқадан бош чиқарип Отақўзидаги катта истеъдод, бебаҳо қудрат, инсонийликни жон-жаҳдлари билан ҳимоя қилиб, унда-

ги манманлик, худбинлик, мансабпаратлик каби иллатларга қарши курашадилар. Курашадилару, бироқ узил-кесил ғалаба қозонадилар, деб бўлмайди. Аниқроғи, ўқувчи ҳақиқат улар томонда эканлигини ҳис қилиб турди, лекия ҳақиқат осонлик билан юзага чиқмайдики, «Диёнат»да бу очиқ-ойдин кўринади. Зотан адолатни байроқ қилиб қалбига, вужудига, виждонига сингдириб юборган қаҳрамонлар бир қанча чиғириқлардан ўтади, ўтиш пайтида баъзи йўқотишлар, жудоликларга учрайди. Чунончи, Нормурод Шомуродов вафоти тасодифий эмас. Наҳотки шундай бўлса, ахир, у ёшини яшаб, ошини ошаб бўлган, поймонаси тўлган қария эмасмиди, дейишингиз мумкин ва бунга қисман қўшилишамиз. Аммо жиянининг қилмиш-қидирмишлари уни чексиз ғамаламлар, қайгу-ғуссалар қаърига тиқиб қўйдики, бу эса ўлимини тезлаштирди.

Роман хотимасида ҳам воқеалар ривожининг шиддати сусаймайди. Одил Ёқубов шунчаки тўқнашувларни якунлаш эмас, балки уларнинг ҳаёт ҳақиқатини ифодалаши, қаҳрамонлар характери мантиғига мос бўлиши, ижтимоий тараққиётнинг муҳим муаммоларини бош қотирган. Натижада Нормурод Шомуродовнинг ҳаётдан кўз юмишини тасвирлаш билан бирга бу фожиали воқеа замирида замондошларимиз тақдирига оид маънолар яшириниб ётганлигини ишонарли кўрсатишга муваффақ бўлган.

Домланинг вафоти ҳақидаги хабар райкомда бюро бошлинаётган пайтга тўғри келади ва Аброр Шукуров бюро аъзоларининг ўринларидан туриб, бир лаҳза сукут сақлашларини сўрайди.

Мана шу сукутда жуда зўр маъно ифодаланган. Гап шундаки, бюронинг ўша мажлисида Отакўзи масаласи муҳокама қилиниши керак эди, Нормурод Шомуродов вафоти муносабати билан бу муҳокама кейинга қолдирилади. Аниқроғи, қаҳрамон фаолиятига якун ясаш китобхон ҳукмига ҳавола қилинади. Ёзувчи Отакўзи раисликда қолиш-қолмаслигини очиқ айтмайди, сюжет ва конфликт ривожини бир нуқтага олиб келиб кузатишлари, мулоҳазаларидан узил-кесил хулосалар чиқармайди. Хулосалар чиқармайди-ю, бироқ хотимани ечишмайдиган жумбоққа айлантирмайди. У қаҳрамон ҳаётида жиддий ўзгариш рўй берадётганига ишора қиласди, Отакўзининг тоғасига, ҳаётга, ўз ижтимоий мавқеига, лавозимига бўлган муносабатини тафтиш этишга, қайтадан кўриб чиқиб, янгидан баҳолашга киришганини таъкидлайди: «Қани энди уни ўз жойида қолдиришса! Хатоларини юзига солиб бўлса ҳам, қаттиқ жазолаб бўлса ҳам ўз ишида қолдиришса! Отакўзи бу хатоларига барҳам бериб, шундай улуф ишлар қилардики, бутун олам қойил қоларди!»

Бу сўзларда хато-камчиликларини қалбан ҳис этиб табиий равишда чуқур англаб етган эмас, балки англаб олишга, тушунишга мажбур бўлган одамнинг нидоси ифодаланган, деийиш мумкин. Чунки, Отакўзи бўлажак бюро мажлисида унга кўпчилик қарши чиқишини сезиб ўзгаришга мажбур бўляпти, вазиятга мослашиш зарурлигини англайти. Худди шу лаҳзаларда тоғасининг ўлими ҳақидаги хабар этиб келади ва ўзининг энг яқин қадрдан кишисидан ажралганини, бунда ўзининг ҳам «ҳиссанаси» мавжудлигини, ёшини яшаб, ошини

ошаб келган кекса одамнинг вафотини тезлаштиришга ўзи ҳам сабабчи эканлигини чукур тушунгандан кейин Отақўзидаги ўзгариш ўзининг мантиқий ниҳоясига бориб, ҳаётй заминга эга бўлади: «Илгарилари ўкситганинг етмандек, умрининг энг сўнгги дақиқаларигача бетгачопарлик қилмадингми бу ҳалол ва хокисор одамга? Сохта обрў, юксак лавозим ва ўткинчи шон-шуҳратни деб, унинг яхши ниятларини рад этиб, яхши гапларини оёғости қилмадингми? Ҳатто пешонанг деворга бориб теккандя ҳам, ҳатто шу бугун ҳам ҳаётнинг бу шафқатсиз сабоқларидан хулоса чиқариш ўрнига манманлик қилиб ҳам ўз обрў-эътиборинг учун олишаётганинг йўқми? Бас! Бўлди! Лоақал энди, бу муқаддас қабр тепасида мунофиқлик қилма, лоақал энди, ҳаётнинг бу раҳмисиз ҳукми олдида ҳалолликни, диёнатни ўйла, Отақўзи!»

Мунофиқлик қилган, инсонийликни оёғости қилган одам пировардида даҳшатли фожиага йўлиқишини, ҳалокатга юз тутишини бутун вужуди билан сезиб олган қаҳрамон гавдаланяпти кўз ўнгимизда ва биз унинг энди тавбасига таянгани, пушаймон егани рост эканлигига шубҳаланмаймиз, лекин ёзувчи бу жуда кучли, улкан, қобилиятли ва ғоятда мураккаб инсон бир юмалаб фариштадек беозор, беғубор, бенуқсон, олижаноб сиймога айланиб қолди, деган хулоса чиқараётгани йўқ, аксинча, бундай фикр туғилишига имкон бермайди. Хотимага шундай маъно сингдирилганки, Отақўзи хаётнинг тазыйиқи остида диёнат, вижданга хилоф иш қилиш ҳалолликка ҳам, адолатга ҳам, инсонийликка ҳам мутлақо ёт эканлигини тушунди ва бундан кейинги фаолиятини шунга

мувофиқ олиб боради, бироқ унинг тоғасидай хокисор, ниҳоятда олижаноб, ҳалол, гўзал инсон даражасига кўтарилиши ёки кўтарилимаслиги тўғрисида фикр билдирилмайди, қаҳрамон тақдиридаги ўзгаришга охирги нуқта қўйилмайди.

Тасвирланган воқеаларга узил-кесил яқун ясадмагани, қаҳрамонлар тақдирининг бундан кейин қандай бўлиши башорат қилиб айтилмагани; уларнинг ҳаётидаги ўзгаришлар яка-ю, ягона тўхтамга келтириб қўйилмагани «Диёнат» романига алоҳида табиийлик, ҳаётйлик баҳш этади. Яна шуниси диққатга сазоворки, ундаги турмуш ҳодисалари, қаҳрамонларнинг хатти-ҳаракатлари, фикр-ўйлари, мулоҳазалари, кечинмалари кенг ва катта миқёсдаги, эпик тафаккур (романное мышление) талабларига мувофиқ равишда тасвирланган.

Мана шу фазилатлари билан «Диёнат» Абдулла Қодирий, Ойбек, Абдулла Қаҳҳор каби романнависларимизнинг анъаналарини ҳозирги замон талабларига мос ҳолда ривожлантириб уларга янги мазмун баҳш этаётган пешқадам ёзувчиларимизнинг етук асарлари сафидан ўрин олганлигини кўрсатди. Романинг бунга қўшимча тарзда таъкидланадиган муҳим жиҳатлари мавжудки, уларни эътибордан соқит қилиш инсофдан эмас: Одил Ёқубов илмий-техника тараққиётидан келиб чиқиб, инсоннинг бугунги ҳаёти, тақдири, баҳт-саодати, қувонч-шодликлари, ғам-аламларига бевосита боғланадиган, нурли келажак заминини ҳозирлашда жуда катта аҳамият касб этадиган долзарб ижтимоий-маънавий муаммоларни кўтариб чиқади ва уларни тўлақонли оби-

разлар яратиш орқали ёритишга интиладики, бу интилиш, айниқса, Отакўзи билан Нормурод Шомуродов характерларида ўзининг ёрқин ифодасини топган самарали натижаларини келтирган, ижодий ғалаба билан якунланган.

Гап ҳозирги замон социалистик хўжалик ларининг раҳбарлари ҳам билим, қобилият, истеъдод жиҳатидан, ҳам маънавий соғломлик, руҳий етуклик, инсоний соғлик жиҳатидан давримизнинг юксак талабларига жавоб берадиган даражага кўтарилиб, ҳалқимиз эҳтиёжларини қондиришга ўзларини сафарбар қылсалар, ҳеч қачон виждон, диёнатга хиёнаткорона, мунофиқона муносабатда бўлмасалар, обрў-эътибор қозонадилар, эл-юрт муҳаббати, ҳурматига эришадилар, деган салмоқли фоянинг асар қаҳрамонлари, хусусан Отакўзи ва Нормурод Шомуродов муносабатлари таҳлилида чуқур ва ишонарли ёритилгани тўғрисида кетаётир. Мазкур фояга мантиқий изчиллик билан уланиб кетадиган қатор ўткир ижтимоий муаммолар қаламга олинади ва ҳаётий манзараларда ёритилади. Улардан бири қишлоқ хўжалик зараркунандаларига табиий, биологик воситалар орқали курашини кенг қулоч ёздириш, таомилга киритишдан иборатдирки, ёзувчи бу борада нимаики тилга олинмасин, барчасини «Диёнат» қаҳрамонлари тақдирига «спайвандлайди».

Маълумки, бу усул ўз номи, моҳиятига мувофиқ инсонга ҳам, табиатга ҳам жиддий зарар келтирмайди, бироқ ҳали обдан синалиб, ўз қудратини, афзалликларини намойиш этмаган. Шунинг учун Отакўзи ҳадеб химикатларга зўр беради. Ахир, у қандай йўл, қандай

восита бўлишидан қатъий назар нимаки тезда мўл наф келтирса, шуни қўзлайди-да! Табиий, биологик усул Отакўзининг планларини юзикки юз фойиз бажариб, шон-шуҳрат қозонишига монеълик қиласиди, шунинг учун раис сифатида унга қарши чиқишдан бошқа иложи қолмайди.

Роман воқеалар тасвиридан шу нарса англашилиб турадики, Отакўзи табиий, биологик усулнинг инсон саломатлиги, баҳт-саодати учун фойдали эканлигини сезади, ҳис қиласиди, аммо планни бажариб, обрў қозониш учун химикатлардан фойдаланишга мажбур қиласиди.

Асарда табиий, биологик усулнинг ҳимоячиси, раҳнамоси сифатида миллионер раиснинг бўлгуси келини ва унинг домласи Обидов гавдалантирилади ва муаллиф шунга эришганки, биз Обидов ҳамда унинг севимли талабаси Латофатни яхши кўриб қоламиз, уларнинг пахта учун, пахтакор учун сидқидилдан қайғуриши, дехқоннинг истиқболи, ер, тупроқ, табиатнинг истиқболи тўғрисида ғамхўрлик қилишига асло бефарқ қараш мумкин эмас. Дастрлаб домла ва унинг талабаси Отакўзининг кескин қаршилигига дуч келади, ҳатто Обидовни вақтинча қамаб қўйишгача бориб етадилар, бироқ Шукуровнинг аралашуви билан улар ўртасида тўқнашув тезда барҳам топади, биологик, табиий усул тарафдорлари ғалаба нашъасини сурадилар, лекин бу ғалабанинг ҳаётий замини, асослари, сабаб-оқибатлари бизни етарли даражада ишонтирумайди. Шунингдек, домла ва талаба бир-бирларига шу даражада қалбан яқин қилиб кўрсатиладики, улар бир-бирларини севиб қолган, деб ўйлаш мумкин, бироқ воқеанинг бу аснодаги ривожи

негадир ўзининг мантиқий ниҳоясига етмайди. Ахир, Латофатга уйланмоқчи бўлган Ҳайдар, ўша Отақўзининг яқиндагина фан кандидати унвонини олган ўғли бўлгуси хотинига бекорга рашк қилиб, Обидовдан нафратланиши бежиз эмас-ку!

Ҳайдар ва унинг илмий раҳбари Миробидов, Нормурод Шомуродовни не-не балоларга гирифтор айлаган олимсизмон одам тақдирига боғлиқ ҳолда Сибирь дарёларини Ўрта Осиёга буриш, оқава сувлардан фойдаланиш муаммоси кўтарилади-ю, аммо бу муаммо ҳам қаҳмайди. Умуман Ҳайдар билан Латофат, Миробидов билан Нормурод Шомуродов, Обидов билан толибаси ўртасидаги муносабатлар роман конфликтининг ривожига, тўқнашувларнинг кескинлашувига жиддий таъсир ўтказадиган даражада тадқиқ этилган, дейиш қийин.

«Диёнат»да йўл қўйилган айрим нуқсонларга навбат келганда энг ёрқин, энг мукаммал ва тўлақонли чиққан Отақўзи образида кўзга ташланадиган қандайдир бир мавҳумлик, ноаниқликка диққатингизни жалб этмоқчимиз: гап шундаки, ёзувчи қаҳрамоннинг раҳбар сифатидаги муҳим фазилатлари, салмоқли хусусиятлари, мавжуд етишмовчиликлари тўғрисида жуда ҳаққоний тасаввур тутғидари, таъсирчан манзаралар яратади, миллионер раисдаги мураккаб, чигал туйғулар, кечинмалар, мулоҳазалар оқимини чуқур тадқиқ этади, бироқ унинг интим дунёси, оиласи ташвишлари, деярли очилмайди. Ахир, Отақўзидай кучли, йирик ва зиддиятли, мураккаб шахснинг севгиси ҳам foятда кучли, бекиёс салмоқли, мисли кўрилмаган даражада му-

раккаб, чигал, зиддиятли бўлиши керакмасми?

Тўғри, бир қанча ўринларда Отақўзининг оиласида ҳам ўз ҳукмини ўтказадиган салобатли, ўжар, ҳоким эр ва ота сифатида гавдаланади, Латофатни «жиловлаш»га дадил ҳаракат қилмаган ўғлини мижғовликда айблайди, хотини Олияга гоҳ меҳрибончилик кўрсатади, гоҳ кўрслик қилади, лекин аслида қаҳрамон интим туйғулари, кечинмаларидағи «портлаш»лар, «ағдар-тўнтар»лар, тўқнашувлар кенгроқ миқёсда олинниб, ижтимоий фаолиятидаги шиддатли тўқнашувларга, олишув-тортишувларга табиий равишда моҳирона «пайвандланган»да «Диёнат»нинг янада мазмунлироқ, янада баркамолроқ асар даражасига кўтарилмасмиди демоқчимиз. Бунинг устига онда-сонда, у ер бу ерда баёнчиликка, юзакиликка ўрин берилганини ҳам афсусланиб қайд этишга тўғри келади. Нимасидир ойдинлашмай, нимасидир ниҳоясига етмай қолган, нимасидир чуқур ёритилмаган персонажлар учраб туришини айтмайсизми?!

Хуллас, ҳар тўқисда бир нуқс деганларидек, «Диёнат»нинг ўзига хос етишмовчиликлари мавжуд, бироқ улар асар фазилатларини инкор этмайди. Зотан Одил Ёкубовнинг бу романни кенг миқёсли эпик тафаккур талабларига тўла жавоб беради, унда бугунги қишлоқ ҳаёти ўзининг маънавий-иқтисодий, ижтимоий, руҳий бойликлари, мураккабликлари, зиддиятлари билан гавдаланади. Энг муҳими, асарнинг ҳар бир сўзи, ҳар бир жумласи, ҳар бир образи, ҳар бир персонажи ёзувчи қалб қўрига йўғрилганлиги коммунистик жамият қурувчиликарининг юрак тутғени, орзу-умидлари, дард-аламларини ифодалашга қаратилганлиги се-

зилиб турибди. Роман бошдан-оёқ, биринчи сатрларидан то охирги сўзларигача чинакам истеъдодли ижодкорнинг кучли эҳтиосларига, рига «едириб» юборилгандай таассурот қолдиради. Бу эҳтиослар, ёниб-куйишлар, дил розларидаги эса ҳозирги замонимиз — етук социализм даврининг руҳи ифодаланган ва уларда коммунистик эътиқод билан келажаккишиларининг ижтимоий ва шахсий ҳаётидаги жасоратлари, шиддатлари, интилиш-изланышлари мавж уриб турибди. Зотан шиддатли қаҳрамонларнинг шиддатли ҳаётини рўйинрост, ҳаққоний кўрсатиб, турмуш зиддиятлари, мураккабликлари чигалликларини табиийлиги билан ёритишига йўналтирилган асар шиддатли баҳслар, шиддатли муноザзараларга даъват этадики, бизнинг мулоҳазаларимиз шундай фикр олишувларнинг бир кўриниши сифатида ҳукмингизга ҳавола қилингани. Мулоҳазаларимиз кимларгадир «юқиб», кимлардадир фикр уйғотса, кимларнидир мунозара-га тортса, вазифамиз ўталди, деб ҳисоблардик, лекин улар «Диёнат» романининг барча фазилатлари, гоявий-бадиий хусусиятлари, нозик ва назокатли, шунингдек қиёмига етмаган жиҳатларини тўла қамраб олишга қодир эмас. Чунки, таҳлил учун бой, салмоқли материал берадиган бу асар ҳали қанчадан-қанча тадқиқот ишларига баркамол асос бўлишига шубҳаланмаймиз. Шиддатли туйғулар, шиддатли кечинмалар, шиддатли ўйларга ўйғирлган асар ўқувчиларнинг ҳам, мунаққидларнинг ҳам шиддатли фикр-мулоҳазалари, шиддатли кечинмаларини ҳаракатга келтиради.

ХОТИМА ҮРНИДА ИККИ ОҒИЗ СҮЗ

Одил Ёқубов ёзувчи сифатида кундан кунга янада етилиб, очилиб боряпти, унинг ижодий парвозлари муваффақиятли давом этмоқда. Навбатда янги-янги асарлар турибди. Шундай экан, ҳали якунга вақт эрта. Аммо биз шуни таъкидлашимиз мумкинки, Одил Ёқубов ижодий такомили давомида хилмажил асарлар ҳадя этди, бадиий оламида ўзига хос санъаткор сифатида тажриба орттириди, машақатли, аммо шарафли йўлни босиб ўтди.

Табиийки, у яратган барча асарларни ба-тафсил, кенг миқёсда таҳлил қилиб, узил-ке-сил ҳукм-хulosалар чиқармоқчимасмиз. Мақсадимиз Одил Ёқубовнинг ажойиб истеъод соҳиби сифатида анча-мунча муваффақиятсизликларга дуч келганлиги, бу йўлда ўзига муносиб сабоқ олиб, қийинчиликларни бартараф этганлиги, бадиий камолотга жиддий изланышлар, қаҳрамонона интилишлар, курашлар на-тижасида эришганлиги юзасидан ўз кузатишларимиз, мулоҳазаларимиз билан ўртоқла-шишдан иборат эди.

Абдулла Қаҳҳор ёзувчининг таржимаи ҳоли уни асарларига сингиб кетади, ижодий изланышларига кўчади, деб уқдириган эди. Владимир Маяковский эса «Мен шоирман, шуниси муҳим, бошқа гапларнинг ҳеч қандай аҳамияти йўқ», деб ҳайқирган эди.

Бундан шундай маъно келиб чиқадики, ёзувчининг таржимаи ҳоли унинг ижодида акс этади, ижодида мужассамлашади, бинобарин, биринчи навбатда ёзилган китобларни таҳлил қилиб, уларнинг ижодкори қиёфасини аниқла-шимиз танқидчилик учун ҳам фарз, ҳам қарз-

дир. Одил Ёқубов асарларини таҳлил қилишга интилишимиз шу билан изоҳланади.

Бадий маҳорат деган тушунча анча кенг; мураккаб, салмоқли мазмунни қамраб олади, бироқ бу мазмун моҳиятини ёритишга энди киришиляпти. Борди-ю, бу соҳадаги ишларимиз авж олиб, кенг миқёсда давом эттирилса сўз санъатининг асл маъносини очишга, баднийлик қадр-қимматини янада оширишга эришардик, бу борадаги бракларга тўсқинлик гунлигини таъминлаш жуда қийин, лекин шарафли вазифа ва бу вазифани муваффақият билан адо этган мұнаққид мақсадига етади, келажак заминини яратади.

Одил Ёқубов кўпгина адабий-танқидий мақолалар ёзиб, таҳлилнинг мана шу жиҳатига алоҳида эътибор берәтири. Айниқса, Абдулла Қодирий услуги, романларининг гоявий-бадний хусусиятларига оид мұлоҳазалари қизғин баҳсларга туртки берди.

Қизиги шуки, ёзувчи шогирд сифатида устоз номига, Абдулла Қодирий шарафига қанчалар таҳсиллар айтган бўлса, бирортаси эътириз түғдирмади, бироқ айрим танқидий мұлоҳазалари эса ҳалигача тўла ҳазм қилинмаяпти.

Одил Ёқубов шундай деб мұлоҳаза юритади: «Романда чуқур маънодаги реалистик аданбёт талабларига жавоб беролмайдиган, романтик услуг таъсирида ёзилган, шунинг учун ҳам бугун «ясамалиги», сунъийлиги сезилиб қоладиган айрим саҳифалар бор. Масалан, ҳаётда кўп нарсани кўриб чиниққан, тажриба орттирган Отабекдай йигитнинг худди ёш бир ўспириндай Кумушга ошиқ бўлганини ҳаммадан яшириб, кечалари тўлғаниб чиқишлиари, айниқ-

са, оддий хизматкор Ҳасан-али ундан яшириқча совчига боришилари, ниҳоят, бу сирлардан бехабар Кумушнинг никоҳ кечаси: «Сиз ўшами?» деб «кутилмаган баҳт»га мусассар бўлиши... бунинг ҳаммаси китобхонга асарнинг таъсир кучини ошириш учун, «эфект» учун қилинган, яъни, бошқача қилиб айтганди — «ясалган». Назаримда романнинг «Хукмнома» боби, Кумуш жаллод қўлига топширилган Отабек билан Кутидорни хат воситаси билан дор тагидан қайтариб, қутқариб қолиши ҳам эртаклардаги воқеаларга ўхшаб кетади».

«Меҳробдан чаёнда» ҳам шунга ўхшаш айрим жузъий нуқсонлар мавжудлигини Одил Ёқубов ёзувчига бўлган ҳурмату мұҳаббатига шак келтирмаган ҳолда дангал айтади.

Одил Ёқубовнинг фикрлари билан келиш маслигимиз мумкин, баҳслashiшимиз, ҳатто рад қилишимиз мумкин, бироқ уларда жон борлигини эътироф этмасдан иложимиз йўқ.

«Утган кунлар»ни ҳам, «Меҳробдан чайн»ни ҳам Одил Ёқубов юксак баҳолайди, фақат ёшлик чоғидагина эмас, балки ҳозирда ҳам уларни зўр қизиқиш, кучли ҳаяжон билан ўқиганлигини ғуурланиб, қувонч билан сўзлайди, айни ҷоқда баъзи жузъий етишмовчиликларидан кўз юммаслигимиз зарур, чунки, биз Абдулла Қодирий эгаллаган довонлардан ўтиб, янги юксакликларга «ҳужум» қилмоғимиз зарур деб ўз фикрини билдирияпти.

Фойдали фикр, ибратли фикр! У Одил Ёқубовнинг етук адид даражасига кўтарилигини, маҳоратнинг бундан ҳам юксак нуқталарини эгаллашга қодир эканлигини кўрсатди.

МУНДАРИЖА

Муқаддима	3
Түғилиш, ўсиш-ўзгариш сехри	7
Қамолот заминлари	20
Парвоз давом этади	34
Етуклини мевалари	46
Дунё кенгликлари ичра	107
Шиддатга шиддат қўшилади	130
Хотима ўрида икки оғиз сўз	164

На узбекском языке

Нарбай Худайберганов

ПОЛЕТ ПРОДОЛЖАЕТСЯ

Штрихи к портрету Адыла Якубова

Редактор Норбоев Б.

Рассом Крюков А.

Расмлар редактори Пономарев А.

Техн. редактор Смирнова Т.

Корректор Соатова Ш.

ИБ № 985

Босмахона берилди 26. 11. 79. Босишига рухсат этилди
13. 5. 80. Р 09030. Формати 70×90^{1/32}. Босмахона қозози № 3.
Адабий гарнитура. Юқори босма. Шартли босма л. 6,14.
Нашр л. 6,11+0,02 вкл. Тиражи 3000. Заказ № 82. Баҳоси 65 т.
Ғафур йулом номидаги Адабиёт ва санъат нашриёти. Тошкент,
700129. Навоий кӯчаси, 30.

Ўзбекистон ССР Нашриётлар, полиграфия ва китоб савдоси
ишлаб чиқариш бирлашмасининг 2- босмахонаси Янгийўл. Са-
марқанд кӯчаси, 44.